

BARÎÊ BALA

ZERDEŞTÊ KAL



BARÎÊ BALA

ZERDEŞTÊ KAL

(POÊZÎA Û NIVÎSARA VEKIRÎ)

*Berevok Nûrê SERDARYANÊ (Nûra Emerîk)
bona weşanê amade kirye.*

Yêrêvan  “VMV-PRÎNT”
2015

ՀՏ 821.222.5Բալա
ԳՄ 84(5Քուրդ)
Բ 200

Բալա Բարիե
Բ 200 Ծեր Զրադաշտը/Բարիե Բալա.- Եր.:
ՎԱՎ-Պրինտ, 2015.- 188 էջ:

Vê berevoka Barîe Balada ew efrandin hatine cîwarkirinê, ku xudan van salê dawîê nivîsîne û tu ciya nehatine weşandinê. Xêngi wê hetanî nha çend berevokê wî bi zimanê kurdî, yek jî bi wergêra rûsî hatine weşandinê. Berevokeke wî Başûrê Kurdistanê, Dihokêda ronkayî dîtye.

ՀՏ 821.222.5Բալա
ԳՄ 84(5Քուրդ)

ISBN 978-9939-60-294-3

© Բարիե Բալա, 2015



*Xwezil, xwezil vê duhezar panzdê salê
Dost, aşîti tijî bibe temam dinê.
Ezman-erşê welatê min bibe zelal,
Em jî rehet buxun parî nanê helal.*

B. Bala

ÇEND GILÎ DERHEQA XUDAN Û EFRANDINÊ WÎDA

H

elbestvan, nivîskar, dramatûrg û şuxulkarê kurdî civkî Barîê Bala (Balaêv Baro Eliêvîç) sala 1937-a gundê Dêmîrçîê nehya Masîsê, Ermenîstan, mala kurdaye sadeda hatye dinê. Bavê wî Elîê Paşaê Miho tevî Şerê Wetenîeyî mezin bûye û sala 1943-a şehîd ketye. Dayîka wî Qaza Evdoê Bişo tenê heyşt zaro xwey kirine û mezin kirine: hevt kur û doteke.

Gava sala 1958-a Barîê Bala mekteba gunde navîn xilaz kir, hema wê salê jî fakültêta dîrokê-filologîê ya para azirbêcanî ya Înstîtûta Yêrêvanêye pêdagogîeye ser navê X.Abovyanda tê qebûlkirinê. Paşî xilazkirina Înstîtûte sala 1963-a B.Bala çend sala mekteba navînda xebitye çawa dersdar, paşê bûye înstrûktorê ziman û wêjea azêrî û kurdî ya wezîreta Ermenîstanêye ronkayê. Ew usa jî wedekî dirêj bûye dîrêktorê sovxozeke nehya Masîsê.

Sala 1989-a wextê şerê bona Qerebax'a Ç'ya mala B.Bala tevî gelek kurdê musulman barkir, ji Ermenîstanê çû. Pêşîê çû Azirbêcanê, paşê cîguhastî Qazaxstanê bû, çû bajarê Alma-Ataê. Hetanî nha jî ew wêderê dijî û bi aktivî tevî jiyana cîvakî dibe – ew hesab dibe rîspîê olka kurdaye li Qazaxstanê.

Efrandinê Barîê Bala bi dewlemendbûna janrava berbiç'evin. Helbestara tevayî ew usa jî nivîsara vekirî dinivîse. Ew him romanok ("Dayîka Werdek û kevokê reş", "Gundê me mezin bû", "Ez û kevokê tenê" û yêd mayîn), him piês ("Salih û Gulistan", "Seyran", "Nado û Narê", "Têlî û Miho"), him bîranînin ("Seyda Şamil", "Qencî naê bîrkirinê", "Derheqa Wezîrê Nadirîda" û yêd mayîn).

Pirtûka Barîê Balaye pêşin "Dinya min" sala 1974-a Yêrêvanêda ronkayî dîtye. Berevoka wîye duda îdî Bekûêda hate weşandinê û navê wê haye: "Kuda herim". Salê dawîêda pirtûkê wîye mayîn hatine çapkiranê: "Dîlbera min" (2008), "Dayîk" (2009), "Kulîkîn neç'ilmisi" (2011), "Deh bûyer" (2012) û pirtûka bi zimanê rûsî wergerandî "Ez û kevokê tenê" (2014). Xênji wê, berevokeke helbestê B.Bala Dihokêda (Başûrê Kurdistanê) hatye weşandinê.

Têma helbest û poêmê Barîê Bala cuda-cudaye, lê bingehî ew welatparêzî, têma dayîkê, fikrê filosofiêne derheqa jiyana merivayêda û, hilbet, evîntî.

Ew bi hizkirineke mezin derheqa dayîkêda dinivîse, tê bêjî ewê dike pêxember. Çawa şedê wê yekê em dikarin van xetê ji helbesta "Dayîk, tu welatî" bînin:

*Tu ku heyî, dinya şêne,
Tu tunenî, dinya şîne.
Rûê erdê qulbe tuyî,
Xwedê pêştir, mezin tuyî.*

Ez dixwazim dha hûrgilî ser têmatika poêzia Barîê Balaye welatparêzî bisekinim.

Helbestvan wedera gav dide. Ew bi dikovanî derheqa

qewmandinê wê herêmêda dinivîse, ku îro tabetiê nadine merivayê. Gilî derheqa wan bûyeradane, ku sala 2014-a Şengalêda, Kobanîê û Mûsilêda qewimîne, rûê çida bi hezara merîê amûtam bûne şehîdê islamîstê devbixwîn. Helbesteke bi wê têmaê ha tê navkirinê: "Merivê dinê, rica dikim, hemû werin!". Aha B.Bala derheqa rewşa penaberê êzdyada çawa dinivîse:

*Bistan devê dergûşada,
Dê şehîdin, şîr tunene,
Kal-pîr mane nav êgirda,
Zare, zarin, rehm tunene.*

*Sêwî ketine nav ç'îane,
Bav, dê pêş wan şerjê kirine,
Ne sî heye, ne jî sitar,
Laşa nakin bin axa sar.*

Helbestvan gelekî bi dilşewatî derheqa wê yekêda dinivîse, ci ku ser axa welatê wî diqewime:

*Zimanê me yasax kirne,
Hebûna me talan kirne.
Bombêjerê dixulqînin,
Ser axa me dicêrbînin.
Dengê tanka, ji teyara
Sewiqîne, zarêner bera.
Em dizérin, ew kêf dîkin,
Zulmê ser me zêde dîkin.
(“Mirovîn dinê”)*

Hilbet, çûyîna helbestvane pêşin welatê kal-bava – Kurdistanê – nikaribû hukumê xwe ser efrandarya helbestvan nehiştâ. Helbesta wîye “Welatê dê. Dihoka rengîn” derheqa wê yekêdane û bi hewas-hijmekar derheqa wan wargada dinivîse, ci ku ber ç’evê xwe dîtye.

*C’ya-banî, seyrangehên te min dîtin,
Qelfe-qelfe nazenînên te min dîtin.
Gora nemir Kek Barzanî min tewaf kir,
Li Hewlîrê, Sulêmanyê firavîn kir.
Zexoê, Şêxanê, Lalisê mîzekir,
Şeqlewaê, Saleddînî temâsekir:
Hesret dilê minda nema, kûr bîn kişand,
C’eva bê min ji şabûna hêsis reşand.*

Xem-xiyalê helbestvan ewin, wekî Kurdistan yektî û serbestbe. Em tenê du çaxxeta bînin:

*Tew hidûdên herçar parç'a bêñ hildanê,
Bê xof vebin rê û dirbêñ Kurdistanê.
Yek Kurdistan nexşê dinê bigre cîê,
Zincîr qutbin, bimre mejî koletîye.
(“Xwezil, xwezil”)*

*Tank, teyare mekin gujîn, teqe, reqe,
Her çar parç'e tevî hevbin, bibin yeke.
Serokê me derkeve ji hepsa terî,
Neyar qutbin pêş heqîê, bikin zarî.
(“Ya Rebbê Jor”)*

Poêma “Zerdeştê Kal” jî bi ruhê welatparêzîyî bilind perwerdekirîye. Her xetekêda dilêşya helbestvan tê kivşê bona wê rewşê, ku gelê kurd têdane. Ew usa jî zevtkirê wetenê me gunekar dike. Ev para poêmê ser bingeha himberîhevkininê hatye nivîsarê, û eva yeka alîkarî dide poêm hêsa û hewaskar bê xwendinê. Aha pareke biç’ûk:

*Em bûn sexîr, ew têr dewlet,
Em bûn feqîr, wî girt dewet.
Av me anî, ewî vexwar,
Em bûn bedbext, ew bextewar.*

Dixwazim usa jî bidme kivşê, wekî hetanî helbestê lîrîkîê û evîntîê jî bi ruhê welatparêziê perwerdekirîne.

*Wê alameye kesk, sor, spî
Binikîne pir bilindcî.
Serxwebûnê elam bike,
Cejna min, te pîroz bike.
(“Nazika bedew”)*

Efrandarya B.Balada cîkî berbiç’ev digrin şuxulê bona zaroka. Ewana kurtin, anegorî fikrandina zarokanîn, rîtmîkîn û hêsa têne bîranînê. Nimûnê poêzîa bona zaroka her berevokeke helbestvanda hene. Vê berevokêda ew 2 helbestin (“Hirç’ika min” û “Kurik û qeşav”) û ç’irokeke biç’ûke (“Gul û Gulçîn”).

Fîkrê filosofiê derheqa jiyan, mirinê, qencî û xiravîê, heqî û neheqî, aqilbendîê ne tenê janra Çarxetada, lê usa jî sîkla “Hevt bûyer”-ada têne kivşê.

Efrandarya B.Bala usa jî bi ruhê zargotinê perwerdekirîye. Ew yek her efrandineke wîda tê kivşê. Xudan bi merdane mesele, meteloka, îdioma, zûgotinoka, dua-dirozga, nifira dide xebatê û usa jî bi hûrgilî derheqa gelek erf-edetê gelerîda dinivîse. Ew usa jî berk dertê dijî erf-edetê kevne, ziyanar: zewac-mêrkirina qewm-pismamê nêzîk (nivîsar “Bila dilî dilbe”), gava nahêlin qîz bixûnin (piêsa “Seyran”) û hwd.

Barîe Bala berk terevdarê mala qewîne û xweykirina qîmetîê malêye. Ew yek îlahî “Şîretname”-da tê kivşê, ku pêşkêşî herdu lawê xwe kirine – Elî û Anar. Para helbestê rewakirîda helbestê pêşkêşî nevîê wî kirîne hene: Qadir, Norhan, Medîna, Celîl û yêd mayîn.

Eva berevoka Barîe Bâlaye bi sirê pêşkêşa wîye bi dile bona xwendevanê kurd û em bawerin, wekî ewê ji alîê wanda baş bê qebûlkirinê.

*Nûrê SERDARYAN (Nûra Emerîk),
endama Yekîtya nivîskarê Ermenîstanê,
endama PENa Kurd.*

*Yêrêvan,
s.2015-a.*



WETENHIZÎ



YA REBBÊ JOR

Xwezil, xwezil vê duhezar panzdê salê
Dost, aşîfî tijî bibe temam dinê.
Ezman-erşê welatê min bibe zelal,
Em jî rehet buxun parî nanê helal.
Tank, teyare mekin gujîn, teqe, reqe,
Her çar parç'e tevî hevbin, bibin yeke.
Serokê me derkeve ji hepsa terî,
Neyar qutbin pêş heqîê, bikin zarî.
Zor nemîne, mejî wînrêj, ne xwînxare,
Bombêñ jerê jorda jêrda meén xare.
Welatê me şenbe, bibe rewş gulistan,
Dost û hogir kom-kom bibin li wê mêvan.
Ala kesk, sor, spî bê xanê nav alada,
Govend, dîlan tijî bibin bajar, gunda.
Bê xof, aza tew gelê xwe ez bibînim,
Eyd û şayêñ, pîrozbayâ dûr nemînim.
Îdî sihkim Xwedî îznam li vê dinê,
Aza bijîm heyâ gava ber mirinê.

HELBESTVAN KÎYE

Ç'ev, bînaê gelê xune,
Jan û êşen gelra ku têñ,
Gel ewiltir ew dibîne,
Dıaxive, nahêvşîne.

Zar-zimanê gelê xune,
Ew gazinê gelê bêje.
Gel ewiltir ew dibêje,
Ser kaxeta ew dirêje.

Hiş, mejûê gelê xune,
Dilê gelda ci disêwire,
Dilê wîda jî disêwire,
Fitê nade, bibihure.

Kefilnevse gelê xune,
Piştovane, pir mezine.
Ew gelê bê helbestvane,
Bê nav-dengî, perişane.

AX, AX, BÊ WELATÎ

Bê welatî zef girane,
Kî jê dûre, ew dizane.
Pî sirûkî, hêlîn sare,
Kuda diçe, tenezare.

Kesek halê wî pirsnake,
Kîbûna wî qet nasnake.
Kuç'ek ji wî hurmettire,
Zilek ji wî bahatire.

Bêkavî dil mîze dike,
Dil dixwaze, taqet nake.
Bê kes, bê pişt sekinîye,
Zûda dinê koçkirîye.



WELATÊ DÊ

Qedir, qîmet, kubra minî,
Ruhî, canî, xwîna minî.
Emir, jîne, heyâ minî,
Tawet, taqet, sebra minî,
Ez ewledê teme, welat.

Bext û miraz, şaya minî,
Mal û dewlet, milkê minî.
Zar û ziman, rewşa minî,
Agir, alav, şûrê minî,
Ez ewledê teme, welat.

Nexş, nîgar, xemla minî,
Gav û sehet, roja minî,
Dîlan, dewet, şaya minî,
Şeref, namûs tacê minî,
Ez ewledê teme, welat.

Seyran, geştî, kêfa minî,
Av û hewa, nanê minî,
Hurmet, syanet, gora minî,
Bilindaya serê minî,
Ez ewledê teme, welat.

Erf û edet, mafê minî,
Cî, miskenê gelê minî.
Dîn û îman, qulba minî,
Şewq-şemala rûê minî,
Ez ewledê teme, welat.

MERIVÊ DINÊ, RICA DIKIM, HEMÛ WERIN!

(Rewayî ruhê şehîdên Kobanê, Mûsilê û Şengalêye bê gune
dikim. Hezar, hezar carî rehmeta Xwedê li webe,
heyfa weê bê hildanê)

Hewar, hewar, werin, werin,
Mesekinin, hemû werin,
Boy şehîdên meye şirîn
Hûn jî hinek tev me bigrîn.

Kirinên DAÎŞ-a mîze bikin,
Ker-lal nebin, ziman vekin,
Xwîna gelêm bûye ç'eme,
Dixulkule, leme-leme.

Ella dibêni ziqa dîkin,
Ekber dibêni, kafkûn dîkin.
Agir dibarînin jordâ,
Wa, îslam tune tu erda.

Erş û kursî wehimîne,
Ro, Hîv idî xeyîdîne,
Werin, werin, me ar bikin,
Vê tofanê em red bikin.

Bistan devê dergûşada,
Dê şehîdin, şîr tunene,
Kal-pîr mane nav êgirda,
Zare, zarin, rehm tunene.

Sêwî ketine nav ç'îane,
Bav, dê pêş wan şerjê kirine,
Ne sî heye, ne jî sitar,
Laşa nakin bin axa sar.

Heta kengê emê wa bin?
Ser axa xwe tengezar bin?
Em jî tev we xuliqîne,
Boy ci guneyî em wa bûne?

Me dikujin hûn deng nakin!
Destêni DAÎŞ-a hûn jênakin,
Werin tev me ç'eka hildin,
Hovî, hara em qut bikin.

Dîroka me daynin pêş xew, mîze bikin,
Em nevîê Eyûbîne, me baş naskin,
Rojavaê dîsa bûye doz û qale,
Em dubar aza bikin Şerqa kale.



XWEZIL, XWEZIL

Tew hidûdên herçar parç'a bêñ hildanê,
Bê xof vebin rê û dirbêñ Kurdistanê.
Yek Kurdistan nexşê dinê bigre cîe,
Zincîr qutbin, bimre mejî koletîye.
Ala kesk, sor, spî bimilmile koşk, birca,
Dîlan, şâî tijî bibin hemû qulç'a.
Bajar, gunda, nu dibistan bêne rêzê,
Hemû gir, hûr biaxivin zimanê dê.
Goran, soran, zaz û kurmanc bibin kulmek,
Welatê me neyar derxin çâ berazek.
Dê, bav bijîn aza, serbest, bêxem, tirse,
Dengê tanka, bomb, teyare neê, bese.
Dapîr, bapîr tucar mekin zare-zare,
Welatê me timê bibe geş bahare.
Dewran xweşbe, ezet, hurmet derê holê,
Ç'ûk pêş mezne pate bidin, bêjin "belê".
Dayîk lorê bigalînin boy lorika,
Xort keç'ika pîroz bikin gul, kulîlka.
Xwînxwar sihkin, lê em kîne, ci dixwazin,
Ne xwînrêjin, tenê heqê xwe dixwazin.
Axa dayîkê xalî bibe, dewa, doja,
Vî emrîda ez bibînim ewan roja.

WELATÊ DÊ. DIHOKA RENGÎN

Eva helbesta min bin hukumê çûyîna mine li Başûrê Kurdistanê hatye nivîsarê. Wî çaxî 7-8 adarê sala 2014-a Dihokêda forûma helbestvan û nivîskarê kurd derbaz bû, ku pêşkêşî cejna Newrozê kirîbû. Tevî wê dibûn dêlégatê çend welata: Kurdistanê, Türkîaê, Misrê, Ermenîstanê, Qazaxstanê û Lîbiâê. Ji Qazaxstanê ez bûm û endamê Serwêrtya Assosîasîa kurdê Qazaxstanê "Berbang"-ê Evdile Balaêv. 9-12 adarê Hewlêrêda konfîrans derbaz bû, ku pêşkêşî pêşdaçûyîna proza kurda kirîbû. Wextê konfîransê em usa jî rastî Mehemed Evdile, Îsmaîl Slêman, Hesen Slêvanî û yêd mayîn hatin, pevgirêdanê efrandariye qewîn hatine sazkirinê. Em usa jî çûne Barzanê, ser gora mérxasê kurdaye lêgêndar Mistefa Barzanî û kurê wî Îdrîs Barzanî.

Şikir tu dîti, bilind bûm, wek asîman,
Xem-xiyalêñ min bela bûn, idî neman.
Tew xwestinê min qedyane sedî, sed car,
Dewa, doza timê dûrbî, şâ, bextewar.
Paxil veke, te hemêzkin dilê tijî,
Dewran başe, şabe, şabe tev min tu jî.
Dengê bomba, tank, teyara idî tune,
Xwînxwar, xwînrêj lana xweda vemirîne.
Sêwî, sexîr ber derya nakin îskîn,
Dayîk û xûşk boy bav, bira nakin zarân.
Erf û edet, dîlan, cejnêñ te min dîtin,

Egît, mîrxas, pir comerdêne min dîtin.
Ç'ya-banî, seyrangehêne min dîtin,
Qelfe-qelfe nazenînêne min dîtin.
Gora nemir Kek Barzanî min tewafî kir,
Li Hewlîrê, Sulêmanyê firavîn kir.
Zexoê, Şêxanê, Lalişê mîzekir,
Şeqlewaê, Saleddinî temâşekir.
Hesret dilê minda nema, kûr bîn kişand,
Ç'eva bê min ji şabûna hêşir reşand.

* * *

Pêş Rebbê Jor çok vedidim, şikir dikim,
Sondê dixum, xem-keserên bê welêtyê,
Virha şûnva neynim ser zar, gazin mekim,
Heta hebim, nexş-nîgara te bîr mekim.
Dayka delal, bi ken, bi ken min verêke,
Te diqetim, dil-hinavêm xirav meke.



MIROVÊN DINÊ

Werin, qaskî min sihbikin,
Jana gelê xwe qal bikim.
Derdê gelê min girane,
Ne hezare, kulûrane.
Ç'ya, banya girantire,
Behrê bê bin pir kûrtire.
Bê delave, bê kendale,
Jere, mewte, tûje, tele.
Terh vedaye, dixulkule,
Xilaz nabe, tim dikele.
Çiqas diçe, zêde dibe,
Eqara wî fire dibe.
Dıaxive, qet sax nabe,
Min bibihêne, zef şaş nebin.
Rehet rûnêne, cî ranebin,
Çar hewardor mîze bikin.
Ç'ev, guhêne xwe fire vekin,
Hildin qelem, çend belk kaxet,
Gotinê min kivşkin xet-xet,
Mêzîna xwe bileqînin.
Qenc û xirav hevderxînin,
Hindik, gelek himber bikin,
Giran, sivik par-par bikin.
Çend-çend qurne hatne, çûne,
Tel û şirîn, rêç' hîştine.
Şirîn mera par nehatye,
Tel hinavê me sotye.

Pir guhastin hatne dinê,
Xêr û xezne bûne xinê.
Gela barê xwe avîtye,
Barê meî pişta meye.
Bêjim, bêjim, kîjan dewrê
Em hatine ser vê axê.
Me ji wêa hizkirîye,
Wek ruhê xwe xweykirîye.
Xwînxara ew me stendîye,
Ser wê rehet rûniştîye.
Boy nefê xwe kirne çar par,
Dihedimînin, dikan tar-mar.
Em lê bûne bê rusqete,
Sêfil, kole, bê hurmete.
Hebsa bi me tijî dikan,
Derga ser me zexm mor dikan.
Serwêrê me dizêrînin,
Zindanada dirizînin.
Gelê kevnyar me nasnakin,
Şerefa me pêpes dikan.
Dayîk, xûşkên kedkire, rewş,
Hisret mane boy roja geş.
Bûk û zavan cindî, delal,
Nabin xwedîê çit, perde, mal.
Keç' û xorêt kawe, kubar,
Bê sûc diçin ax-berê sar.
Zimanê me yasax kirne,
Hebûna me talan kirne.
Bombêñ jerê dixulqînin,
Ser axa me dicerbînin.

Dengê tanka, ji teyara
Sewiqîne, zarêñ bera.
Em dizêrin, ew kêf dikan,
Zulmê ser me zêde dikan.
Zarê sêwî serê rîa,
Raç'ev dikan hatna bava.
Wê bêñ, wê bêñ, kes nabêje,
Dil-hinavêñ wan dipije.
Çima hûn qet deng-hes nakin,
Zulmê ser me wêda nakin?
Rebb bi zarê xweyî rindik
Timê gotye ev tiverik.
“Bê sûc, gune, kes li kesî
Îzin tune bike pîsî”.
Dîn û isaf weke hevin,
Ne cudane, tim cem hevin.
Dubar, dubar dikim rica,
Hev bijbêrin xirab, qenca.
Boy xatrê wî, Rebbê heq,
Vekin, bêjin kîye neheq.
Cezê neyar zexm bidinê,
Em azabin ji vê zilmê.
Em jî bibin xwedî axe,
Ji dilê me derê daxe.

DAYIK

Qasidê Xwedê qîmetekî
Gelek bilind tera daye.
Timê gotye cinneta heq
Binê pîê daykadaye.
Wekî kesm min ricim meke,
Ne lomîne, ji min pirske,
Ezê bêjim rûê erdê,
Xwedê pêştir Xwedê dayke.
Ji te mestir kesek tune,
Wek te şirîn tu tem tune,
Hemêza te heq cinnete,
Wê evzeldir cinnet tune.



DAYIK, TU WELATI

Tiverkî, hatî jorda,
Hasil bûyî cinnetêda.
Zyaretî, pêpes nabî,
Xezna kûrî, xilaz nabî.

Nûrê hatî hilstiranê
Pêqiş bûyî pê zem-zemê.
Rebb daye te navê daê,
Bilindkirî weke roê.

Tu û welat weke hevin,
Cuda nînin, timê tevin.
Hemû tema şirîntirî,
Nûra ç'eva bahatirî.

Bê ç'ilk, bê telpasîmanî,
Namûs, xîret, zar, zimanî.
Lorik ewil dibê daê,
Dawîê dibê welatê dê.

Tu ku heyî, dinya şêne,
Tu tunenî, dinya şîne.
Rûê erdê qulbe tuyî,
Xwedê pêştir, mezin tuyî.

LÎRÎKA



BEDEWA PIR XWERAZÎ

Zer kezya zû-zû şeke,
Yek-yek bihûn, mehez bike.
Nerm stuê min bialîne,
Of nabêjim, bixinqîne.

Çi cezaî tu bidî min,
Şîv-şekire herdem boy min.
Ew awirêne teye alav
Min werdikin misk û gulav.

Naz-giravyên teye nazik,
Dil-hinavên dikin kizik.
Dilop-dilop tînin xare,
Cî nagirim şûn û ware.

Xwezil, xwezil vî emrîda
Sed yar, sed heyf vê dinêda,
Nebûyayî hogira min,
Te nedîta ev halê min.

Dema hesin min xardikir,
Rojê çend cil li xwe dikir,
Bibûyayî mîvana min,
Têr bidîta kîbûna min.

Nika emir ne ew emre,
Ç'em ne ç'eme, wê dem gure.
Kanî idî miç'iqye,
Erd kizirye, xozan maye.

Dar hişkbûye, belg weşyane,
Gulistanê gul nemane.
Agir çûye, kuç'ik maye,
Taqet tune, beysûs heye.

Minra bibe hevalbende,
Naz-giravya nebe bende.
Lavaîke Rebbê Jore,
Dereng herim gora sare.

HA GULÊ

Ha Gulê, ha Gulê, ha Gulê canê,
Gul-kulîka Kurdistanê.
Biska bade, zulfa şeke,
Xizêm dayne, ç'eva kilke.
Were, were, hîvya teme,
Dîl, bengîê huba teme.

Ha Gulê, ha Gulê, ha Gula zerê,
Gul bedewa tew Hewlêrê.
Xal sûreta min dûr meke,
Bikirçîme, poşman meke.
Were, were, hîvya teme,
Dîl, bengîê huba teme.

Ha Gulê, tu min meêşîne,
Dest û zozan megerîne.
Dem hatye, ne buhure,
Agrê hubê natemire.
Were, were, hîvya teme,
Dîl, bengîê huba teme.

BEDEWA, BEDEWA

Min tu dîtî nav zerya,
Çokêm sistbûn, dilêm hejya.
Pêş ç'evê min bû ronaî,
Zimanê min kir lavaî.

Dimeşayî nazik-nazik,
Dil-hinavêm dibûn kizik.
Kasil-kasil te mîzekir,
Kal ruhê min te tezekir.

Huba te ez kirim sêwî,
Tev min hejyan dar û devî.
Xwezil bibî li min mîvan,
Têr bibînim bejna talyan.

Rebb ricakim dubar, dubar,
Bê te dinê nekim firar.
Ser axa dê pir bimînin,
Gora min te rex hev daynin.

BARANA DEV BAHAR

Hey, barana
Dev baharê,
Geh lêdikî,
Geh vedikî.

Him şil dikî,
Him za dikî.
Bisk, keziên
Delal yarê.

Him dikenî,
Him şadibî,
Ez jî tev te
Firnax dibim.

Zû hêrs dibî,
Zû digirîy,
Ez jî tev te
Pejmûr dibim.

Xwezil, xwezil
Ser awakî
Timê, timê
Tu bimayî.

Ez nolî te
Bibûyama

Dilopekê
Paqij, zelal.

Timê, her car
Danîa ser
Herd sûretên
Cindî yarê.

Kesî pêşya
Min negirta,
Neêşanda,
Ne leqanda.

Ser ç'evêne
Buru hene,
Ne defanda,
Ne hejanda.

Mirazê min
Hasil bûye,
Hesret dilê
Min derketa.

Heta dawyê
Wir bimama,
Emrê şirîn
Dûr nemama.

TU JI GULÊ BEDEWTIRÎ

Sehra sibê hê vebûbû,
Misk û emper quloz dibû.
Digeryam nav daristan,
Mêzedikir hemû qulç'an.
Roê tîrêj neşandibûn,
Ç'ivte-ç'ivte ç'ivîka bûn.
Bilbil nîvcî xew rabûbûn,
Kew hêlîna melisî bûn.
Bakî hênik dilîlîa,
Ref digirtin teyrik-tûya.
Karxezala kale-kal bûn,
Dû makên xwe paşda mabûn.
Tew bînbera zîz bandikir,
Hevdu silav, pîroz dikir.
Gezo îdî nedhat xanê,
Nûr werkirkû şev baranê.
Daristan rewş xemili bû,
Dîdemekê nih vebûbû.
Avya şevê dihat xanê,
Lezdiket boy barkirinê.
Sosin, rihan, qerenfila
Rêzgirtibûn dor sorgula.
Belgên gulaî avî ser,
Eynî nolî lêvên tebûn.

Ew dilopêñ berjêr dibûn,
Tevda, tevda hêsrêñ te bûn.
Xala reşe nav gulêda,
Bedewyêda ç'evêñ te bûn.
Xwest dest bidmê, taqet nekir,
Lê sekinîm, temaşekir.
Dît ew gule, tu jî gulî,
Lê tu ji wê bedewtirî.



WERE CEM MIN

Şev buhurye, ro derketye bejnekê,
Avya şevê koç'barkirye carekê.
Ez, tu mane nav kulîlkên ter-teze,
Bejna zirav xemilye geveze.

Negaret

Were cem min, were cem min, te ban dikim,
Gul-sosina boy te, boy te baq dikim.
“Naêm-naêm”, “naêm-naêm” nebêje,
Dil-hinavêm mehelîne, nepêje.

* * *

Dil kewrekim, meşîne, bese, bes,
Ramûsanek min keremke, ew jî bes,
Şabim, şabim mirazê min bû hasil,
Min dîtye bedeweke xas esil.
Were cem min, were cem min, ban dikim,
Gul-sosina boy te, boy te baq dikim.
“Naêm-naêm”, “naêm-naêm” nebêje,
Hêsrên şewat ser sûreta merêje.

* * *

Xezal çûne, xort derketne nêç'îra,
Kew dikanin, bilbil dûrin hêlîna.
Te dibînim, xuber-xuber dimaşim,
Ez bengîê ç'ev û buryên te reşim.
Were cem min, were cem min, ban dikim,
Gul-sosina boy te, boy te baq dikim.
“Naêm-naêm”, “naêm-naêm” nebêje,
Dil-hinavêm mehelîne, nepêje.



XILAZ NABIM JI MITALA

Roj mitale, şev mitale,
Nabin aga, ne zelale.
Qasekî min dûr nakebin,
Dil, hişê min dernakebin.
Tev min diçin erşê jore,
Fitil, fitil têne jêre.
Telin, jerin mîna mewtê,
Pir şirînin, wek şerbetê.
Digalînin, dilûvînin,
Tawet, sebrê min distînin,
Na edilin, nasitîrin,
Rehet nabin, naseqîrin.
Hespê qule, em swar dibin,
Mikan, mikan peya dibin.
Hemû qulç'a hevdixînin,
Qenc, xirab cem hev datînin.
Geh dibin dost, geh jî neyar,
Him zivistan, him jî bahar.
Dibin derzî, dibin dirêş,
Tînin merez, didin jan, êş.
Îlaç, loxman boy wan tune,
Ez ku heme, ew jî hene.
Berya gotye: "Dûr mitale
Timê dijî wek sed sale".
Ew şûr, qeme kêra tûjin,
Kê hewilîn, wî dikujin.
Bextewar ew kal, ahile,
Wekî dijî bê mitale.

NAZIKA BEDEW

Pejmûr nebe, meke zarî,
Hergav naên şevê tarî.
Him hîv dertê, him stêrkênges,
Tave hîv tê, diçin şev reş.

Wê bênen rojêne eşqe û şâ,
Tavê dayne zozan, deşta.
Dayka kurda kubar-kubar
Wê bimeşe gund û bajar.

Wê ala meye kesk, sor, spî
Binikîne pir bilindcî.
Serxwebûnê elam bike,
Cejna min, te pîroz bike.

Emê destê hev bigrin,
Tew kolanabihêwin.
Hîvî bikin Rebbê Jore
Eme ji hevdu meke dûre.

Ser axa dê, tevî tewa
Bibin xwedyêñ keç'an, lawa.
Xizmet bikin gelê xwera,
Şenkin hemû qulç' û dera.

BEDEW, MILAHÎMÎ, LEL Û DURE

Him kivş dibî, him kivş nabî,
Him şâ dibî, him şâ nabî,
Bêje, bêje, çi qewimye?
Ev çi hale tera hatye?

Bese, bese, hîvya teme,
Lewzek şirîn, bendê teme.
Hergav, herdem tu tev minî,
Dil, mejûêm cuda nînî.

Îdî, îdî nazya meke,
Wek min kesek te hiz nake.
Min nav rinda tu bijartî,
Pir şirînî, him şerbetî.

Hene rojên sivik, giran,
Geh berf dibe, geh baran.
Her rojekê navek heye,
Her demekê temek heye.

Dilê min xwe cuda meke,
Daîna Rebb şikir bike.
Gav, roj sed car temennebe,
Giran rûnê, sivik nebe.

BERFA BÊ DEM HATÎ

Rûê teyî spî, cindî bû,
Te çima ew kire reş?
Xemla teye bêqusûr bû,
Bê dem, pî da ser axa reş.

Ew mîvanê, bê ban ku tê,
Ew bê qedrî, bê qîmete.
Dewrana te buhûrîye,
Ezmanê şîn şêlû meke.

Hemû bînber xew rabûne,
Ruhê wana meêşîne.
Bila heryek bê xof bijî,
Hilde barê xweyî tijî.

Tu mezina çarbiranî,
Ne sivikî, pir giranî.
Şûna xweda rehet rûnê,
Nekeve nav feslên dinê.

Kesekî ne hîvya teye,
Xwe hatî, ew gunê teye.
Deyil, dawa hilde, here,
Îdî paşda venegere.

Wekî şabin darêñ tezî,
Kalî bike her qulç', her cî.

Dema xweda pê xêr were,
Şayê bîne, dem xweş here.
Çiqasî lez ku biliví,
Tuê ewqas me şirîn bî.

* * *

Sibe nû ron bûbû. Ez ji xewa baharêye nolî hingive şirîn
lezo-bezo rabûm, pişta pencera oda xweda rûniştim. Xwest
dilekî birçî tebyeta nû hişyarbûyî mîze bikim. Lê dewsâ qibe-
qiba bilbila, kake-kaka kewa, ç'ivte-ç'ivta hemû teyrik û tuên
xew rabî, min ezmanê şîn nav ewrê reşe tarîda, erdê sêfil nav
berfa spîda dît. Xêleke xurt pejmûr bûm. Û poşman-poşman ev
helbesta nivîsî.

30.03.2015,
Baj.Alma-Ata.



REWAKIRIN



Ezîzê Zîo, zane, hêca,
Bira û hogirê bê himber,
Şêst salya te pîroz be!

Hezar pîroz, rojbûna te, birê delal,
Gel hîzdike lawê xweyî aqil, kemal.
Ç'yakî girî, têy xanê nav ç'yada,
Nabetili, sîê didî çar hêlada.
Êl dibêje: ya Rebb, şikir, şikir tera,
Ev xasmêra, ev comerda te da mera.
Esilzade xweydiye eslê xune,
Rya gelda feda dide ruhê xune.
Heramzade bêşerefe, minafiqe,
Mal, şenîa dihedmîne, qetla dike.
Çiqas cara bêhelandin, bibe kere,
Eqara xwe unda nake zêrê zere.
Boy nefê gel dikişînî timê zehmet,
Qesiryara nîşan didî qedir, qîmet,

Armanca te merivayî, welathizî,
Nav ulumda lehengekî ser evrazî.
Kemala te dîroka me kirye xinê,
Hemû dayîk lawê mîrxas nayînin dinê.
EZ dilekî pir pakijî, him dostanî
Culet dibêm, lawê Zîo, qehremanî.
Zane hêca, şêst sal boy te gele nîne,
Heta sedî pîê xwe zexm bişidîne.
Wekî me jîy, tu sed salî,
Boy wê tu xwe gunekarî.

04.06.2013



*Rewayî kurxalê xweyî qedir baha
Eylazê Mehemedê Ûsivê Biro dikim.*

Esil xasa, xas dikevin,
Rewşê didin gelê xune.
Nolî Şamê vedikevin,
Bilind dikan navê xune.

Her kesîra nabe qismet
Hurmeta gel qazanc bike.
Pir pêwîste hiş, merîfet
Bikaribe xwe xweyke.

Comerd bûne pir girane,
Culet navê nemir tîne.
Dirav, ruh, can qîmetire,
Goştê canî şîrintire.

Tu comerdî, piştovanî,
Qedir baha, ber mîvanî,
Şuxla xêrê paş namînî,
Mal, milkê xwe nahêvşînî.

*Rewayî yek salya Slêmanê Rostemê Hetemâî
piç'ûk dikim.*

Hey, Slêman, Slêman,
Were mala me mîvan.
Ber te daynim av û nan,
Ez heyrana wan ç'evan,
Ez heyrana wan ç'evan.

Em hemû te hizbikin,
Dilê xweda cî bikin.
Bixwe, vexwe pir-hindik,
Bibe xortekî rindik.

Bibe mîrxas, qehreman,
Him şîrbe, him pelewan.
Nemam, nezera dûrbe,
Şirînê dê, bavê be.

Nefê bide gelê xwe,
Bîr meke qet eslê xwe.
Çiqas diçî, bilindbe,
Gel kirinê te şâ bibe.

*Eli, kurê min merivê îtbar,
Tim dûr here ji bêîtbar.*

Heşerîkî nav garanê wî çêtire:
Şuxulê wî tindirûz bû, gur, agire.
Ezim dibê dike lafêن pir xwe razî,
Hebûna wî zikirmewte, dirêş, derzî.
Bê şerm, bê xof, der-dorê xwe mîze dike,
Çi kete ber, dişewtîne, ziqa dike,
Dibê ez vir, li Bexdaê Xelîfê kor,
Xwe dide pêş, nade kesî mecal û dor.
Bê hîm, vala, hewal dide, nahêvşîne,
Bira, viza, ewir-ewir digerîne.
Xênî xirab, tiştek destê wîya naê,
Fitê nadê, ne dayîke, ne jî xaê.
Zû û dereng, kîbûna xwe dide dere,
Berya gotye: "Kerdîmîne timê kere".
Xwedê boy ker xuliqandye palan, şivdar,
Rojê sed car, tûka rûye, lê nake kar.
Xîret, îtbar, ji namûsê gelek dûre,
Ruhda qirêj, ç'evnebare, qelpe, kûre.
Murvêن usanra tu meke hogirîye,
Ew kesen ji wîya dûre, cinetiye.

NÛRÊ XANIM

Zerya rewş, birazya mine delal,
Navê birêm li te bibe sed car helal.
Te emekê min bilind kir wek cewahir,
Welgerande ser zimanê Pûşkînê gir.
Spas, spas, hezar spas dibêm tera,
Rebb oxira teda vêxe şam û ç'ira.
Derengbe jî, bigihîjî mirazê xwe,
Nav şayêda derbaz bikî gav, rojên xwe.
Séfil nebî, nenewgirî, ne binisî,
Timê têrbî, ne kizirî, ne ç'ilmisî.
Bilind bikî serê bavo, apo Barî,
Şerezeî, nazenînî, tevda horî.
Dilpaqijî, aqilbendî, xezna tijî,
Nav emirda dixin leheng dotêñ kurd jî.
Berya gotye: "Tu nîn bide tim nanopêja, yekî zêde,
Rebb bendara hiş, kemalê hekhev nade".
Hinekara behir, kanya zelal dide,
Hinekara dilopeke kêmtir dide.

* * *

Dema min pirtûka xweye Nûra Emerîkê Serdar ji zimanê kurdî welgerandîye zimanê rûsî "Ez û kevokê tenê" dît, bêhed û bêhesav kêfxwêş bûm. Ev helbesta rewayî zehmet û merîfeta wê dota kurde maqûle, destemele, pirzane kir.

16.04.2014
Baj.Alma-Ata

LOXMANA HÊJA

(Rewayî dota qazaxe dilovane, pir mirovhiz
Aşirova Qeregoz Sêyidqasimovaê dikim, kîjan ku boybet
saxlemya min emekê wêñ dilovanîeyî bê quşûre)

Hey can, loxmana, dest sivike, pêcî marmûd,
Nazenîka ç'ev, burî reş, dil bê hudûd.
Pêç'îê xwe ser dilê min bigerîne,
Bê jan kutê, dermanê wê zû bibîne.
Taliqê xwe spartye min nevsâ te,
Şefê bide, bineqşînim nîgara te.
Gelek kirinêñ mine hela nîvcî hene,
Bibe kefil, xilaz bikim, eşq û kene.
Pir merezgir xilaz kirine ji mirinê,
Daye wana emrê şîrin, sewqa dinê.
Vê mereza bê eman min dûr bixîne,
Destêm bigre, ber jîyanê verêxîne.
Gelê minî qencî heze te bîr nake,
Wê navê te dilê xweda tim xweyke.
Paşê bibim ez mîvanê dinya heqe,
Kirnêm bijîn li vê dinya pir neheqe.
Gel sih bike ez kî bûme, boy ci hatme,
Min ji wîra xezne hîştye, paşê çûme.

KEK NADIR, ZANE, EYAN

(Rojbûna te pîrozbe!)

Cîa pêş te xwe mîldikin,
Behir navê xwe bîrdikin.
Bê delavî, bê serbinî,
Kubarya gelê xunî.

Tu ne dehrî, ne jî kanî,
Dehir, kanî dimîç'iqin.
Kana tijî, kûr xezneî,
Kan û xezne narmîç'iqin.

Ulmê xweda bê himberî,
Nav zanada zanê girî.
Lawê kurdi, comerd, mîrxas,
Eslê xweva paQijî, xas.

Rehma Xwedê dayka tera,
Anî dinê, dayî mera.
Te bilindkir na v-dengê me,
Wek xanîyî bo y gelê me.

Armanca te edilayî,
Dinya heye, tu jî heyî.
Vekir sêren ulne tarî,
Pir qedirî cem şayîr Barî.

Stêrka geşe ser navê te,
Li ezmanê ç'ikî zelal,
Wê binse, şewqê bide,
Kurdistana teye delal.

Pîroz, pîroz rojbûna te,
Nemam, nepak dûrbîn ji te.
Heta hebî li vê dinê,
Nav şayêda bibî xinê.
Xem, kederên tel bê wede
Peya nebin ber dergê te.
Tev Helîma xweye cindî
Qut bikî tu sala sedî.

06.01.2015



DAYKA HÊJA – HELÎMA EMO

(Rewayî emir û jiyana dayka kurde pir emekdar, ulmdara
meşûre, zaneye bê himber, xanima ulmdarê eyan Nadirê
Kerem Helîme, xatûna timê enî vekirîye, serbilinde
welatparêz dikim)

Tel û şîrin buhurîne pir rojê te,
Nehatiye guhastinê timtêla te.
Dilê paqij, te Rebbê Jor bawer kirye,
Kêm û zêde, ci şandîye, qebûl kirye.
Şevêن bê xew ser dêmê te rêç' hîştine,
Keda helal por, guliên te spîkirine.
Bapîrada maye pirsa baha, xêre,
“Şêr ku şêre, va ci jine, va ci mère”.
Keda xweva gepek mîra zêdetirî,
Culet dibêm, hezar carî bilindtirî.
Esil xasî, bê ç'ilk digrî nav-dengê xwe,
Boy gelê xwe nahêvşînî ruh, canê xwe.
Dil paqijî, zelal, safî, lafa dûrî,
Ruhê xweva dayîkeke lel-dur, nûrî.
Hindik pesna, ez nabînim layîqê te,
Wekî bi wan bixemlînim nîgara te.
Dilovanî, merhemetî, pir hêcayî,
Milethizî, heyfî, başî, bê hempayî.
Tîmtêlya te, ezet, hurmet, hindik hene,

Erf-edetê gelirîê cem te mane.
Hemû dîtî dîndara te nabin têre,
Ev kemal te bilind dike gelek jore.
Rebbê Jorîn, dubar dikim, hîvî, rica,
Emrê mayî derbazkî tim eşq û şâ.
Helalê te, hemû lawêneye kubar
Bêxem bijîn, serfinyazbin, zef bextewar.
Dergê şâê vekirîbe hergav pêş wan,
Mirina bê dem tucar nabe mîvana wan.
Nav edlêda ruzê wan bê Rebbê Jorîn,
Gav, rojê we nolî hingiv bibin şîrin.



Ahmedê Hepo, biraê minî hêja!

Sed eferim, beranê kelî, zexmî zor,
Li meydanê dîsa dikî ceng û dor.
Helal, helal, şîrê daykê helalbe te,
Te bilindkir nav û dengê tew gelê me.
Qeşav helya, qulç' tijî bûn, ava zelal,
Kulîlk vebûn, behra xweda keda helal.
Welathizê wek te xwezil pir hebin,
Emirda wê kubarya gelê mebin.
Egît, mîrxas, him comerdî, merde mîrî,
Pêş tu kesî netewyayî, cîda şerî.
Emrê bade te nekirye li vê dinê,
Dilê gelda tuê bêy xweykirinê.
Kanya ulmî, têr, tijîyî, vala nînî,
Çiqas qurne bên, herin, tuê bimînî.
Xas mîrara, welleh, heyştê sal hindike.
Ser axa dê, nod jî, sed jî ne geleke,
Pîroz dîkin rojbûna te hezar carî,
Pêş te timê vekirî bin dîwan, derî.
Rebbê Jor te ji nepak, qelpa biparêze,
Çend pirtûkên nû tu dîsa bikî rêze.

* * *

Dema 21.06.2014-ê têlêvîzîona dewleta Azîrbêcanê
derheqa dostê minî nebîrkirî Ahmedê Hepoda sehetekê gelektir
rêportajeke berfireye pir alî da, ez wê demê pir firnaq bûm. Wekî

per û baskên min hebûna, ezê elbêra bifiryama bajarê Bekûê,
minê Ahmed têt-têr maçkira. Û bigota:

- Birê delal, sed eferim tera. Berya şaş negotine: "Mêr
dikevin, tim ji şera şerî derdikevin, tim ji şera". Tu mîrekî serê
sed merîyî.



Eliê Mehemedê Îbo,

Rojbûna te pîrozbe!

Xwezil dubar bigeryana em Çeylaxê,
Berjêrbûna ser kanya bûz bolaxê.
Tasek ava sar vexwara, hêsa bûna,
Me kî dîbû, ew hemûya wira bûna.
Apo Quran zîz bixanda ayet-ayet,
Dayîk Nazê danya sifra tijî nêmet.
Ber her mala bihat xanê govend, dîlan,
Kesk, sor û zer bixemilya tew Arxaşan.
Qelfe-qelfe zerî-domam bimeşyana,
Keç û xorta naz-giravî hev bikrana,
Dengê şivan, bêrîvana nasbihata,
Kevanîê xanim, xatûn şîr bidota.
Kîler, kulîn tijîbûna hasla salê,
Nevîê gir-hûr bilîstana dora malê,
Syar dîsa têketana ceng û lecê,
Kîê ewil bigihîne cî belgîê bûkê.
Hemû dilxaz beravbûna dor sifra te,
Min tevî wan pîrozkira rojbûna te.
Dil bigota: bira, hevtê sal hindike,
Heta nodî, welleh-bille ne geleke.
Ser axa dê emir bikî sedî jortir,
Tevî Zeroxanya xweye helal ked kir.

*Bi dilekî baristan,
Bariê Bala.
01.06.2014.*

TAHIRÊ SLÊMAN

(*Rewayî cejna dehsalya daxuliqandina
rojnema "Diplomat" dikim*)

*Rewşenbirê gelê kurdî pir hêja, bilind qedir û hurmet! Ez
vê cejna keda teye dehsalaye bêqusûre, pir kardar dilekî paqîjî,
hizkirî pir û pir carî pîroz dikim.*

*Ev deh salin bi saya huner û xemxurya te "Diplomat"-ê
şûrekî tûj daye destê xwe. Xwînxar û xwînrêjê gelê me rast û
ç'ep dide ber şûrê xweyî heqîyî bê amin. Ev hunurê her kesî
nîne, wekî nolî te vê rya kaş-kerîme, sirînda bê minet bimeşe.
Şîrê dayîkê te hezar carî helalbe. Xwedê oxira başe, serfinyaz
têxe qismetê te û rojnema te.*

Birê delal, sed car pîroz ev cejna te,
Nevsên nepak dernekevin oxira te.
Ev deh salin boy gelê xwe bûyî karkir,
Her pîşkeke te difire alav, agir.

Agirê te tew agira şewat tire,
Zimanê te şûra, qema zef tûj dide.
Dişewitînî, ker-ker dikî, dihelînî,
Qenc û xirav berî tewa tu dibînî.

Xwînxar, xwînrêj qetilkara ricim dikî,
Ser pir sêrên veşartine tu vedikî.
Gelfiroşa, bê şerefa dikî sosret,
Heta dawîê nehecqînî nabî rihet.

Loma bûyî hizkirê gelê kurde,
Dewa te heq, xwesteka te pakij, rinde.
Rebbê Jorîn, hîvî dikim dubar, dubar,
Ser axa dê aza bigrî binge û war.

Ez dilekî şa xwe tera bigihînim,
“Kurdistan”-a rojnema te biggerînim.
Hêsa bibim, rehet rûnêm, “ox can” bêjim,
Ser neyara kîn, kudreta xwe birêjim.
Bizanibim boy gelê xwe xizmetek kir,
Gel bawerke, nabin bira ne hirç’, ne gur.

Biraê minî delal! Xwezil Xwedê firsendê bide min û te:
em welatê xweyî azadda vê cejnê awazekî gelekî bilind bi navê
dewletê xwe resmî kivş bikin.



BER GORA SEROKÊ NEMIR

(*Rewayî 110-salya rojbûna serokê gelê kurd*
Melle Mustefa Barzanîê nemir dikim)

Tew hatîê bê şik herin,
Gel jimarê naê naskirin.
Wekî naske tew dinê wî,
Gerek hebe serokê wî.

Serok timê naên dinê,
Dur her cî naê dîtinê.
Serok ruhê gelê xune,
Ew tunebe, gel jî tune.

Ez nabînim ewê pesnê,
Bipesinim ez te pê wê.
Boy gelê xwe bûyî ç’ira,
Şemal didî hemû qurna.

Boy azaya kole, qelsa,
Ketî zîndan, ketî hebsa.
Ranezayî ne roj, ne şev,
Xwînxarara ajot doz, dew.

Welatê xwe bûyî dere,
Dît xirabî, xem, kedere.
Xwestina xwe paş nemayî,

Ne westyayî, ne tewyayî.
Lawêñ kurde boke-beran,
Neyarêñ te kirin deran.
Kap kirine stu, xeniqandin,
Bajar, gunda xişikandin.

Rabe, welat mêze bike,
Şikir kurd tew bûn yeke.
Alameye kesk, sor û spî
Dimilmile hemû qulç', cî.

Nêt-meremên teye delal
Bûn rênîşa tew gelê te.
Bin ezmanê ç'ikî, zelal,
Gul vedide welatê te.

Keç'-xortêñ tûnsiz xilifin,
Didin ser te gulêñ rengîn.
Pêş te serê xwe xar dikin,
Merzelê te tewaf dikin.

Kulme axa ser gora te
Tiberk dibim malbeta xwe.
Wekî kurdêñ welête der
Kulîlkê al tim daynin ser.

QADIRÊ KALKO, DELALÊ KALKO

Qadir nevîê minî ewile. Loma jî ez vê helbesta xweye şîretîye, baha qîmete, pir cawdar çawa xelateke nebîrkirî wîra teme dihêlim. Wekî ew nav emirda timê rya raste, bêqezya bide pêşya xwe. Têda serfinyaz bimeşe. Paşerojêda hemû bira û xûşkêñ xweva rêda bide meşandinê. Hurmeta ulm weke hebûna xwe bilind bigre.

LAWO

Ulm behra bê ser-bine,
Bê delave, kendal tune.
Kesê têda nikar here,
Xweyî nake, davê dere.

Rya wîya pîj, sirîne,
Bişiqitê piç'ik-piç'ik,
Dest, pîen te nebin birîn,
Nagihîjî hêla şirîn.

Destpêkê pir diçin dirêj,
Nîv menzîlê diwehimin,
Dikevine rêca qirêj,
Bêşerm dibêñ: zane emin.

NORHANÊ KALKO

Nişa ulm helalîye,
Qet hiznake derew, lafa.
Heta dawîê hogrê teye,
Bikişînî, wekî cefa.

Gelek tezî, pêxas, bê his
Vê behrêda dixuldirin.
Nabin avjen, wek zilek qırş,
Li ser avê hevdizvirin.

Derew, pî digire, lê nameşe,
Armanca wê roja reşe,
Bi ser bine, şame, faşe,
Têda çûyî, zû vedreşe.

Pêxasara nebe hogir,
Behra wane xwîne, agir,
Wê te têxne roja xune,
Tuê bibî nolî wane.

Timê bigre rya raste,
Rast livyayî qet naweste.
Nekeve nav kola, koca,
Tu xêr naê ji bedesla.

Şikir bûy tu sê salî,
Hêdî, hêdî dibî hilî.
Her roj, şevez kemaleke,
Birê ç'ûkî, nesya meke.

Hemû salên virha ku bêñ,
Bila bêxof, eşq û şâ bêñ.
Jan û êşan dûrbî, dûrbî,
Pisporekî, şereze bî.

Dê, bav te tim şâ bibînin,
Letoş, Qadir bihebînin.
Ez jî destê te bigrim,
Ber dibistan biêwirim.

Esman ser te vekirîbe,
Bê top, gulle, ç'îk, sayîbe.
Ser axa dê emir bikî,
War, warkoza li wir çêkî.

MEDÎNA KALKO

(Rewayî rojbûna nevya xweye rindik
Medîna piç'ûk dikim)

Şikir heyşt sal te qutkirin,
Salên şirîn verêkirin.
Pî datînî sala neha,
Êşik, ûşka dûrbî virha.

Şa, bextewar mezin bibî,
Şîrin, şerbet, tem hingiv bî.
Neç'ilmisi qet tu cara,
Bibî xûşka çend, çend bira.

Hemû dersa pênc bistînî,
Heval, hogra piş nemînî.
Navê te li textê pesna
Bê nivîsar fêza tewa.

Kalko şabe boy torê te,
Maçke sûret û ç'evê te.
Timê firq bî ji hevala,
Şemal bidî nolî ç'ira.

14.10.2013

CELÎLÊ PIÇ'ÛK

(Rewayî yek salya rojbûna Celîlê Qadirê Evdileyî rindik
dikim, kîjan ku navê mamê wîyî gêrlî Celîl (kod navê wî
Zagrose) lê kirye)

Mezin bibe, Celîlê mîr,
Bibe zilamekî wek şîr.
Nav-dengê xwe bilind bike,
Dê-bavê xwe tim şâ bike.

Jan, êş, qezya dûrbin ji te,
Gel kubarbe boy kurkê te,
Sed eferim, tera bêje,
Tu wî, ew te qet navêje.

Lawo, dinya tîpan nîne,
Navê kîye te danîne,
Hene gelek gelî, Keraş,
Boy gelê xwe tim here pêş.

Wî navî tu bilind bike,
Zyarete, nizim meke.
Ew şervanê azaêye,
Qendîl, Zapê gêrlaye.

Dema welat bibe aza,
Wê bê têr-têr maç'bike te.
Boy xweyîkî axa aza,
Wê tivinga xwe bide te.

FARÎZ FORTÛNA

Nema mine pîrozbayê stranbêjê ciwanî, pir merîfet
Farîz Fortûnaê şîrîn awazra:

“Farîz, hizkiriê dê û bavê xweyî şirînî delal! Min van paşwextya rojnema “Jîyana kurd”-da wêneê te dît. Wêderê usa jî gotar derheqa teda hatibû nivîsarê. Min bi hewaskarîke mezin xwend. Rastî néteke pir hîvî, homit dayî hatim. Gotarvan culetekî bê xofi, dilovan dinivîse: “Şikir, şikir, îdî Tarkan, Rûsso û Sosoê me jî heye”. Wê demê erş û kursî tîra şabûna min nekir. Çendekî şûnva min têlêvîzîona dewleta Qazaxstanêda klîpêñ te jî dîtin. Ez jî culetekî bawerkirî hatime ser nîta gotarvane cîda kivşkirî. Lema min şabûna ev helbesta rewayî kemala teye pir merîfet kir. Bira Rebbê Jorîn vê oxirêda sehet, qewet û saxlemya bê qezya hergav têxe qismetê te. Xortêna mîna teye navê gel bilindkirî mera pir pêwîstin. Xwezil ev awazê te bigihîje ezmanê Kurdistana meye azaye, delal, bibe kubarya her kurdekî şerefî, namûsî, pir welathiz.

Bi hurmeteke hêjaye, bê ç’ilk,

Bariê Bala, 30.10.2013”.

“ŞIKIR, ŞIKIR, FARIZ FORTÛNAÊ ME JÎ HEYE”

Dengî xweşbe, xortê delal,
Av vexwarye kanya zelal.
Loma dengê te zengile,
Dertê ji kûraya dile.
Xezna gelê te tijîye,
Çi bixwazî têda heye.
Şax-şaxîye, cewahire,
Tiverike, lel û dure.
Wî awazî Evdalê kal,
Qulingara bûye heval.
Îsa, Arif, Kawûs axa,
Hej xistine zera, şaxa.
Şayîr Mecît tev Sîsa Hûr
Ban kirine Başûr, Bakûr.
“Kurdistana me zeynete,
Xêre, xezne, berekete”.
Eşîşanê, Meyremxanê,
Canê, Besê, Gulistanê,
Gîhandine pakî dinê
Zelûlia Kurdistanê.
Dema Şivan dike qîrîn,
Dilê neyar dibe birîn.
Diricife, xwe şaş dike,
Destê dayka kurd maç dike.
Kawe, Dîyar, Xelîl Xemgîn,

Fehrat, Armanc, Beyto, Bengîn,
Şemdîn, Kazo, pirê hêja
Ders dane te, wan lehenga.
Egît, mîrxas, şêr, pilinga,
Loma ketî zara, dila,
Pir qedî cem Barîê Bala,
Bilind, bilind awaza te.
EZ heyrana wî dengê te,
Xwezil, xwezil awaza te
Bigihîje welatê me,
Tew malada, her şenyada.
Bê pesnandin kemala te
Xwedê mera bide nisret,
Rojên aza, sehet, qewet.
Em tev herin welatê dê,
Têr bibînin wê cinnetê.
Tu eşq û şâ bilîlinî,
Dil-hinava bihelînî.
EZ helbestên xwe bixwînim,
Hesret dilê xwe derxînim.
Dilê min, te hêsa bibe,
Xelata me boy gel ev be.

MÊVANÊN DELAL

(Dema 2012-ê salê, cotmeha hezîranê, ji Herêma
Kurdistana aza helbestvan Kek Hesen Slêvanî, Sulêman
Îsmaîl Sulêman û jûrnalist Evdile Selam Salih bûne
mêvanê Rêspûblîka Qazaxstanê, ew usa jî bûne mêvanê
me, kurdên, ku Qazaxstanê dijîn. Min ev helbesta wê
demê rewayî wan kir.)

Hûn xêr hatin, delalên me,
Pê-parê we ser ç'evêne me.
Eme zûda hîvya we bûn,
Qeşav helya, derge vebûn.

Werin, ez we têr-têr maçkim,
Pêş we bejna xwe xar bikim.
Bîna welêt we bistînim,
Rebbê Jorîn şikir bînim.

Jan û êşen me hesyaye,
Ev hetevî mera daye.
Rîen dirêj tew kin bûne,
Ewrêñ tarî bêla bûne.

Bila dubar wêre rehmê,
Tew kurd xilaz bibin zulmê.
Neyarêñ har bênen ser heqyê,
Welatê me náske dinê.

ÇARXET



Eman, destê vê merezê
Ruhê min xar vê merezê.
Lokmanekî baş ku hebe,
Wê min dûrxe vê merezê.

* * *

Xwîna bilind bûye bela,
Min dûr naçe ez teşqela.
Wededa min ç'ar bikira,
Zêde nedibû eva kula.

* * *

Xwedê rehmî, bê qîl, qale,
Bê şirîkî, bê hevale.
Wekî xwe jê dûr bigrî,
Nabî xwedî ewled, male.

* * *

Delalê min hatî, cûn,
Kesek nema, hemû cûn.
Kê boy gelê xwe kar kir,
Tenê ew man, ew neçûn.

* * *

Hemda Xwedê pir fireye,
Ew şihedê gunê teye.
Rya xirab venegerî,
Dawîê nîbe, xudyê teye.

* * *

Zulm pî digre, lê nameşe,
Behra wêa roja reşe.
Kesê ku rêda diçe,
Dawîê timê vedireşe.

* * *

Gelekê me bûne padşa,
Wek erş-kursî em bûne şâ.
Ça rûniştin li ser texte,
Me reşkirin, rozgar, bexte.

* * *

Dinya, hemû te ewirîn,
Lez û dereng çûn, buhurîn.
Kesê keda heram xwarin,
Zû ç'irûsîn, zû temirîn.

* * *

Kê cot mekir, erd mekola,
Dem derbazkir vik û vala,
Ew nagre qedrê nîne,
Birçî, tezî tim dimîne.

* * *

Zane xemla gelê xune,
Wekîlekî pir mezine,
Ew gelê ku bê zaneye
Nav gelada ew tuneye.

* * *

Rewşa ç'ya berf, barane,
Hebûna gel erf, zimane,
Ziman şîrê dayîkêye,
Dayî, sendî yek xudaye.

* * *

Kaltî, pîrtî ferze, heqe,
Ç'ya cîê xwe naleqe,
Hemû gemar têne xanê,
Kengê berf ku difeliqe.

* * *

Delalê min, vê rêda
Yar tim diçû, vê rêda,
Herdu ç'evêm qerimîn,
Îdî naçe vê rêda.



ZERDEŞTÊ KAL

(Poêma)



ÎDÎ RABE

Xwendevanên delale, pir hêja! Ez bi dilekî kulî, kovanî, melûlî û pir perîşan dixwazim derbara xêlek bûyerên, ku nikaye vê dinya bê serobine, pir fireda bûne para gelê min, kîjan ku nelayîqî hemû rabûn, rûniştandin û xwestinên mirovaêne nikane, bi zimanê poêzîaêî nazikva wera hûr gilî qal bikim. Lê ez îlaca redbûna wan bûyerên, ku gelê min heya nika pê dizêre, tenê û tenê dubar zindîbûna hizkirîê Xwedêî pir qedrî, nebîrkirî Zerdeştê Kalî Nûranîda dibînim. Wekî ew bi rusqeta Rebbê Jor dubar ji gora sar rabe, rûdana xweye mînanî berfa yek şevêye paqije, bê telpe, çîle spî ji axa sar daweşîne, pêş Rebbê Jor çok vede. Dilekî melûlî, pejmûr jê hezar-hezar carî hîvî û rica bike, wekî Xwedê Mezin hinekî rica wî qebûl bike, gelê wîyî koleyi, bê piştovan bê rehmê, axa gelê wî ji gemar û qirêja neyarêñ devxwîn aza bike. Kurd jî bibe xwedîê axa xweye dîrokîye, dewlemend.

BEŞA YEKÊ

Rabe, rabe, Zerdeştê Kal,
Mêze bike vê dinya qal.
Ew dinya dîtye te,
Lê ci dibe pey çûna te.

Niheq heqyê dixenqîne,
Nav êgirda dihelîne.
Îsaf, murwet pir kêm mane,
Şeref ketye bin pîane.

Qetil roj-roj zêde dibin,
Dergêñ xêra qet venabin.
Xwînrêj bûye hukumdare,
Reh davêje ç'ep û xare.

Dirav ulim kirye sîê,
Kesek xwedîê lê dernaê.
Xirav girtye şûna xune,
Qenc mirye, deng jê tune.

Dizî bûye erf-edete,
Qavtî bûye pir hurmete.
Nekir dîkin sewqê, kîfê,
Karkir birçî diçin dinê.

Ç'ûk rûdinêñ destê jore,
Mezinara nadin dore.

Diaxivin bê sî, sewe,
Şev, roj kirine nolî heve.

Rastî dike zare-zare,
Ne pî davê, ne jî zare.
Fêla dike hingavtîe,
Bê xof dijîn, tirs nemaye.

Nîvî pirtir murvê dinê,
Boy parî nan dibin finê.
Kes pirsnake halê wana,
Jan û êşa, derdê wana.

Kanêñ Xwedê daye benda,
Xercdikin boy kêfa, rinda.
Qismekî jî dikine ç'ek,
Pê dirêjin xwîna neheq.

Însaf yek selefek nîne,
Bira birê dixapîne.
Beravdike lep û dure,
Zil lê dibe çewal, têre.

Dinya ketye nav qezyaê,
Dike-nake, bin dernaê.
Wekî wabe, armanc ferze,
Wê şûna xwe biguhêze.

Qeyde, qanûn hindik mane,
Merhemetî tu cî tune.

Durûtîê penc vedaye,
Ne tu, ezim zêde bûye.

Xwînxar bûye fermandare,
Agir, ala jê dibare.
Boy xêra xwe çerxa dinê
Difetlîne ç'ep û xare.

Bawerkirin bûye zilek,
Şert û şirût bûne kelek.
Pismamî hatye hildanê,
Dost, hogirtî naêñ xanê.

Vîjdan bûye kor, ker, lale,
Maye bê cî him bê male.
Bike bîra şeve reşda,
Bê dem dike nale-nale.

Rast, helalî bûne hinek,
Kefîlnevî maye hevek.
Boy wê tu kes fikir nake,
Hukumdayî bûye ç'eke.

Laf, rezîlî, derew û vir
Rûniştine fêza lel, dur.
Dengê wan bomba zeximtire,
Top û gulla zef qewatire.

Li ku dibin, ew mîvane,
Bahar dibin, zivistane.

War, şênya dikin wêran,
Qîrîn diçin ersê-ezman.

Decal, fêlbaz tev rabûne,
Dinya nav xwe par kirine.
Heryek hukmek dimeşîne,
Pî davêjî, herder xwîne.

Rebbê Jorîn kes natirse,
Kî çi dike, kes napirse.
Şeveqbûne şevereşe,
Rya herda kes nameşe.

BEŞA DUDA

Kesek halê me pirs nake,
Neyarê me ceza nake.

* * *

Zorê kirin em musulman,
Derî, rê, dirb pêş me dadan.
Dawyê tew bûn birê heve,
Em ji nav xwe kirin dere.

Kenyan, gotin: ev gel kîye,
Ku xuliqye, ku hatîye?
Dîroka me reş, heş kirin,
Şewitandin, bin ax kirin.

Kî cî rabû, bû gurê har,
Dewsa avê xwîna me xar.
Dilê meda şûr kûr ç'ikand,
Gir tew kuştin, hûr welgerand.

Bira kujî kire nav me,
Rya xirab danî pêş me.
Em ji hevdu cuda kirin,
“Ev gel tune” elam kirin.

Kîbûna xwe me bîr avît,
Bûn neyarê gelê xune.
Gulla ewil ser wî avît,
Dest xirabkir mala xune.

Hiş, mejûê me derxistin,
Mejûê xwe danîn dewsê.
Herdu ç’evêne me derxistin,
Ç’evêne xwe zû danîn dewsê.

Em xapandin, kor, ker kirin,
Welatê me tîş-tîş kirin.
Loma îro hemû dera
Kurd lê bûne gelek para.

Ereb dibêñ: “Hûn erebin”,
Fariz dibêñ: “Esil farizin”,
Tirk jî dibêñ: “Tirkê xasin”,
Kîbûna me me napirsin.

Me undakir welatê xwe,
Bûne dîlê ber deryaye.
Mêvan mane ser axa me,
Dil-hinavêñ me helya.

Etles, qumaş me hazir kir,
Ji me stendin, wana xwe kir.
Hebûn birin, welat rût ma,
Gel bê sitar ser rîa ma.

Belengazî mera anîn,
Agir, alav ser me danîn.
Em dizêrin, bes nabêje,
Roj, şev xwîna me dirêje.

Em bûn sexîr, ew têr dewlet,
Em bûn feqîr, wî girt dewet.
Av me anî, ewî vexwar,
Em bûn bedbext, ew bextewar.

Em ç'ilmisîn, ew beridî,
Me birc çêkir, ew bû xwedî.
Me ked hed rêt, mane peya,
Wî kêr nekir, firî hewa.

Erd me kola, wî mêzekir,
Me xwîdan rêt, wî kîf sewd kir.
Tim zêdekir navê hepsa,
Em avitnê, derî dada.

Gul me çandin, tim wî bînkir,
Ç'ek da me, got: "Hevdu qutkir".
Nift me derxist, wî neft hilda,
Şabû, def û zurne lêda.

Dar me ç'ikand, wî behre xar,
Zik mezin kir, bû gurê har.
Rê me kişand, ew têda çû,
Me pir kasil nihêri dû.

Welatê me bû goristan,
War û şenî kirin wêran.
Ah, zarê me naçe kesî,
Kesek li me nabe xwedî.

Me dikujin, em gunekar,
Qetla dikan, em qetilkar.
Ser axa me dikan bazar,
Vê rezilyê kes nabîne.

Erş û kursî dişewtînin,
Bombê jerê dibarînin.
Part-part dibin cinyazê me,
Ceza nadne xwînxarê me.

Rebbê Jor bû dostê tewa,
Gi xilazbûn doz û dewa.
Navê me tê, deng jê naê,
Pî, gavekê ber me naê.

FOLKLOR (7 BÜYER)



Berê xwe me guhastine,
Nabê, nabê "ev gel kîye?"
Şeveqên me bûne tarî,
Me dûr naçe ev hejarî.

Gelek qurne hatin û çûn,
Zulma serme kuta nebû.
Hemû dergên girtî vebûn,
Dergek pêş me qet vene bû.

Ya Zerdeşte pir Nûranî,
Rabe, ji Rebb bike hîvî.
Dubar, dubar veke zare,
Jê ricake hezar care.

Ezmanê me zelal bike,
Neyarêne me qutke, redke.
Em heqê xwe bibin xwedî,
Xirab bimre, bijî rastî.

* * *

Gelî dosta, janêm pirin,
Hezar nînin, çend kulûrin.
Ez van jana kêra bêjim,
Weca dilê xwe çaw... birêjim?

BÜYERA YEKÊ

AXA Ü XULAM

Rokê axê pir xwe razî
Xulamê xwe dike gazî.
Dibê: "Karê sibê bike,
Nolî hercar hespê zînke,
Oxira me xêlek dûre.
Boy xwe nan, av têxe tûre,
Şeveqê ber derê minbe,
Bisekine, hîvya minbe".
Xulam serê xwe mîl dike,
Qirkê êvraz belê dike.
Ew ranazê ewê şevê,
Dibe hogrê stêrka hîvê.
Şev li wîa dike yek sal,
Gelek dereng dibe zelal.
Berî banê dîkê sibê

Zîn datîne pişta hespê.
 Disekine ber dergê wî,
 Raç'av dike hatina wî.
 Dereng dertê axê dire,
 Diqore pir qure-qure.
 Bilind dike qîrîn, qûjîn,
 Wek sekî dir dike mirîn.
 Emir dike: "Hespê bîne,
 Dizgînê wê bikişîne.
 Xurckê dayne ser milê xwe,
 Qet bîr meke kîbûna xwe.
 Ber pîê xwe rind mîzeke,
 Menzîl dûre, zû-zû gavke".
 Diçin, diçin, rê red nabe,
 Axa hespê peya nabe.
 Tarî erdê ku hildçine,
 Peşa dibe ew ji zîne.
 Dibê: "Bese, ez westyame,
 Ser hespê pir leqiyame.
 Belkî hinek hêsa bibim,
 Sibê ser zîn xwe bigrim.
 Ezê razêm, tu hişyarbe,
 Ç'evê teyî li hespê be.
 Binihêre tew der-dora,
 Îtbar tune diza, gura".
 Xulam hespê ditewlîne,
 Ber zînda xwe ditelîne.
 Berî axê diçe xewê,
 Bîrê dertê gotina axê.
 Qasek şûnva hişyar dibe,
 Berbi hespê lez direve.

Hespê cîda ew nabîne,
 Nake gazî, ne qîrîne.
 Vedigere dîsa ber zîn,
 Zikê birçî dike qurîn.
 Pakî şevê çûnê şûnva,
 Axa nîvcî, nav xewêda,
 Xulam bilind, hêrs ban dike,
 Pirsa hespê ji wî dike.
 Xulam nava xof, tîrsêda,
 "Hesp cîdaye, - dibêjêda.-
 Ez ku heme, arxayînbe,
 Kes nikare hespê bibe.
 Rehet razê, fikra meke,
 Teyr nikare min nukulke".
 Tevzî feqîr dixenqînin,
 Dora axê dibin, tînin.
 Ber xurcê xwe diqiflîne,
 Zîn hildide, xurc dimîne.
 Dibê: "Sibê min xurc hilda,
 Zînê ese bimîn cîda.
 Axa hespê ku nabîne,
 Wê serê min hilqetîne.
 Wê laşê min bin ax bike,
 Kevir, kuç'ka ser min komke".
 Xêlek şûnva dîsa axa
 Hêrs radibe ser herd pîa.
 Herd ç'evê xwe mehez dike,
 Dîsa pirsa hespê dike.
 Xulam dibê: "Rehet razê,
 Mefikire seva hespê".
 Axa dubar dike xurîn,

Vedileze mîna heywîn.
 Valî-walî xwe bordike,
 Dest û pîen xwe badike.
 Zexim dike ire-ir,
 Wek hirç'ekî nêrî hure.
 Hindik dibe sibe ronbe,
 Axa dîsa xew radibe.
 Dibîne xûlam telyaye,
 Büye gulok qiflîye.
 Ça qareqît nalipite,
 Tenê dike qurte-qurte.
 Sert dipirse: "Çi qewimye?
 Ew çi kule tera hatye?
 Rabe, hespê zîn, basûdke,
 Xurckê hilde, hereketke".
 Xulam wî tirs mîze dike,
 Hêdî serê xwe badike.
 Dibê: "Ez ku xurckê hildim,
 Lê zîn, gemê kêra bidim?"
 Axa dubar dihurmute,
 Ew dimîne wî bikuje.
 Emir dike: "Hespê bîne,
 Teng, basûda bişidîne,
 Oxira me gelek dûre,
 Rya me tew xişrê hûre".
 Xulam serê xwe badike,
 Kasil, kasil elam dike.
 Dibê: "Axa, biborîne,
 Dizî zûda hesp birine".
 Axa îdî cunu dibe,
 Zexm diqîre, îdî radibe.

Dibê: "Ew çi hewaldine,
 Ecel rabe ser pîane.
 Hespê bîne, zû-zû zînke,
 Xurckê hilde, destbi rêke".
 Xulam li wî mîze dike,
 Difirfite, xwe badike.
 Ji wî zexmtir dike qîrîn,
 Nolî şera dike nirîn.
 Tûr hildide, dikeve rê,
 Nanihêrî rûê axê.
 Venagere rya hatî,
 Zîn, xurcikê davê ser wî.
 Axa zîz sert wî badike,
 Qema zîvîn lê werdike.
 Xulam fîkrê nadî wîa,
 Rê dide ber gava, pîa.
 Têlmaş dibe perîşane,
 Hêrs rûdinê ser çokane.
 Zîn, xurcikê dinihêre,
 Nizane wan çâ hilgire.
 Zîn hildide, xurc dimîne,
 Xurc hildide, zîn dimîne.
 Ber xwe, pêş xwe reş dibîne,
 Binefişka hildikşîne.
 Zîn, xurcikê hildigire,
 Xwe şaş dike, kalî here...

Berya gotye:
 "Kî çi diçîne, wî diçîne,
 Dawîê cezê xwe distîne".

BÛYERA DUDA

"HEQ HEYE, DÎWAN TUNE"

Qalkir ferih wa qal dike,
Vê bûyerê zelal dike.
Hebûne du kurkên hempa,
Bûne hogrên roja, şeva.
Nexwarine bê hev av, nan,
Tewa xwezî anye wan.
Herdu bava, herd dayîka,
Cil kirfîne boy herd kurka.
Tev xwarine, tev razane,
Gavek hevdu dûr nemane.
Roj, meh diçin, sal pir dibin,
Herd weke hev givre dibin.
Digihîjne rû, simêla,
Dinihêrin hemû hêla.
Cilê xwe zû diguhêrin,
Qenc û xirav hev dijbêrin.
Dîlan, cejna xwe nadin paş,
Nav derdixin ça xortên baş.
Sergovendê nadin kesî,
Mêze dikin keç'a dizî.
Kubar, kubar êmin dibêن,
Sera xwe kesîra nabêن.
Keç'a dibînin nav êlêda,

Dîlan dikin rojekêda.
Sal dû hevdu zû difirin,
Zarok zû-zû zêde dibin.
Kesîbtî wan zor dike,
Têr nabînin nanê zike.
Herd rojekê mînanî bira
Dibêن: "Em herin ji vira.
Belkî parî nan qazanckin,
Zarokê xwe pê givirkin".
Rojekê ew zû bin şevê,
Tevî hevdu dikevne rê.
Gelek diçin, hindik diçin,
Hev naqetin, tehev diçin.
Pir rojêن ba, berfen, tarî
Ji emrê xwe dikin zarî.
Dertêن ser du rîen cuda,
Dikewgirin halê xweda.
Welêt dibin gelek dûre,
Parîe dawîê derdixin tûre.
Nîvî dikin, tehev duxun,
Dest hevduda wa sond duxun,
Wekî nemrin, sax bimînin,
Ew vê sondê biqedînin.
Deh sal şûnva vê rojêda,
Vê mehêda, vê demêda,
Vira hevdu raç'av bikin,
Çi anîne hev nîvîkin.
Paşê herin nav êla xwe,
Bilind bigrin tim serê xwe.
Her yek rêkê diborîne,

Boynet parî nan bibîne.
Yek dimeşe ber Başûre,
Yê din diçe ber Bakûre.
Herhek diçe wenatekî,
Wir bibîne şuxulekî.
Dema ber mal ku vegeerin,
Xîret, namûs cot bigerin.
Heryek xwera cîk dibîne,
Çi dişuxule, wî distîne.
Yek kara xwe berav dike,
Meha, sala hesav dike.
Hindik dixwe, kêm rûdinê,
Ruh, canê xwe dike finê.
Berav dike xêle zêre,
Diran diçin, pişt lê xare.
Bejna taylan unda dike,
Şiklekî nuh li xwe dike.
Boy zarê xwe ax, of dike,
Çi distîne, berav dike.
Yê din kêm-kêm dişuxule,
Nasekine, naedile.
Zû bîr dike boy çi hatye,
Çima welêt dûr ketîye.
Çi kar dike, tewî duxwe,
Diberide, dinepixe.
Xirabara dibe hogir,
Jê dibare alav, agir.
Kêf û sewdê paş namîne,
Qenc û xirab nahêvşîne.
Meh, sal diçin, dem idî tê,

Emrê çûyî paşda naê.
Hişyar dibe, tûrî vala,
Dikeve nav kûr mitala.
Xwe dihese, dem hatîe,
Gerek sondê bîne cîe.
Bixaz, nexaz, dertê ser rê,
Bigihîje şûna sondê.
Şeva, roja rê gav dike,
Bona sonda xwe heq bike.
Yê dinê jî dikeve rê,
Lez, bez diçe şûna sondê.
Hemîn rojê, hemîn demê,
Fedî nakin surê, sermê.
Cîe sondê hev dibînin,
Hêsrên şewat dîbarînin.
Xêlek şûnva dostê yekê
Keda xwe datîne ortê.
Dibê: “Birak, tu jî bîne,
Qirar yeke, dudu nîne.
Em keda xwe tevhev bikin,
Paşê hevdu nîvî bikin.
Serfinyaz herin welatê xwe,
Bilind bikin nav, dengê xwe.
Dostjîa xwe dubar bikin,
Rehet, kubar emir bikin”.
Xayîn li wî mêze dike,
Diranê xwe sipî dike.
Dibê: “Dostêm, biborîne,
Dostaêda êtiv nîne.
Welleh, min çi kar kirîye,

Berav nekiryе, tew xwarye.
 Kêf û sewqê dûr nemame,
 Wext, wedeê te temame.
 Ezê te vir kormendîkim,
 Tûr, berîka xwe tijîkim.
 Dîsa bikim kêfa xune,
 Mezin bikim zarê xune.
 Pirsing, bêjim: min nedîtye,
 Ez nizanim kalî çûye".
 Heval ji wî rica dike,
 Dibê: "Keda min nîvîke.
 Nîvî tera, nîvî minra,
 Dîsa bijîn nolî bira".
 Qayîl nabe vê gotinê,
 Dibê: "Îtbar tune dinê.
 Tuê welêt min rusakî,
 Tewî destê min xilazkî.
 Mirine goh seqirye,
 Kedkira ked nexwarye".
 Feqîr digrî, dike zarî,
 Dubar, dubar dike hîvî.
 Lavaî wî qet kar nakin,
 Dilê kevir qet nerm nakin.
 Xayîn Xwedê fêdî nake,
 Gotina xwe cî-cî dike.
 Laşê wîa davê ser rê,
 Berbi welêt dikeve rê.
 Digihîje nav êla xwe,
 Zû pirs dike hogirê xwe.
 Hemû dibê: "Nehatîe,

Kes nizane ew li kuye".
 Xêlek digrî, ax, of dike,
 Pêş zarêne wê xwe mîl dike.
 Dibê: "Rya me cuda bû,
 Qet nizanim, ew kuda çû.
 Dema qetyan em ji heve,
 Kasil-kasil gotem eve.
 Dema ji mal ez bûm dere,
 Jina min da ev xebere.
 Got: mîro, ez duhalyame,
 Wê zêdebe zarokê me.
 Min sparte: ewê zarê
 Bilind bigre tim qedrê wê.
 Boy navê we lez mekeve,
 Xwedê daye, bila hebe.
 Min ku anî risqê wîye,
 Ezê daynim navê wîye.
 Rica dikim, tu bêje wê:
 A, va dayne navê zarê.
 "Heq heye, dîwan tune".
 Biqedîne gotina mine".

* * *

Rojeke xweş, roja Xwedê
 Padşa, wezîr dertêne rê.
 Welêt digerin çendekî,
 Tev bimînin herd li cîkî.
 Dema ew dikevin gunde,
 Dêk ban dike kurkê rinde:

“Ay, heq heye, dîwan tune,
 Ay, heq heye, dîwan tune,
 Îdî were, hîvya teme.
 Ez qurbana navê teme,
 Ne xwarina te sar dibe,
 Wê lîstikê îdî berde”.
 Padşa dibhê ku wî dengî,
 Wezîrê xwe dike gazî.
 Dibê: “Hînbe, ew dê kîye,
 Kê ew nava wî danîye.
 Wê zû bîne tu cem mine,
 Biqedîne emrê mine”.
 Wezîr daykê zû dibîne,
 Emrê padşê diqedîne.
 Padşa daykê qebûl dike,
 Mena nav ji wê pirs dike.
 Dayîk vê bûyera mezin
 Diaxive bi serobin.
 Padşa rehet wê dibihê,
 Şaş dimîne li vê qehpê.
 Emir dike xayîn bînin,
 Stuê wîya hilqetînin.
 Bê hed, hesab tê xezevê,
 Malbeta wî naê rehmê.
 Heqê sêwya jê distîne,
 Welatê xwe dûr dixîne.
 Tewî dide dayîka jare,
 Dibê: “Meke ah û zare.
 Li heqê xwe bibe xudan,
 Xayînara tune îmkan.

Qet bîr meke vê kelamê,
 Şikê meyne kirnê Xwedê.
 Xêr û guna ew dikşîne,
 Par, par dike, hê dimîne.
 “Heq heye, dîwan heye”,
 Hinek zû, derengî heye.
 Zulum bê caw qet namîne,
 Herkes cezê xwe dikşîne.
 Kî çi dike, li xwe dike,
 Axê ser xwe elek dike.
 Şuxulê qelpa nagre pîê,
 Dawî timê paşmanîê.



BÛYERA SISYA

PADŞA KUR AZA DIKE,
DAYKA MELHÛM DARDA DIKE

Welatekî dûrî ç'eva,
Hinek şenî, hinek ava,
Deşt, zozanêñ wê pir bûne,
Kanîê wê sar av bûne.
Daristana tehr vedaye,
Xuşe-xuşa dehra bûye,
Bilbil gula çûne gula,
Bilind bûye dengê kewa.
Murvîn wîe kedhiz bûne,
Dilovane, şeref bûne.
Li wir jîye dêke osin,
Hevsûdîye, pir dûr pesin.
Der-cînara kar kirye,
Ew şêmîkê dûr meçûye.
Dû hemûya hewaldaye,
Fil xirabe, kîn, rik bûye.
Ç'evnebare, pir derewbêj,
Kotî, pintî, dilva qirêj.
Tûrî tijî vir, viz bûne,
Dîtî ji wê cuda çûne.
Kesî ji wê hiznekirye,
Dergê wêa venekirye.

Nekirye pirs-hewale,
Nehîştine bikev male.
Derdê wê mîr zû rîkirye,
Hîvya dergûşekî maye.
Dergûş dibe ku deh sale,
Agir, alav jê dibare.
Tore, telîm bê par bûye,
Dê ci rîtye, ew hildaye.
Hevalara tim şer kirye,
Kîn, kudretî, xezev bûye.
Dema pozxwîn hatye male,
Kolanêda bûye qale.
Dest xar kirye bêrîka xwe,
Dizî kirye pêşekê xwe.
Ewil hêkek anye male,
Dê xweş hatye ev ewhale.
Cî rabûye, kur maç kirye,
Gotye: “Kurêm, sed eferim,
Timê bibe destmikerim.
Vê rê baştir rê tunene,
Birçî mehel dayîka xune”.
Çend roj şûnva kurê tolaz
Dikeve mal gelek kêfsaz.
Mirîşkekê derdixîne,
Dê bextewar xwe dibîne.
Dîsa wî gerî hemêz dike,
Tivdarekê xurek dike.
Temê şîrîn têr-têr duxun,
Serda tasek av veduxun.
Cînara zik dive avê,

Tew nepetyê tînine dê.
 Dema dibe rû, simêle,
 Tirsek pêş wî dibin mîle.
 Ci kete ber, nahêvşîne,
 Coxvêl dike, tewî tîne.
 Dê wî timê dipesine,
 Dibê: "Kurêm, dîsa bîne".
 Cem hevala dibe nav "baş",
 Dê xwedike etlez, qumaş.
 Dixemile nolî bûka,
 Tepa dide mezin, ç'ûka.
 Rojek kurê devxwînî, har,
 Hewşa padşêda dibe xar.
 Deveke wî vedke, tîne,
 Xûlam dûrva wî dibîne.
 Padşa dibihê vê cawê,
 Dide hukmekî xezevê.
 Dibê: "Diz zû bigrin, bînin,
 Kap têxne stu, bixenqînin".
 Xulam diz tînin meydanê,
 Wekî bidne xenqandinê.
 Padşa hêrs zû hukum dike,
 Diz destê xwe bilind dike.
 Dibê: "Heye ricake min,
 Bila dayka min bê ce min.
 Jê bixwazim ez xatrê xun,
 Maç kim zimanê dayka xun.
 Şîrê wê xwe helal bikim,
 Çend weysetê xas jê bikim".
 Padşa hîvyê qebûl dike,

Demekê wê sebir dike.
 Dibê: "Berdin, dayîka wîye,
 Bê ci dibe, lawê wêye".
 Dema tînin dê cem wîye,
 Ew jê dike vê hîvyêye.
 Dibê: "Bide zimanê xwe,
 Maç kim, rehetkim dilê xwe.
 Paşê herim axa sare,
 Pêş te nebim gunekare".
 Dayîk zimanê xwe didê,
 Ew qut dike, davê erdê.
 Padşa şâş dibe ecêbê,
 Dikeve nav behra xemê.
 Serê xwe nerm bilind dike,
 Vê ecêbê kur pirs dike.
 Dibê: "Çima te awa kir,
 Eva zulma dayka xwe kir?"
 Diz vedike ewê sêrê,
 Dibê: "Esil dize ev dê.
 Min hêk anî, wê got "bîne",
 Mirîşk anî, kir "amîne",
 Berx, mî anîn, ez pesinîm,
 Ga, hesp anîn, nesekinîm.
 Har bûm, tu kes hesab nekir,
 Eva xwelî ser xwe werkir.
 Min ci anî, wê got "bîne",
 Negot "dest jê vekişîne".
 Wekî pêşya min bigirta,
 "Dizyê meke" tim bigota,
 Minê helal qazanc kira,

Boy xwe sitarek çêkira.
 Nedihatim ez iro vir,
 Nediketim vî agrê gur.
 Rica dikim, mehêvşîne,
 Hukmê xwe biqetîne.
 Bira stuêm hilqetînin,
 Min rezîlî pir nebînin.
 Ew ne dêye, hirç'e, gure,
 Melhûmeke dil kevire.
 Qenc ne gotye emrê xweda,
 Xwezil nebya ew ji dêda.
 Zimanê wê wekî hebe,
 Wê mehêle kes hewalde.
 Timê xirav reşandîye,
 Qenc zarê wê derneketye.
 Xar û vexwar bû elbetan,
 Bîrkir hene rojên giran.
 Ew ji wêra pir hindike,
 Bila wabe, ew ç'ileke".
 Wê demê padşê pir aqil
 Dide hukê xweyî aqil.
 Dibê: "Berdin ewî xortî,
 Darda bikin dayka kotî".
 Emrê padşê tê qedandin,
 Kêfxweş dabin piç'ûk, mezin.

 Berya gotye: "Diz nabe mal,
 Lê xwediê malê ji maltîe derdixe".
 "Emrê dizîê, qaviê cil roje,
 Sîa wê weke buşkulekêye".

BÜYERA ÇARA

"BERÊ BIPÊJE, PAŞÊ BIRÊJE"

Rojeke Xwedêye nav rojada gelekî başe, şîrînda padşa wezîrê xwe banî cem xwe dike. Xêlekî hevpeyvandinê şûnva armanca bankirina xwe wîra qal dike. Ew hevdura qirar dikin, wekî rojekê berî xewê rabûna xulam, olam û mirovên padşalixêye din dilqê dewrêşada dizî ji padşalixê û bajêr derên, bê deng, bê hes çendekî welatê xwe bigerin. Hal û jîyana hemwelatîe xwera bibine nas. Ew gelek bajara û gunda digerin, rastî pir bûyerên baş û nebaş tê. Geh şadibin, geh jî pejmûr dîbin. Rojekê digihîjne bajarekî ne ewqasî avaî, ne jî mezin.

Dema rex sûreke kevirîye bilindda ku dibuhurin, padşa dibîne ser sûrêda mirovek nav cilêن kîvtike, qirêjda veleyzyaye, razaye. Çiqas mês, moz ser wî datînin, ew qet eynî xwe dernaxe. Ne hişyar dibe, ne jî xwe dilipitîne. Padşa vîdigere cem wî, xêlekê lê mêze dike. Him hêrs dibe, him jî gunê wî lê tê. Ji berîka xwe kaxetekî morkirî derdixe, lê dinivîse: "Kurê min, tu mirovî – here nav mirova. Heywanî – here nav heywana". Kaxet datîne ser sîngê wî û oxwera xwe berdewam dike. Xort xêlekê şûnva hişyar dibe. Dema dixwaze rabe, kaxet dikeve erdê. Kaxet hildide, diçe cem mellê bajêr. Dema melle kaxet dixwîne, ç'evê wî dertêne ser tepa wî. Zû ji cîê xwe radibe, ber wî pate dide, hed desten wî maç dike. Dibê:

- Ez xulam, tu kurê padşêî. Te çîma xwe kirye vî halî?

Tafilkê jêra deste kincên nuh distîne, xêle dirav didêda. Halekî durûda wî verê dike.

Xort îdî dizane, wekî kaxetda ci hatye nivîsarê. Rastî kê tê, dibê:

- Ez kurê padşême.

Melle jî kê dibîne, dibê:

- Ew xort kurê padşêye.

Hemû mirovên bajêre navûdeng, dewlemend dema rastî wî tê ber wî serê xwe xar dikin, paşê banî meclîsên hurmete mezin dikin, fêz tewa didine rûniştinê. Mal-dewlet, xelatên pir baha serda hildişînin.

Ew mesele digihîje mezinê bajêr. Ew jî tê dîtina wî xortî. Kaxet dixwîne. Xêle mal-dewlet danê şûnva cîkî bajêrî herî bedewda qesreke layîqî kurê padşê dibaxşînêda. Nava wedekî kurtda xort dibe dewlemendekî bajêrî herî mezin. Îdî kes nikare mal-dewleta wî hesab bike.

Ew mesele diçê digihîje padşê. Padşa pir hêrs dibe, wî zû banî cem xwe dike. Banî celata dike, wekî serê wî lêxin qutkin. Dema padşa ku dixwaze emir bide, ew destê xwe bilind dike. Jê hîvî dike, wekî ew imkanê bide rica xweye kutasiê elam bike. Padşa xwestina wî qebûl dike. Xort ew kaxet berîka xwe derdixe, dide padşêda. Padşa kaxet dixwîne, xêleke xurt dikeve nav mitalada. Paşê serê xwe bilind dike, bin lêvada heveki vedibeşire. Wî efû dike. Dibê:

- Bendê Xwedê, gunê min te hat. Loma min ew kaxetî nivîsî, danî ser sîngê te. Got belkî tu şerm bikî, herî tevî mirovî bibî, ji vî halî derêy. Destbi xebatekê bikî. Te hetanî nika gi kirye, îdî bese. Here, rehet bijî. Dest van fêñ-filaza xwe bikişîne. Îdî bese navê minra bilîzî. Cara duda, wekî van kirinêñ xwe biwekilînî, êz îdî te nabaxşînim.

Vê demê ez weyseta kal-pîraye baha qîmet dikeve bîra padşê:

"Mirov destâ dişimite, xwe digre,

Pîa dişimite, xwe digre,

Lê wekî dev dişimite, îdî nikare xwe bigre".

Padşa şasya xwe fem dike. Dibê:

- Berya rast gotye: "Berê bipêje, paşê birêje". "Berê bipîve, paşê bibire".



BÛYERA PÊNCA

AQIL TACÊ ZÊRÎNE, SERÊ HEMÛ KESİDA TUNÎNE

Mirovekî pir aqilî, zef dunê zaneî, dewlemend hebûye. Ferqut du ewledên wîye kurûn hebûne. Ew rojekê herdu lawên xwe banî cem xwe dike. Dibê:

- Gelî lawên mine delale, pir hêja! Min emrê xweda gelek rojêñ germ û sar dîtine. Lê ez ber tu tiştî feqîr, pejmûr nebûme. Tu cara ji xebatêñ giran, sivik netirsyame. Çi qirar kirye, ew jî zêde-zêde qedandye. Pir-hindik ev mal-dewlet boynet we qazanc kirye, wekî hûn paşeroja xweda tu çetinaya mekişînin. Nika ez îdî kal bûme. Ezê nikaribim serwêriê vê mal-dewletê bikim, wekî wê destê xweda xweykim. Boynet wê jî min qirar kirye ez hebûna xwe gişkî têkme sê para. Heryek me para xwe hilde, lê bibe xweyî. Lê ezê para we ser vî şertî wera bidim: we para xwe hildanê şûnva gerekê her qulç'ekî welatê xweda xwera malekê çêkin, wekî paşî mirina min hûn bikaribin serê xwe pê wan mala xweyî bikin.

Ew ewil para kurê xweyî mezin didê. Dibê:

- Kurê min, ev para teye. Here, her qulç'ekî welatê xweda xwera malekê çêke. Kengê diravê te xilaz bûn, wê demê paşa were. Ezê tevî te herim, hemû malên te binihêrim bê tê şîreta min çawa mîaser kirye.

Ew diravê para xwe hildide. Her bajarekî, her gundekî welatê xweda xwera maleke pir bedew çêdiye. Perê wî xilas

dibin, paşa vedigere. Dilekî eşqî, şâ diçe huzûra bavê xwe. Elametîê didêda, wekî gotina wî qedandye. Çendekî şûnva ev tevî kurê xwe diçe hemû malên wî çêkirine û dinihêre – mal bedew hatine çêkirinê. Her tiştî timtêsha xwedaye. Lê nav wan çend rojanda kesek derê wan venake, kesek wanara selamekê jî nade. Ew paşa vedigerin.

Bav banî kurê xweyî piç'ûk dike. Diravêna para wî jî didêda. Şerta xwe wîra jî dibê:

- Kurê min, bîr meke. Ezê tev te jî herim malên te jî binihêrim, ha!

Kur para xwe hildide, oxira xwe didomîne. Digihîje kîjan bajarî, kîjan gundî, pêra-pêra pirs dike: "Vî bajarîda, vî gundîda kurên başe navûdeng kîne?" Ew wan dibîne, tevî wana çend rojan duxwe, veduxwe, derbazî cîê din dibe. Bi vî cûreyî hemû diravêna xwe xilaz dike. Paşa vedigerin, tê huzûra bavê xwe.

Çend roj derbaz dibin. Bav rokê dibê:

- Kurê min, nika nobeta teye.

Kur û bav digihîjne kîjan bajarî, kîjan gundî, kurên wire başe bi navûdeng wan bi def, zurnêva qebûl dikin, dertêne pêşwazya wan. Dibine meclîsa girane. Pir hurmet hemû cîa usan têne qebûlkirinê. Armanca xwe qedandinê şûnva paşa vedigerin.

Bav dîsa her kura banî cem xwe dike. Kurê mezinra dibê:

- Lawo, te şertê min neqedandye. Para xwe agir berdaê şewitandye. Xwelya wê jî daye bê. Lawo, mala bê çûyî, bê hatî, bê mîvan, bê cînar qesreke cinnetê be jî qîmetê wê weke qîmetê holç'îkekê jî nîne.

Kurê piç'ûkra dibê:

- Lawo, sed eferim tera! Te şertê min, xwestina min şîdetir qedandye. Lawo, holç'îk tijî çûyî, hatî, mîvan, cînare, bi

heval-hogir qesreke cinnetê baştir û zeltire. Mirovê bê dost, bê heval-hogir – teyrekî per-bask şikestîye. Berya gotye: “Dostekî baş bırakî nebaş çêtire”. Min tew kirinên te dîtin. Ez îroda para xwe jî didime te. Ezê idî mala herdda rehet razêm. Te jî dewsa xwe mezinê malê kivş dikim. Biraê xwe ber ç'evê xwe bernede. Nav emirda timê xweyîtiê lê bike.

“Aqil emirda nîne. Gerekê cîda hebe”.



BÜYERA ŞEŞA

KURÊ DAYÎKA XWE PIR HIZKIRÎ

Dê û bavê kurekî tenê hebûye. Bavê wî gelekî wede zûtir dinya xwe diguhêze. Ew û pîredayîka xwe tenê dimînin. Wext, wede tê digihjîje. Dayîka wî idî pir pîr dibe. Qewet dikeve, nikare ji ciê xwe rabe. Ew sebetekê çêdike, wê dike sebetê. Hildigire û sibê hetanî êvarê danayîne erdê, temam rojê ser pişta xweda digerîne.

Xêlek sal derbaz dibin. Dê idî lap hal dikeve, dibe pûnç'ikekê. Dilê wê debar nake. Ew rojekê digrî, ji wî rica dike, wekî ew wê ji sebetê derxe, wekî idî ewqasî zehmet mede xwe. Ew bixwaze, nexwaze rica dayîka xwe qebûl dike. Êvarekê halekî pir pejmûrda wê ji sebetê derdixe. Dê xêlek, duda li wî dinihêre.

Ew dayîka xwe mêze dike, kelogirî dibe. Naxwaze dayîka wî wî usan kelogirî bibîne. Dizîkava dertê devra. Xêlekê bîna xwe distîne, hêsa dibe. Walî-walî, der-dorê xwe dinihêre, q'evê xwe dûr-nêzîk digerîne. Dibîne, wekî wî pêştir kesek tunene. Nav hêsrada hêdîka herdu destêن xwe quloz dike. Ban gorî Rebbê Jorîn dibe, dibê:

- Ya Rebbê Jorîn, idî her tiş teva agaye. Tu dizanî, wekî ev çend salin min dayîka xwera çiqas ezyet kişandye? Lê ez tenê tiştekî ji te hîvî dikim. Dixwazim bizanibim – ez çawa ewled ber ezyatê dayîka xwe derketime yanê na?

Jî jorda dengekî zelalî, ferîhî, şîrîn nazil dibe. Dibê:

- Bendê min, ev ezyatê, ku ev çend salin te dayîka xwera kişandye, ne weke ezyatê dayîka teye şevekêye, ku wê wê şevê tera kişandye. Dema tu ku zar bûyî, dayîka te şirîn razabûye. Tu hişyar bûyî, giryayî. Ew ji xewa şirîn nîvcî rabûye, tu mêtadî. Pêç'eka te vekirye, guhastye. Îdî ranezaye. Heta sibê ber hêleçana te rûniştye, tera "lorê-lorê" gotye. Geh hênicye, geh hişyar bûye. Netika wê darê pêç'eka te ketye. Ew ezyatê, ku te kişandye, ew weke ezyatê wêî wê şevê nîne.

DAYÎK

Ji te mestir kesek tune,
Te şirîntir tu tem tune.
Hemêza te heq cinnete
Wê evzeldir cinnet tune.



BÜYERA HEVTA

XEZALA BIRÎNDAR Û BEQA XWERAZÎ

Rojekê beq dîsa mînanî hercar nav herya hezekêda xwe valî-walî hildqwêše. Bilind, nizim banzdide, dike qurequr. Noqî bin kevza kolên tûzika dibe. Dertê, hinekî bîna xwe distîne, dubar noq dibe. Herî û belç'ikên tûzikê tijî ser serê dibin. Halekî elîwetî, pir qirêjda xwe kendalê golêra digihîne. Nişkêva xezaleke birîndare nav xwîna sorda gevezbûyî dibîne. Xezal dike inte-int, xwe valî-walî bordike. Wê ça êşa gulle herçar pîen xwe, geh evraz, geh berjêr dike, ji kûraya dil keserên şewat dikişîne. Ç'evêne xweye reş belek ji heqara derdixe.

Beq tê ber xezalê disekine. Xêleke xur ç'evê wê dinihêre. Zaravekî şirînî, dostanî halê wê dipirse.

Xezal halekî pir giranda derbara nêç'îrvanê dilkevirî, bêîsafda wêra qal dike. Beq serê xwe geh bilind, geh evraz dike. Rûje-tûj ç'evê xezalê dinihêre, kesereke kûr dikişîne. Bejna xweye elîwete, xaro-maro rast dike, dubar ç'evê wê dinihêre, dibê:

- Eh, xûç'a mine delal, ez nizanim ev nêç'îrvanên ş'evrijiyaye, dilkevir ci ji min – xezala nav avêne sare, zelale paqî, ci ji te – xezala bê gunê – dixwazin? Çima nahêlin em hinekî rehet bijîn?

Xezal zorê ç'evê xwe vedike. Serê xwe hevekî bilind dike, dîsa kesereke kûr dikişîne. Kasil-kasil wê mêze dike. Dibê:

- Bendê min, ev ezyatê, ku ev çend salin te dayîka xwera kişandye, ne weke ezyatê dayîka teye şevekêye, ku wê wê şevê tera kişandye. Dema tu ku zar bûyî, dayîka te şirîn razabûye. Tu hişyar bûyî, giryayî. Ew ji xewa şirîn nîvcî rabûye, tu mêtadî. Pêç'eka te vekiryê, guhastaye. Îdî ranezaye. Heta sibê ber hêleçana te rûniştye, tera "lorê-lorê" gotye. Geh hênicye, geh hişyar bûye. Netika wê darê pêç'eka te ketye. Ew ezyatê, ku te kişandye, ew weke ezyatê wêî wê şevê nîne.

DAYÎK

Ji te mestir kesek tune,
Te şirîntir tu tem tune.
Hemêza te heq cinnete
Wê evzeldir cinnet tune.



BÛYERA HEVTA

XEZALA BIRÎNDAR Û BEQA XWERAZÎ

Rojekê beq dîsa mînanî hercar nav herya hezekêda xwe valî-walî hildqewêse. Bilind, nizim banzdide, dike qurqur. Noqî bin kevza kolên tûzika dibe. Dertê, hinekî bîna xwe distîne, dubar noq dibe. Herî û belç'ikên tûzikê tijî ser serê dibin. Halekî elîwetî, pir qirêjda xwe kendalê golêra digihîne. Nişkêva xezaleke birîndare nav xwîna sorda gevezbûyî dibîne. Xezal dike inte-int, xwe valî-walî bordike. Wê ça êşa gulle herçar piêن xwe, geh evraz, geh berjêr dike, ji kûraya dil keserên şewat dikişîne. Ç'evêن xweye reş belek ji heqara derdixe.

Beq tê ber xezalê disejkine. Xêleke xur ç'evê wê dinihêre. Zaravekî şirînî, dostanî halê wê dipirse.

Xezal halekî pir giranda derbara nêç'îrvanê dilkevirî, bêîsafda wêra qal dike. Beq serê xwe geh bilind, geh evraz dike. Rûje-tûj ç'evê xezalê dinihêre, kesereke kûr dikişîne. Bejna xweye elîwete, xaro-maro rast dike, dubar ç'evê wê dinihêre, dibê:

- Eh, xûç'a mine delal, ez nizanim ev nêç'îrvanên ç'evrijyaye, dilkevir ci ji min - xezala nav avê sare, zelale paqlî, ci ji te - xezala bê gune - dixwazin? Çima nahêlin em hinekî rehet bijîn?

Xezal zorê ç'evê xwe vedike. Serê xwe hevekî bilind dilikê, dîsa kesereke kûr dikişîne. Kasil-kasil wê mêze dike. Dibê:

- Beqê, welleh, belkî ez bi vê gulla nêç'îrvanê şewate, kûr hinekî jî bêşyama, lê te bi wê himberîkirina xweva mirina min nêzîk kir.

Ji herdu ç'evêne xweye reşbelek du hêsla berjêr dike. Ç'evê xwe digre, dinya xwe diguhêze.

Berya gotye: "Gulla neyara qarê netutişa çêtire".

ŞİRETNAME



Ez van çend şîretên xweye baha qîmet çawa spartin didime herdu lawêd xweye delale hêja Elî û Anar, wekî ew nav emirda wan xwera têxne rênîşa xweye heqe û bê qerez.

1. Lawên mine pir femkirîye, qedir bilind! Ewil, ewil hûn qet bîr mekin, wekî lawên kêne, ji kîjan eslî û kîjan malbetêne, hûn kîne, hûnê bibine kî.
2. Dema dixwazin tiştekî kêrhatîyî nuh bikin. Ewil rewşa dinê û rewşa xwe ber ç'evêne xwera rind-rind derbaz bikin. Bipalînin, bigivişin, ne pêwîst jî cuda bikin. Dubar, dubar hildin, daynin, bipîvin, hê bibirin. Qenc, xirab hevdu derxêrin. Xêr û zîyana xwe himberî hevdu bikin. Dest dide – bikin. Na mekin sewdaê we ku hevdu girt. Hê armanca xwe elamkin û biqedînin.
3. Tu tiştî hevdu veneşîrin. Sêra dilê xwe xwe pêştir kesîra nebêjin. Deva, ç'eva menihêrin. Deva nihêrî dawîê paşîa dihesirin. Qet mehêlin mîkrobêz ezim, ezimê têkeve nav xwîna we. Wê ruhê we birizîne. Timê hevdu hizbikin. Hevra heyfbin. "Destê tenê



- deng jê naê”. Seva hevdu ruhê xwe nehêvşînin. “Yekbûn jîyane”. “Ç’evê derya, xwelî serya”. Neferê xwe mîna gula xweykin. Îmkanê medin, wekî hewceyî tu kesî û tu tiştî bimînin.
4. Malêda jin timê dimîne jin, mîr dimîne mîr. Hevsarê xwe qet destê xwe bernedin. We ku berda, hûnê idî çetin bikaribin beravkin. Însafa jina bedesil tune. Syar bû, idî peya nabe.
 5. Pevgirêdana xwe pismamên xwera gelekî qayîm bikin. Bila we mexeyîdin. Timê serîa jê nebirin. Hûn çiqasî neçin, ewê ewqasî ji we dûrkevin. Xerîb tênen, dibin pismam. Xerîb pismamê roja têî arxanîe. Roja çetinda te zû bîr dike, lê pismam piştovanê roja teyî çetine. Kurmamê we pismamên weye here nêzîkin. “Însanê bîyanî bidî goştê canî, axir, oxir poşmanî”.
 6. Nav emirda dostê min zef hindik bûne. Ji wan dosta ez dixwazim navê hineka bikişînim: Ahmedê Hepo, Emerîkê Serdar, Barîyê Mehmûdê û Têmûrê Îbrehîm. Min ji kurmamên xwe gişka hizkirye. Lê ji wan weke xwe Hesen hizkirye. Ew boynet min kurmam nîbûye, esil bira bûye. Wî pir zehmetê min kişandye. Cî hatinê wî seva min sîngê xwe daye ber gullê.
 7. Xwedaê xwe qet bîr mekin. Xwedê çi da, wî jî ezet, hurmet qebûl bikin. Nebine ebgewrî. Timê şikirbûna xwe bînin. “Her tişt ziravî dişkê, lê însan qalimayı dişkê”.
 - Xwedê xwehizkirî nakeve tu tengasya. Merhemeti emrê dirêje. Fexir, lafa, vira, viza gelekî dûrbîn. Dawya wan bêhurmetîye. Xwedê rastî û paqijayê

- hizdike. Timê mîrxas û comerdbin. Evdê tengasîfêda alîkarîe bikin. Xwedê jî wera alîkarîe bike. Timê dûrî şuxulê neqenc herin. Mirovê xirabra dostaê mekin. Mêvanhiz bin. Lê hemû kesî neynine mala xwe. Mirovên qenc, xirab hene, îtbara xwe unda mekin. Timê rya qencda bimeşin. Nekevne bin sya malê dinê. Îtbara malê dinê tunene.
7. Hizkirina welêt û gel bila bibe armanca weye yekemîn. Rya welêtda şehîd bibin. Ew kesê bê welate – bê qedrî, bê qîmete.
 - Dayîk, welat weke hevin.
 - Cuda nînin, timê tevin.
 - Nûra ç’eva bahatirin.
 - Ç’ûkara ç’ûk bin, mezinara mezin bin.
 - We rica dikim: vê şîretnama min emel bikin. Per û baskê Xwedê ser webe.

Bavê we
Barîê Bala.
20.05.2014.

Bira temê dê, bavane,
Roja tengda piştovane.
Ew xelate Rebb şandye,
Pir bahaye, ne erzane.

Ocaxê xwe mekin qunç’ik;
Helal bînin piç’ik-piç’ik.
Keda helal xilaz nabe,
Çiqas diçe, zêda dibe.

Esil hînbin, hê nîn bidnê,
Ew nanê we pêpes nake.
Kengê ketne tengasîê,
Wê destê we birge, rake.

Qencî tucar unda nabin,
Zirav dibin, lê qut nabin.
Ew kulîlkê bê dem vedbin,
A bê rehin, zû zerdibin.

Femkin, çima hatne dinê,
We çi daê, diçin ji wê.
Wekî recên weye kûrbin,
Tucar naân bîrkirinê.

Namûs, qîret, xemil, rewşin,
Şuxlên xêrê timê basın.
Tev êlêbin, tev bimeşin,
Jîna bê êl rojêن reşin.

Gelek nebin bê heysete,
Bê qudûmî, bê rûmete.
Ew kesê bê dewlet, male,
Çi bê xatî, ci bê xale.

Paqijayî eynî gule,
Merhemetî neynika dile.
Jîyan nabe bê armance,
Aqil, zer, dur him jî tace.

Dema we hat qîret bikin,
Sitarekê xwera çêkin.
Bilind bigrin nav-dengê xwe,
Telpa meyin ser eslê xwe.

Rebb aqlê pir nadê tewa,
Avê wek hev nake cewa.
Kesê şûna xwe nizanbe,
Pêş geleka duqat dibe.

Şev tim şeve, roj jî roye,
Dinya hingiv, him jî toye.
Xwedê daye bendê xweye,
Hûn jî qismek hildin jêye.

Pî, nebêjin çoka me xin,
Qenc û xirab hevdu derxin.
Giran, sivik, dost, hogirin,
Kîjan xêre, wî hilgirin.

Wek qewata xwe bar hildin,
Nîv rê wî kesîra medin.
Bersîv danê lez mekevin,
Tenê boy xwe bersîv bidin.

Xwîna paqij dirêj nabe,
Esilda xas, xirab nabe.
Gelek dajon hespê xune,
Dûrnakebin eslê xune.

Esil xirab namîne tew,
Tew emrê xwe derbazkî tev.
Firêqetbû, te nas nake,
Wê erbeta ser te çêke.
Kesên usan hûn dûr herin,
Rya xwe ser biguherin.

Qencîê bikin, bavê avê,
Dem hatinê wê we kêr bê.
Bê sitara pêpes mekin,
Boy xatirê Rebbê Jorîn
Dest bavêjne, erdê rakin.

Malê dinê, qerax nebin,
Îbara xwe qet pê neynin.
Malê pirî, serî xure,
Dawî timê agrê gure.

Hergav naê tava şirîn,
Dayîk naynin kurêñ zêrîn.
Rojek berf tê, rojek baran,
Him tofan têñ, him jî dûman.

Merhemetî, lep û dure,
Hemda fire, emrê pire.
Xayîn tucar nabin qence,
Mereza tel kîn û wece.

Evdê zane bihebînin,
Ew neynika gelê wane.
Qulixa wan dûr nemeşînin,
Zirar naê, qet ji wane.

Her kes cezê xwe dikişîne,
Wa, hukmê dewr-zemîne.
Mala mekin xiraveye,
Xirav nabe mala weye.



BOYNET ZAROKA



HIRÇ'İKA MIN

Gulovere, ç'ev xare,
Ane koke, ne jare.
Pê pene, guh kinike,
Gizmizike, rindike.

Zû-zû dike ire-ir,
Xwe bordike, dibe hur.
Valî-walî direve,
Gelek naçe, vedgere.

Qulç', quncika hevdixe,
Ç'evbirçiye, têr naxwe,
Belç'ika weldgerîne,
Sêvetîrşka dibîne.

Dilitime, holdibe,
Dikeve, zû radibe.
Tirsa berfê, baranê
Xwe davêje nav panê.

KURIK Ü QEŞAV

QEŞAV, QEŞAV, QEŞAVOK,
Bese bikî ecêbok.
Îdî zû-zû bihele,
Tevî avêbe, here.

Tava rindik bê derê,
Kulîlk vebin her derê.
Herme nav hevalê xwe,
Qît bidim kevoka xwe.

Kevoka min cindîye,
Bavo minra kirîye.
Sibe, sibe difire,
Gelek naçe, vedgere.

Hêsa herim dibistan,
Nekevim ser pî, destan.
Hildim hola xwe rindik,
Holbikim hindik, hindik.

Dayîka xwe hizbikim,
Dersdara xwe hêrs mekim.
Tew dersa pênc bisfînim,
Hevala paş nemînim.

Kaliko min maç bike,
Bavo min qet ec meke.
Hemû bêjne min “şero”,
Pesna bidne min herro.



GUL Û GULÇÎN

(Ç'irok)

Yek hebûye, yek tunebûye, du kevotkên per-bask bedewe nexşîn hebûne. Navê yekê Gul, ya din Gulçîn bûye. Wana hevdu gelekî hizkirine. Wekî rojekê Xwedê hevdu nedîtana, bîna wan zef teng dibû. Çawa dibêjin, dinê dora wan filî dida.

Her sibe zû yekê banî ya din dikir, wekî herin boybet cûcikên xwe qûtekî bînin. Difiryan, diçûne nav mîrga, çîmana, zevî û daristana, digeryan. Heta êvarê çend cara cûcikên xwera qût dianîn. Dîsa vedigeryane êwira xwe. Êvarê bar tijî paşa vedigeryan. Wan bi vî cûreyî wedêñ xwe derbaz dikirin, cûcikên xwe givre dikirin, firê dixistin.

Sibekê Gule hîvya Gulçînê bû, wê bê, wê banke. Lê ji Gulçînê tu deng û his naê. Gul lezo-bezo radibe, diçê mala Gulçînê. Dibîne – Gulçîne nav germayêda velezyaye, inte-inta wîye. Ew zû-zû cîê wê tindirûst dike, temerzîke şile, sar datîne netika wê. Pişt, dest û piêñ wê mîzdide. Qasekî şûnva bîna Gulçînê tê ber. Radibe, Gulê hemêz dike, dibêje:

Welleh, tu hevaleke gelekî başe, hêjaîye, bê quşûrî. Loma ji ez te pir hiz dikim. Vê xemxurya te ez tu cara bîr nakim. Herya gotye: “Hogirtya helale, paqij roja tengda tê kivşê”.

Serê xwe ber xar dike, zû-zû cûcikên xwera qût dide.

Dîsa berbi êwira xweye herro difirin, êvarê bar tijî vedigerine cem cûcikên xwe, qûtê wan didinê. Cîen wan datînin. Ev jî ziktêr ç'evêن xwe digtin, şirîn-şirîn radizên.

*De, delalê (-la) min, deme,
Were, dayîka te te maçke, tu jî razê.
Ez jî hinekî hêsa bibim,
Rehet bîna xwe bikişînim.*



NADO Ú NARÊ - TRAGÊDÎA

QETLA BÊ GUNE

(Bira xûşka xweye bê gune dukuje)

SÊ PERDE. ŞÊŞ BEŞ

ROLA DIQEDÎNIN:

1. **NADO** – 26 salî, dersdarê dibistana gunde navîn.
2. **NARÊ** – 19 salî, xwendevana înstîtûta dûreke.
3. **BEDIR** – bavê Narê, nexwendî, kevinhez.
4. **BESO** – Dayka Narê, nexwendî, heyf, milahîm.
5. **TÊMIR** – 22 salî, birê Narê, nîvxwendî, needilî.
6. **XEZAL** – 19 salî, hevala Narê, tevî Narê dixwîne.
7. **KEREM** – 26 salî, dersdar, hevalê Nado.
8. **ŞEMO** – 30 salî, nîvxwendî, şerûd, diz.
9. **BEKIR** – Bavê Şemo, nexwendî, xwe qerax.
10. **ALMAST** – dayka Şemo, nexwendî, vizek.
11. **KEK EZÎZ** – 60 salî, dîrêktorê dibistana gund.
12. **MELLE EHMED** – 70 salî, diravhez.
13. **ELÎ** – bineliê gund, jêra Bekequmsî dibên.
14. **PÎREJINA EWIL** – 80 salî, meta Bedir.
15. **PÎREJINA DUDA** – 75 salî, xatya Bedir.
16. **BERBÛ** – 24 salî, xûşka Nado.
17. **KOMA SAZBENDA Ú DENGBEJA**.
18. **XÊLE MIROVÎN** – dema qewmandinê dikevinê oda Narê têdbûye.

(Nasname – Şemo hemû qewmandinada naê xanê).

DESTPÊK (ÊPÎLOG)

Dema min pênûs hilda destê xwe, wekî vê bûyera nolî jerêye tel, mînanî agirê cehennemêî şewatî ne temirî ku binivîsim, elbêru herdu destê xwe bilind kirin, bangorî Rebbê Jorîn bûm. Awazekî zelal jê hîvî û rica kir, wekî li min were rehmê, sihet û qeweta bê qezîa bide min û ez bikaribim bin wî barê giranî, qîmet baha serfinyaz derêm, nîvê rê westîyam nebêjim, daneynim. Rûspîtîke comerde, nûranî bigihînme oxirê. Pêş gelê xwe rûreş û deyindar nemînim. Ev helbesta nîvîsî:

Ya Rebbê Jor, bide nisret,
Hemda fire, sihet, qewet.
Ez vî barî cî hilînim,
Westyam nebêm, zû daneynim.

Qudreta xwe zêde bike,
Rya pêş min zelal bike.
Kuç, sirîna meke rêze,
Murvê hevsûd biparêze.

Bê jan, êşa nav dilê xwe,
Bigihînme tew gelê xwe.
Hîvî bikim dê û bava,
Ewil hînbin ruhê lawa.

Vê dinya nû mêze bikin,
Heqê lawê xwe nas bikin.
Ew jî bibin fireqete,
Mekin, mekin wan bedbextê.

Mirazê wan hasil bikin,
Nav emirda bextewarkin.
Ez jî sihkim pêş gelê xwe,
Hinek qedand min deynê xwe.

Ev bûyer destpêka nîvê qurna bîstîe duda da, nav kurdên gundekî Rêspûblîka Qazaxstanê qewimîye. Gelek mirovên wî gundî heya nika jî bûyer bîr mekirine. Dilekî êşyaî, şewatî, pejmûr wê qal dikan.

Dema ez hatime Rêspûblîka Qazaxstanê, min ji xêle mirova derbara wê bûyerê bihîst. Çûme wî gundî. Derbara bûyerêda xêlek mirovên ahil û cahilra axivîm. Wan bûyer despêkê heta dawîê qal kirin. Eyan bû, wekî gelek tevgelên bûyerê wî gundîda dijyan. Rastî wan hatim, wanra axivîm. Wan jî bûyer çawa bûbû, poşman-poşman qal kirin. Ji min rica kirin, wekî ez navê wan nivîsara bûyerêda mekişînim. Min rica wan qebûl kir. Loma jî xêngi navê Têmir tu nav nekişandin, çimkî qetikarê bûyerê xût Têmir bi xweye.

Min li vir hewce dît, wekî gotineke kal û bavên meyo lel û dure, bahaqîmet çawa heye, usan binivîsim. Dilekî êşyaî bigihînime gelek bav û dayêñ kurde ji emirê nû paşdamayî:

“Bila dilî dil be,
Kiras cawê qul be,
Doşik erd be,
Lihêf ewir be,
Belgî kevir be,
Xarin nanê ceh be.
Rojekê hebe,
Deh roja tune be,

Lê bila tenê
Dilî dil be.”

Telebextra, heya nika jî nav gelê meda bav û dayîkên dilkevire usan hene, ew ewledê xwe zane-zane bi destî xwe zorê davêjine nav agirê cehennemê. Ew temamya emrê xwe nav ax, keser û zulma giranda derbaz dikan. Saxe-sax ezabê mirinê dikişînin. Dişewitin, ji emrê xwe tu tema şîrîn nabînin. Zelûl dibin. Mehf dibin. Halekî tragêdîk dinya xwe diguhezin.

Îdî deme, wekî hemû rewşenbîrên kurd, egîtaîke bê xof, cesaretekî şerezeî bê tirs miqabilî wan bav û dayîkên ji emrê nû tu tişt femnekirî destbi şerekî hêle bikin. Wan bînine ser rya heqîyêye bê qezîa.

Wekî ew gele cara xwesteka lawên xweye dûrî erf-edetên gele kevnîyare wedê bibihûrîa qâil bibin. Wekî ew rya emrê xwe xwexwa bijbêrin. Mirazê xwe şâ bibin. Bibine bextewar. Dawya wan nebe tragêdia.

PERDA YEKE BEŞA EWIL

Perde hêdî-hêdî vedibe.

Mala Bedirê ewqasî jî timtêsa nikava ne xemili, nav funayêda zelal tê xanê. Ser polê malê xalîçeve xilmet hatye fasiştinê. Stoleke çar nikil, çend stûle danîne, xalîçeve hessîne dîwêrda darda kirê. Destê jorê dîwanek û du krêslo hene. Narê û Xezal dîwanêda rûniştine, dengekî nizim şîrîn-jîn diaxîvin, dem-dem jî dikenin.

Narê – (*Dengekî milahîm*). Qîzê, car-carana temê mektebê usan têne min. Serê bavokim. Hindik dimîne, lap xwe unda bikim. Şev dikevime nav xewnên gelekî şirîne xilaz nebûyî. Dibînim, çûme mektebê. Ez û Nado quncikekî sekinîne, nolî her gav hevdura diaxivin. Zarokên koma yekê, duda nêzîkî me dibin, valî-walî direvin. Min dinihêrin, dikenin. Dîsa pey hevdu direvin, me dûr dikevin, diçin. Vê demê zengilê ders destpêbûnê lêdikeve. Nado zû-zû berbi oda dersdara diçe. Destê wîda jûrnal, elbêra paşda vedigere. Minra çav dike. Diçe sinifekê. Nişkêva hişyar dibim. Der-dora xwe dinihêrim, xwe xwera dibêjim: xwezil hişyar nebûma... Xewneke dinda dibînim ez û Nado nav baxçekîdanin. Qive-qiva bilbila tê. Eme ser kanîkê sekinîne avê hevdu direşînin. Dû hev dû dikevin. Ew min digire... Hêdîka berdide, dîsa hişyar dibim. Eh, xûça min, xwezil min mekteb hinekî dereng kuta bikira. Ev xewn jî qet nedîtana. Dîsa nolî her car, xwe bixemilanda, çeltikê xwe hilda, biçûma mektebê. Hevalên xwera biaxivyama. Nado bidîta, dersê bihatama. Dayka min xurekekî tem çekira. Bida ber min, gulîen min mehez kirina. Carana jî ez maç kirima. Eh, eh, xûça mine delale, pir min hezkirî, ci bêjim. Xwezil, wan wedê buhurî...

Xezal – (*Kene ken*). Peh, peh, peh, xûça mine delale hez kirîe hêja. Xwezila min te bê. Welle, hindik dimîne, ez idî çavnebarîa te bikim. Wekî tu zû-zû xewnên usane nolî hingive şirîn dibîni. Qîzê, ew idî ne xewnin. Çawa melle Rzgo dibêje, “felqekê cinnetêye” hûn dikevinê. Gul, Gulistan gazî hevdu dikin. Tu Nadoye navda rûniştîne. Dû hevdu dikevin. Avê ser hevduda direşînin. (Dikene). Kîjan dil bengîe nexaze, wekî xewnên usan zû-zû nebîne? Lê nolî me, em her sibê diçine mektebê, hevdu dibînin, awirava selamê didine hevdu?.. Roja me usan xilaz dibe. (Dikene). De wekî tuye usane heyra

Nadodayî, gazî Xwedêke, bila xewnên te bibine rast, eşkera. Hûn bê tirs zû-zû hevdu bibînin.

Narê – (*Dengekî gazin*). Èêê, qîzê, te dîsa dest henekên xweye metnezeye pêkenok kirin, erê?! Qîzê, ez ci dibêjim, tu dereqa çida difikir? Dilê tera ci derbaz dibe, wî jî didî der. Dixwazî seva dilê te rehet bibe, bêjim, tu Kerem jî li wir bûn, we jî hevdu avreşandî dikir, erê?! Na, na, welle, ez nikarim derewên usa bikim. Kêra bigihêjî xewna min jêra qal kî. (Dikene).

Xezal – (*Çavê Narê dinihêre, vedibişire*). Xûça min, dixwazim vê siba bedew mizgîneke xêrê bidime te. Lê, nizanim, tuê wê çawa qebûl bikî. Yeqîn, tuê min xelat bikî, erê? Şika min tune. (*Nişkêva radibe berbi dêri diçe*). Na, na, bila her tiş ser girtî bimîne. Dîzik dev girtî bimîne, rinde.

Narê – (*Dû wê ban dike*). Qîzê, te lap hişê xwe undakirye? Kuda diçî?! Tîrê davêjî, kevanê vedîşerî? Çima dilê min diteqînî? Bêje, bêje, bê tuê vê sibê zû ci mizgîna xêrê bidî min, wekî ez şa bibim? Bê wê jî ev xêle wedeye, mitala dilê min qul kirine. Cî nabînim xwe ji destê wan xilaz bikim.

Xezal – (*Dikene, paşda vedigere*). Qîzê, dîn nebe. Hinekî sebir bike, hemda xwe fire bike. (*Wê hemêz dike*). Te heneka min lap kire rastî. Aqilê xwe beravî serê xwe ke. Ezê qet razî bibim, wekî tu ewqasî posîde bibî, têkevî nav mitala? (*Hêdî ji berîka xwe kaxetekî hev pêçîaî derdixe, dirêjî wê dike. Narê kaxet destê wê digre. Vedike. Lêdînihêre. Dîsa vedigerîne wê. Xezal dengekî nizim kaxet dixwîne*). “Selam, Narê can. Min biborîne, wekî ev demeke dirêje ez nikarim rastî te bêm. Edetê gelê meyî gelekî giranî, xirabî, cawdare. Ez qet culet nakim kolana wera jî bibihurim. Minra usan tê kivşê, wekî çavên mirovîn gundê me gişka min dinihêre. Wê min bibînin, hezar

nebenda dû min bixînin. Delala min, idî tu mitala meke. Min mesela me despêkê hetanî nika gişk dê û bavê xwera qal kirî. Hemû qewmandina despêk û kutabûn heye. Kes nikare bêje îro yanê sibê ciyê biqiwime. Ewe amedene, hema îro jî bêne mala we daxwazî elamkin. Ezî hîvya bersîva teme. Dilekî tiji hezkirî, pir bengî. Nadoê te..." (*Vê demê devra dengê Beso tê, ew Narê ban dike. Narê kaxet destê Xezalê digre, zû-zû berîka xweda vedişêre. Beso dikeve hundur, Xezalê dibîne. Vedibişire*).

Beso – (*Şa-şa*). Metê qurban, tu kengê hatî? Welleh, hewşêda eze ewqasî mijûl bûme, min qet hatina te nedîtye. Tu jî nehatî cem min. Dizî-dizî, zû-zû revyayî bal Narê. (*Dikene*). Dîsa ew çi piçe-piça weye, guhê hevduda dibêjin? Ez bextê weme, ew piçe-piça we qet xilaz nabe? Xwezila min bizanbûya hûn derheqa çida ewqasî xeber didin, dilê minê hinekî rihet bibûya. (*Xareve tê, Xezalê maç dike. Berbi kulînê diçe*). De, qet nebe, wera fîncane çay bînim. Çayameye hazire. Hinekî şûnva xurekê meyê jî hazir be. (*Destê wêda sinya çayê paşda vedigere. Herd vê dînihêrin, dikenin. Fîncanê wê digirin, didine ber xwe. Nişkêva Bedir dikeve hundur*).

Bedir – (*Dengekî hizkirî*). O, ho, gelî qîza! Welleh, ez we eziman digeryam, lê hûn hema erdê hêsa, rihet rastî min hatin. (*Vedibişire. Xar dibe netika Xezalê, sûretê Narê maç dike*). Narê can, min nexeyde. Ne tu dizanî, ez Xezalê ji te gelektîr hez dikim, loma jî berî te netika wê maç dikim. Lawo, bila Xwedê bextekî usanî şîrîn têke qismetê we, wekî hûn qet hevdu meqetin. Timê bal hevdu bin. (*Xezal û Narê wî hemêz dîkin, may dîkin, kene-ken mal dertên, ew û Beso dimînîn*).

Beso – (*Bedir dînihêre, dengekî nizim*). Mero, bêje, bê dîsa te çi qewimîe, wekî ewqasî reş xitimîyî? Tiji bûyi? Te şî cavêن pak, nepak bîhistîne? Ez te rind nas dikim. Tu bê sebebî,

ewqasî poside nabî! Rengê xwe naguherî. Welleh, rengê te qet xaşa min naê. (*Berê xwe diguhêze, ber xweda hêdi*). Min feqîra Xwedê, kengê ew rûçikê teyî bedew, ken-eşq dîtîe, wekî nika jî bibînim!

Bedir – (*Hêrs Beso dînihêre*). Weyla ecek lê ketê! Hela min wê binihêrin! Ew jî min begem nake? Qelfê xwe min dike. Gunekar ezim, tu nînî! Qîzê, ez Bekirê Elome! Yek rastî min hatî dizane ez kîme, yek jî navê min bîhistî! Gelek merya hez kirin, wekî minra dostî, hevaltiê bikin. Tu jî wî hişê xweva min begem nakî, erê? (*Awirne tûj didêda*).

Beso – (*Dikene*). Peh, peh, hêdî, hêdî, malik awao! Erdê biqelişe, em gunene! Ev çi kilamên tezene tu dikakînî? Kuro, "Dîzê got, binê min zêre, kevgîrê got: Lî ez ji ku têm?" Çi dibêjî, bêje, kesek nolî min te rind nas nake. Ev nêzîngî sî salîye tevî hevdu dijîn. Lî min, ew hunurê ku tu dibêjî, qet carekê teda nedîtye. (*Vedibişire*). Daha rind dibe, tu hinekî dakevî jérê, werêy aşê Xaço. (*Nizim dikene*). Mero, daha rind dibe, wekî dilê xwe vekî, fikra xwe minra zelal şirovekî, ez jî weke zanebûna xwe misiletékê bidime te. Hezdzikî – gebûlke, heznakî – ewê jî lî tu dizanî! Yeke, dilê teda çi disêwire, dawîe tu wî jî dikî.

Bedir – (*Dengekî nizim*). De, wekî dixwazî, min çi dîtye, ezê tewî tera bêjim. Keçê¹, îro nav gund Bekirê Elo ez xewle kirim. Gelek wehjarîa şûnva rûê min nehêrî, vebîşirî, got: "Bedirê bira, em mirovîn gundekîne. Zarotîa me tev buhuriye. Kal-bavêñ hevdu nas dîkin. Hêlekêda jî pismamtya me heye. Bira, fikra me heye em wan nêzîngaya berbi we bêñ". Min gotê: "Kuro, çîma cara yekêye hûn têne mala min? Derîê minî pêş we vekirîye. Keremkin, çi wext dixwazin, werêñ". Ew vebîşirî, got: "Evv hatina me ne ji wan hatinaye. Em dixwazin wera pismamtya xwe dubar bikin". Min idî fikra xwe ne daê, elbêra jê dûr ketim.

Jinik, min sebeba tijî bûna xwe got, qal kir. De, tu aqilê xwe beravî serê xwe bike. (*Dikene*). Misiletke başe, hêja bide min.

Beso – (*Çavê wî dinihêre, nerm dikene*). Êêê², mero, min hê tu femkirî rengê te çima usan hatye guhastinê. Malik awao, qîze sore, zere, bedewe, cîê bilindda dixwîne, aqile, kemale. Ser barîa serda, qîza mîrekî nolî teyî bi nav û denge. (*Dikene*). Weyla min hetevê. Welleh, mişterîe wê hazirî serra sekînîye. Berya gotîe: “Morîa qul erdê namîne”. Îro Bekirê rastî te bê, sibê Heso, dusibe Kesoê bê ber derê te. “Qîz sêva sore, ser darêye”. Hemû destê xwe davêjinê, qismetê kê be, ew jî hildide. Mero, lê wekî tu mislieta min bikî, wê dereqêda fikir kirin gelek zûye. Guneye, jê vegere. Bila xwandina xwe xilaz bike, xwe rind nas bike. Aqilê wê tam bê serê wê. Tu bavî, wê demê çawa dixwazî, usan jî bike. Yeke, qîz mala bavêda mîvane. Zû-dereng, lê serê rîye. Wê here... Lê kuda?.. Lê kêra?.. Kîjan oxirêda wê here?! Ew jî idî Xwedê dizane. Kêra nivîsiye, ew jî ê bibe. (*Vê demê Têmîr nişkêva derî vedike, dikeve hundur. Ew elbêra dengê xwe dibirin*).

Têmîr – (*Hêrse-hêrs*). Daê, bavo, ew ci qewimye? Hûn dîsa orta xweda dizî-dizî xeber didin? Kîjan meselê hel dikin? Min dibînin, elbêra dengê xwe dibirin? Yeke, hûnê sêra dilê xwe minra nebêjin. Neheq jî ji we dipirsim. Biborînî, wekî min hûn nerehet kirin. Gotinê jî, hûnê quest, berê min bidine rêke kaş, sirîne usane çetin, wekî ezê nikaribim qet wê rêda herim. Bixwazim, nexwazim paşda vegekim, wera razî bibim. Kutasiê bême ser gotina we, erê? De bi xatirê we! (*Radibe, dixwaze here*).

Bedir – (*Hêdî milê wî digire, dengekî nermî milahîm*). Kurê minî delal, lawo, tu kuda diçî? Gelekî lez mekeve. Çîma dîsa seklavî bûyî? Berxêvet, berxêvet xeber didî? Wan gazinîn

bi loman dikî? Me hetanî nika kîjan gîlî, kîjan sêra malê bê te kirîe? Kuro, lawo, em deng nakin, tu deng dikî? Ka me kengê tu malda dîtî, wekî bi te beşêwirin? Vê xeberdana te kî bibihê, wê elbêra bêje: “Yeqîn kurê wanî ya hevseneye, yanê jî bê dûye, wekî sêra mala xwe wîra nabêjin”. Çîma usan bê îsaf xeber didî? Wekî tuyî usan heîrifî, keremke! Were bal bavê xwe rihet rûnê. Tew gotinê min rind-rind bibihê. Ezê idî sêra piste-pista me gişkî tera vekim, bêjim. Şikir, tu idî xortekî mezinî. Bejnêda ser min dikevî. Aqilda jî... (*Ber xweda*). Weylê min bextewarî. Tu ci qirarî derxî, emê wî qirarê te qebûl bikin. Çawa bêjî, emê usan bimeşin. De keremke. Hişî xwe topî serê xwe bike. Rind-rind fikir bike.

Têmîr – (*Cîê xwe radibe, tê cem bavê xwe rûdinê. Hinekî bi ekis*). De keremke, bêje, bêje, bavê minî, min pir hezkirî. Bê ew ci meseleye, wekî hûn nikarin safî bikin? Dixwazin min bişêwirin? Welleh, pake-pake. Şikir Xwedê, dêmek ez jî heme. Hûn idî min jî meriv hesav dikin. Banî arîkaryê dikin. Başe, başe. (*Dikene*). Bavo, daê, lap arxanîbin. Qet tu şayîşa mekişînin. Kurê weyê xwestina we elbêra biqedîne. Diqewime, hûn çavekî kurê xweyî aqil dinihîrin?! Na, na, şaş nabin. Çavê xwe rind vekim, min binihîrin, bê kurekî weyî çîqasî zaneyî, mîrxas heye. (*Destê xwe sîngê xwe dixêre, cîê xwe radibe, hîrse-hêrs dixwaze here*).

Bedir – (*Hêdî milê wî digire*). Lawo, kurê min, ne min tera got cîê xweda rifet rûnê, lez mekeve, bavê xwe rind bibihê. Ezê idî ci heye, gişkî zelal vekim, tera bê icir bêjim. Tenê tu guhê xwe rind-rind veke, min bibihê, wekî bikaribî rêkê bidî pêş me. Lawo, Bekirê Heso Nara xûşka te Şemoê kurê xwera dixwaze. Lê tu ci dibêjî? Welleh-bille, idî tu sêrên meye te veşartî tunenin, wekî te pê nehêsînin. Tu badilhewa hêrs dibî.

Kurê min, de safike. Bê tuê bêy ser çi qirarî? Tu çawa safikî, çawa bixwazî, emê usan jî dû kaşa te herin. Ezê Xwedaê xwe gelekî razî bimînim, wekî ewledekî nolî teyî aqilî, kemal kirye qismetê min. (*Eks dikene*). Roja tengda dikare kêrî min bê, min tengasya derdixe. (*Beso tevî xeberdana wan dibe*).

Beso – (*Dengekî milahîm*). Kurê minî aqilî, delal. Te bîhist, bavê te tera çi got? Her tişt tera eyan bû yanê na? Tu kurê meyî teneyî. Narê jî xûşka teye teneye. Xêngi we tu ewledên me tunenin. Bextê wêyî jî destê tedaye. Em îro hene, sibê tunenin. Nika rûnê. Kûr-dûr bifikire. Bê tu têy ser çi qirarî. Lê min fikra xwe bavê tera gotîe. Bîr meke, nika jî tera dibêm. Derheqa vê meselêda qirarê kutasîe derxistin hela gelek zûye. Xûşka te guneye. Bila xwendina xwe xilaz bike. Aqilê wê bê sêri. Paşê hûn çawa dixwazin usan bikin. (*Berxweda*). Ew xeme, hela wê demeye. Belkî heta wî çaxî ew xweyê bikaribe bextê xwe hel bike.

Perde berjêr dibe.
Dik nav tarîstanêda naê xanê.

PERDA EWIL BEŞA DUDA

Perde hêdî-hêdî vedibe.

Mala Bedir rizma xweye berêda çawa hebûye, usan zelal kivş dibe. Bedir, Beso û Têmir dîwanêda rûniştine, hevdura dengekî nizim diaxivin. Carana destê xwe bilind dikan. Devra dengekî mîra ban dike: “Xwedanê malê, xwedanê malê!” Derî tê kutanê. Bedir zû dêrî vedike.

Bedir – (*Vedibişire*). Keremkin, keremkin.
(*Beso û Têmir radibile pîa. Bekir û Almast selamê didin, dikevine hundur. Dîwanêda rûdinê. Bekir çavê Beso dinihêre, dixwaze gilikî bêje. Beso serê xweva êşareta “bisekine” didêda*).

Bekir – (*Dengekî nizim*). Bedirê bira, me bibaxşîne, em mîvanê ban nekirîne, loma dereng hatine. Gelekî nekeve nav mitala. Malik avao, tu eme xerîbin. Berîa gotîe: “Mîvanê dereng hatî kîsî xwe duxun”. Kêfa xwe lap kok xweyke. (*Vê demê Narê û Xezal kene-ken dikevne hundur. Selamê didin. Derbazî oda Narê dîbin. Bekir xêleke xurt metel-metel dû wan dinihêre. Nefeseke kûr dikişîne*). Bedirê bira, kuro, dibînî qîz çawa zû mezin dîbin? Loma berya gotîe: “Qîz rojê weke cehekî, kur weke genimekî mezin dibe”. Kuro, heta duh, pêr, her yek wane weke karikeke bizinaye rûtik bûn. Lê nika, maşella, çavê merya jê têr duxe. Her yek bûye xezaleke xas baxçê padşakî ter. Welleh, idî xwexwa banî mişterîa dikan. Xwezila min wan xorten bextewar bê, wekî ev xezalê pale-pûlê bibin qismetê wan. (*Vedibişire*).

Almast – (*Awirêñ tûjva wî dinihêre, eşaretîa “Bese, îdî dirêj meke” didêda, curekî gzin*). Kuro, Bekir, tê kivşê, tu jî ji bextê xwe, roja xweyî ne qayîlî, erê?! Kuro, rojê sed carî papaxê xwe bavêje hewa, wekî ez bûme qismetê te. Kîê tu bikiraî? Kî wan çopirêñ rûê te dinihêre, têr duxê. (*Nerm dikene. Bedir hinekî soro-moro dibe. Serê xwe berjêr dike*).

Beso – (*Kesereke kûr dikişîne*). Bekirê bira, qîz wê wextê dibe bextewar, wekî dikeve maleke başe, merîfete, qedir-qîmet, zane. Rastî xortekî çêî, merdaneyî, xwe naskirî tê. Bedewî ne bextewarîye. Car-carana qîzên bedewe, xanim-xatûne nolî xezala dibine qismetên xortne usane kotî, gunê merya wan tê. Wekî hêca nînin, qet avê destê wan bikin. A, wê wextê, qîz qîmetê xwe unda dikan. Dêda bûna xwe poşman dixin. Heta kutasîa emrê xwe nav ax, keserada dijîn, mehf dixin. Xwedê bextê kê kêra nîvîsî! Qenc xiravra, xirav qencra!

Almast – (*Dengekî gzin*). Beso, xûça min, welleh, te dilê min lap nolî kizikê heland, kire cize-ciz, dinê dor serê min çû, hat. Qîzê, wedê meda, welleh, eme lape çavgirtî bûn. Me ji dinê qet tu tişt fem nedikir. Lê nika, qîz diçine mekteba, komâ neha, deha kuta dikan. Zêdebarîa ser, lap cîê bilindda jî dixwînin. Navê vê jî pak nizanim – Enstetuye, çîe?..

Bedir û Bekir – (*Bi hevdura*). Weylê ecek we ketâl Nevxêrik weda hata. Dêmek, hûne jî bi gilî, gzinin, erê?! Lê, werêñ, eceba ser eceba binihêrin! Gunekar emin. Em we çîma bikine xanim, xwedanê mal-hala, nika jî hûn wa bêjin, gazine bikin. Welleh-bille, hûne heqin, eme neheqin, îdî buhurîye. Poşmaya dawîê feyde nade. (*Dikenin*).

Almast – (*Bekir dinihêre*). Kuro, armanca hatina

bêje. Bese têkevî kol-kosa, ka kevin bidî bê. Tu Bedir bipesinî, Bedir jî te. Welleh, em we herdua jî rind nas dikan. Qet nerehet nebin. Ne em jî vî gundîda mezin bûne...

Bekir – (*Dengekî nizm*). Bedirê bira, hezar carî bibaxşîne, welleh xanima min (*dikene*) rast dibê. Em armancê gelekî dûr ketin. Lê qet tu ji me pirs nakî: “Gelî mîvanen mine dereng hatî, we xêre, vê ewarê derê min vekirîe? Belkî gilîk, gazineke we heye, keremkin, bêjin”?

Bedir – (*Dikene*). Bira, te usan dûrva destpê kir, çîma em hevdu nas nakin? Îro nişkêva rastî hevdû hatine? Kuro, mîvan mîvanen Xwedêne, Xwedê berî wan risqe wan dişîne. Hûn ser serê min, ser çavê min hatine. Dergê minî pêş mîvanen nolî weyî timê vekirîye. De keremke, armanca xwe bêje! Wekî qet nebe ez alîkarîke sivik bidime we, yanê jî misileteke qenc bidime pêşya we. Wekî hûn ji min razî bimînin, meêsin, ne xeîdin.

Bekir – (*Çavê Almastê dinihêre. Almast wîra çav dike, “Bêje, bêje”, ew dil-dînê xwe tev tîne*). De wekî usane, welleh Ezîm, bille Kerîm, ezê hema vî serîda armanca hatina me wera zelal vekim bêjim. (*Navbirî*). Ne bikime miste-mist, ne jî bikime inte-int. Berya gotye: “Şerîet şermê naxwaze”. Gilîê paqij Xwedê jî jê hez dike. Bedirê bira, Besoya xûşk, Têmirê brazî, şikir Xwedê, hûn Şemoyê min rînd nas dikan. Ew ber çavê we mezin bûye. Nav mirovîn gundai, nav heval-hogirada xwedanê ci hurmetêye. Gişk serê wî sond duxun. Çawa xûşka min Beso hinekî berê ji bext got, bexî wîyî pêşîn usan jê girt. Em rastî nepaka hatibûn. Lê, sed carî şikirdayîna Xwedê, em zû jê xilaz bûn. Nika em, hûne angorî hevdune. Cînarê

hevdune. Kal-bavêن hevdu pak nas dîkin. Me hûn gotine, derê we vekirye. Derheqa Narêda jî idî tu xeberdan nikare bibe. Wê nebe jî. Xanimeke paşe-pere sekinîye. Wekî hûn rêza bibînin, em dixwazin qewmtîa xwe wera dîsa teze bikin. "Hûn kêr, em penêr". Welleh, kî Şemo, Narê tevî hevdu cîkî bibîne, wê şâ bibe, bêje, "Rebbê Jorîn ev herd bedewê nazik tenê boynet hevdu xuluqandine". (*Vedibişire*).

Bedir – (*Dikene*). Bekirê bira! Welleh Ezîm, bille Kerîm, berya rast gotye: "Kurmê şîrî, heta pîrî". Kuro, te hela xeysetê xweyî zarotîe ne guhêrye? Berê çawa bûyî, usan jî mayî. Wî çaxî jî te giliê xweyî paşê berê digot. Lema jî hevalên xwera zû-zû pevdiçûyî. Him dihatî kutanê, him jî dikuta. Cixelîeda kesek weke te nîn bû. Bi wê cixelîe te hemû pere û kavên me ji me dibirin, em rût diman. Tê bîra te, carekê jî ez tu pevçûn? (*Dikene*). Dawîê idî tu dizanî.

Bekir – (*Nizim*). Bira, lê ez çawa bikim? Hinek merî dimizmîzînin, xwe valî-walî davêjin. Ez nikarim usan bikim. "Mis-mis" nabêjim, hema carekêva "Mistefa" dibêjim. Yanê erê, yanê na! Gur çî bizinê xwarye, mîra şûrê xwe rast girêdaye. Xwedê jî rastîe hez dike. De min armanca hatina me vekir, wera got. Ya dinê idî hûn dizanin. Nika eme benda wene. Kal-bava gotye: "Xwedanê qîza sultanin". Dîsa dibê: "Hûn kêr, em penêr". Xwedê me posîde paşa venegerîne.

Bedir – (*Çavê Beso û Têmîr dînihêre*). Bekirê bira, tê nolî mîra giliê xweyî kutasîe hema berê vekir, kese got. Welleh, ew gelekî xaşa min hat. Na, na, tê kivşê, te xeysetê xweyî zarotîe hinekî guherye. (*Dikene*). Tuyî berê ne wa bûyî. Lê min hela fikra xweye kutasîe ne gotye. (*Tîlya xweva Beso û Têmîr*

nîşan dide). Were, em vê meselê gelekî lez mexêrin. Em jî hevdu bişewirin, paşê cawê wera bişînin. Bila Xwedê silametîê bide.

Almast – (*Dengekî hêdî*). Mîro, welleh pirsa rast bîna gula jê tê. Bedirê bira rast dibêje. Em mala xweda razî bûne, hatine. Ne gerekê ew jî hevdu razî bibin. Lê gerekê em vê meselê venekin, kesîra nebêjin. Mirovîn qenc, xirav hene. Wê meselê feramûş bikin. Kengê em hevdu razî bûn, wî çaxî kî dizane bila bizanbe.

(*Xatirê xwe dixwazin, diçin. Bedir, Beso û Têmîr tenê dimînin, dengekî nizim diaxivin*).

Têmîr – (*Hinekî sert*). Bavo... (*Navbirî*). Malik avao, welleh min vê xeberdana teye îro qet tiştek fem nekir! Ew ci sewdayê tezeye te destpê kirye? Wî mîrikî fikra xwe eşkera vekir mera got. Te jî fikra xwe nolî mîra vekira wîra bigota... Yanê erê, yanê na! Bila mîrik arxanî biçûya. Idî ew ci valî-walî avîtine? "Herin, hinekî min sebir bikin, emê hevdu bişêwirin". (*Navbirî*). Hetanî nika tu kengê bi me şêwirîyî, wekî nika jî bişêwirî? Dîti yê bêjin: "Welleh, Bedir bavekî çiqasî başe, bê neferê xwe gaveke zêde navêje..." Te timê ci xwestîye, ew jî kirye! Welleh, ezê gelekî şâ bibim, wekî xortekî mînanî Şemoyî mîrxas bibe zavê min. Ezê idî rast-çep lêxim. Idî tu kesekê nikaribe derê pêş min, bade-bade xeber bide. Şemoê herdu çavêwan qulekêra derxe, korbihêle!

Bedir – (*Beso dînihêre*). Jinik, lê tu vê meselêra ci dibêji? Kurê teyî "aqil" berxwe neda, wede zûtir dilê wîda ci disêwirî, gişk vekir hilşande ser sivrê. Dilê teda ci heye? Tu jî gişkî veke bêje, wekî em bêne ser qirarekî, bikaribin wan meryara cawekê bişînin.

Têmir – (*Şa-şa ji cîê xwe radibe*). Bavo, daê, ez giliê xweyî kutasîê dîsa wera dibêjim û diçim. Ezî razîme. Ser sewdakî bisekinin. Vê bazarê rindtir bazarê rastî we naê. (*Hinekî hêrs dêrî vedike, mal dertê*).

Beso – (*Dengekî nizim*). Evdê Xwedê, ez çi dikarim bêjim? Bavê qîzê tuyî. Yeke, tu çawa bixwazî tuê usan jî bikî. Çi av min sar dibe, ci jî germ dibe. Diha rind dibe, wekî ez xwe ber baranê qet şil mekim. Lî ez dîsa jî xweya giliê xweme. Diha baş dibe, wekî tu lez nekevî, hinekî sebir bikî. Berya gotye: “Mala Xwedê ser sebrê ava bûye”. Hêdî-hêdî destê xwe têla Narê xe. Berê biemline xwe, paşê nerme-nerm fikra xwe jêra bêje. Mero, welleh, ji ewledên nika qet tu tişt naê femkirinê. Qîze, idî nêzîki bîst salîye, ya ber miraze. Idî her tiştî fem dike, dizane. Dibîni kîteb destê wê nakebin? Belki qet gotina te qebûl nekir?! Tuê wî çaxî çawa bikî? Diqewime... Paşwextî bîne ber çavê xwe!

Bedir – (*Hérse-hêrs ji cîê xwe radibe*). Keçê, ew զi giliênen tezene tu hederen, pederen xeber didî?! Tê kivşê, te lap hişê xwe unda kirye, erê?! Ça, ewê giliê min qebûl meke?! Ezê elbêra stuê te û wê kêreke kova jêkim. Herd guhêن xwe lap fire vekin, rind-rind bibihêن! Aqilê xwe beravî serê xwekin. Ezî wî wedeî heyfî, başî, pakim, ku av ser serê minra welnegerfayê, hêrs nebûme. Ku hêrs bûm, qet bavê xwe jî nas nakim. Tu wê yekê diha baş dizanî. (*Navbirî*). Dêyî, qîza xwe rind-rind bide femkirinê. Bila nav êla giranda min bêhurmet meke. Yanê nî, ezê erbetekê usan bikim, wekî hetanî nika ne kesî kirye, ne jî bihîstye. Usan bide femkirinê, bila tu deng-hisê wê dermeñ, tenê “ez qayîlim” bêje. Xwedê yek, xeber yek! Bila lap sîhê jî bêñ desmala xwe bînin daynin!

PERDA DUDA BEŞA SISYA

Perde hêdî-hêdî vedibe.

Mala Bedir rizma xweye berêda zelal tê xanê. Tu guhestinê nû lê ne hatine kîrinê. Berê çawa bûye, wê timteşê da jî dimîne. Bedir, Beso dîwanêda, Têmir kresloêda rûniştî. Dengekî nizim diaxivin. Narê pêş wan ser pîa sekinye, dike îske-îsk, hûre-hûr digirî, pê desmalê hêşirên xwe paqij dike.

Narê – (*Girî-girî lavaya bavê xwe dike*). Bavo can, ne tu timê serê min mîzdidî, dibêjî “qîza mine delal, welleh, ez xwe pirtir te hez dikim. Xwezil, dewsa Têmir tu kur bûyayî. Qîza mi jî kurê min him aqiltir, him jî bedewtire”. Lî nika çîma tu usan zû hatî guhastinê? Min hezkîrin bîra te derket?! Ne ez dixwînim. Çîma xwendina min nîvcî dihêlî? Min bedbext dikî? (*Dîsa digiri*). Bihêle ez xwendina xwe xilaz bikim. Dû wê dilê te çawa dixwaze, usan bike. Min didî kêda, bidê da. Wekî wî çaxî ez xebera te nekim, serê min qutke. Xwîna min tejî, tûlê te helal be!

Bedir – (*Cîê xwe radibe, milê wê digire, bisk û keziên wê nermehez dike, dengekî merhemet*). Qîza min, bavê te xwedanê giliê xune. Ez tucar nahêlim xwendina te nîvcî bimîne. Lî tu tenê xebera min bike. Pirsa bavê xwe erdê mexêre. Ezê wanara wî şertî jî girêdim. Lap arxayîn be. Wê dereqêda qet tu bîra meke. Kêfa xwe gelekî kok xweyke. Şemoê te timê bibe hastiûtê, bîne. Şikir, maşîna wî jî heye. (*Narê dîsa digiri*). Ew ne jî wan xorxane, wekî giliê xwe neqetîne.

Têmir – (*Dengekî bi mene*). Xûşka mine delal! Bavo gelekî meêşîne, wî bibihê. Tu ku xebera wî bikî, tucar poşman nabî. Xelqê te tilya nîşanî hevdu bike. (*Vedibîşire*). Çima tuê xortekî Şemo zêdetir bikî? Xwedê tera daye, idî ci nazya dîki? (*Dikene diçe*).

(*Narê dîsa digirî, awirên tûjva dû wî dinihêre*).

Bedir – (*Dengekî bilindî hêrs*). Qîzê, çaku gilîen min qet te kar nakin, erê?! Qet tu tiştek nakeve vî qafê teyî vikî-vala?! (*Destê xwe ber serê wê dibe*). Çiqasî digrî, bigrî. Dixwezî lap xwe ber ava zim-zimkê jî hildî, yeke, ez çawa dixwazim, wê usan jî bibe. Xeberdan, girîê zêdeye bê faydene. Diha baş dibe tu cîê xweda mînanî xanima aqil, kemal, rihet rûnêy, hezkirina min qat-qat zêde bikî. A wî çaxî dilê minda tu çawa heyî, ruê sed carî zêdetir bimînî. (*Dengê girîê Narê lap bilind dibe, Bedir lap hêrs dibe*). Qîzê, “ez dibêm hingî-hingî, tu dibêjî boçık singî”! Bese wan lîlika bibarînî! Ez çawa dibêjim, wê usan jî bibe! Tu dibêhî, yanê na?! (*Milê wê digre berbi xwe dikşîne, Disekine*). Tû, nele bê... (*Dibêje*). Here, vê şîn şepûla xwe idî darê girêde, xwe gelekî meêşîne. Navê wê xwendinê jî idî cem min qet meksîne. Te xwexwa şuxulê xwe xirab kir. Nava ûla giranda, cem qenca, xirava min bêhurmet meke, ha! Zef zêde bikî, welleh, ezê dest-pîen te girêdim, zorê bibim bavêjme mala Bekir. Heta hebî, nahêlim pîê te vê şêmîka minda têkeve hundur. Tebihist?! (*Berbi oda wê didefine, ser Besoda hêrs dibe*). Dibînî, cewrika te ci dike?! Ev gişk gunê teye!

Beso – (*Dengekî nerazî*). Mêro, dibînî, nika ci diqewime? Hal çiqasî giran dibe? “De were, vî terşî, vî diborîra derbaş bike”. Bê tuê bikaribî yanê na? Wexta min digot, hela gelekî lez mekebe, tu cawê meşîne, hinekî kûr-dûr bifikire, hêdi-hêdi

destê xwe têla Narê xe, paşê cawê bişîne. Tu germ dibûyi! Te gilîê min nebîhist. Dîsa ya xwe kir. De nika keremke! (*Navbirî*). Nizanim, ev lezketin kêra lazim bû? Qîze sore, zere, bedewe, serbarîya serda qîza mîrekî nolî teye. (*Lêvén xwe hildine*). Ci wext bixwazî, mişterîê wêyî serra sekinîne. Ev Şemo na, Şemokî dinê! (*Hinekî hêdi*). Mêro, lê dixwazim tiştekî bêjim. Welleh, tirsa te taqet nakim. Ditirsim tu dîsa minra tenzereke xaro-maro lêxî. Ci bê ber devê teyî bedew, tewî ser minda valakî. Tiştekî mehêlî. Welleh, wê rojê, Xezalê ser girtî eşaretek da min. Min him bawer kir, him jî bawer nekir. Ci bêjim. Îtbara dinê tune! Ruhê cahilayî tijîye. Hukmî ser dilê wan kirin gunekî herî mezine.

Bedir – (*Hêrs-hêrs*). Qîza nemeriva! Dîsa ew ci pirsa tezeye, wekî tu ditirsî, culet nakî minra bêjî? Keremke, keremke! Ez dil-canê xweva te dibihêm! Metirse! Wî mejûyê xweyî vikî-valava hederen-pederen, hûre-hûr, dilop-dilop dirêjî, şirîn-şirîn dililînî?! Diqewime, cewrika te xwe şewitandye, erê?! Wey-wey! Tê kivşê ezî razame! Welleh Ezîm, bille Kerîm, wekî tiştekî usan hebe, xwedanê gilîê xweme! Qesem navê Xwedê kim, ezê tafilkê berê serê te, paşê serê cewrika te pê kêreke ko jêkim, of nabêjim! Goştê we bavêjime ber tejî, tûlê dermalê! Nahêlim tu kes destê xwe bide we! Dest daya jî tevî we bikim! Tebihist yanê na?! Lê, hema ewe li min kêm bûye! Çiqas serê minê sax be, ezê erbeta bibînim! Hişê xwe beravî serê xwekin! Ciô xweda aqil, rihet rûnê! Boy ruhê xwe bifikirin! Ezê...

Beso – (*Hinekî culet*). Mêrê minî delal, usan zû hêrs nebe. (*Cûrê ber dilda hatinê*). Çima hesp te usan zû direvîne? Hinekî sebir bike. Hezdikî min lap bukujî, ne kujî, çâ dikî, bike. Hêdi idî rastî vekim tera bêjim. Duh Xezalê dizî Narê minra

got: "Qîza te û Nadoê dersdar zûda hevdu hezdikin". Mesela ese eve. Îdî çawa difikirî, bifikre. Ez çi bikim? Bêje, gunê min çîye? Wekî tu serê min jêdikî, goştê min jî didî tejî, tûlê ber derê mala xwe, loma jî qîza te usan mehkem sekinye, serê xwe kevira dixêre. "Na" dibêje. Nika tu dizanî, qîza te dizane. Herd hevdu aqil bikin. Bi sond, bi selawet, ez îdî tucar tevî mesela we nabim. Ne reş dibêjim, ne jî sipî dibêjim. Şuxulê weye. Hevdura ziman bibînin. Min gilîê xwe got!

Bedir – (*Dengekî hêrsî bilind*). A, ha! De wekî usane, we zû bigota! Dêmek, we îdî bin pirada malok çêkirine! Welleh rinde! Şikir! Şikir! Îdî boçka dîk hate xanê! We tuyî bin zimanê hevdu kirîe, loma usan xwe heyîf nîşan didî! "Tu dizanî, tu dizanî" dibêjî! "Ewleda teye, çawa dixwazî usan bike". We îdî av bin min reşandye! Welleh we lap hişê xwe unda kirîe! Sema, qîza sema! Ez bav-kalê Nado nas dikim?! Yanê ew bav-kalê min nas dike?! Ez bi çî wî amin bibim, wekî qîzê bidime wî mielimê gund-gund gerîa! Îro li vî gundîye, sibê gundekî dinê! Îja, ezê hemû şuxul-emelê xwe berdim, gund-gund dû sema te biggerim, erê?! Hazir mişterîe minî ber derê mine. Em deh bavên hevdu nas dikan. Cînarê salanin. Qenc-xiraviên me timê yek bûne. Rojêng tengda pişta hevdu sekinîne. Sema te vê malê derte, dikeve wê malê. Wê timê ber çavê me be. Îdî vê rindî çi dixwaze? Vê bazarê baştir bazar heye? Dîsa jî dibêjim, wê hezkirin, wê mezkirina xwe mejûyê xweyî dew lêketî derxîni. Sewdaên usane pûce, vikê-vala ber guhêñ min tu avê naxûn. Min îdî mîrikara cawa xwe şandye! Sema te bimre, ya endêya bimîne, şûna wê tenê mala Bekire! Min wî serîda wera qetû xwe danyel! Ew sewdaê weyî arode, qîr, berîê bişewite jî, hûnî serê xwe nagre! Xwe ber baranê şil mekin! Hûnê biqîflîn! Min

hespê cîna sîyar mekin! Destê xwe aqil, kemal, rihet daynine ser dilê xwe, bazara minra qayîl bibin. Rojê sed carî rabin, rûnêñ, Xwedaê xwe şikir bikin. Rehmê bidine dê, bavên min. Nanekî bixun, yekî nezir bidine tî-birçya, bila dua we bikin. Dîsa dibêm, sed-sed carî şikirbûna xwe bînin.

Perde berjêr dibe.
Mala Bedir nav tarîstanêda naê xanê.

PERDA DUDA BEŞA ÇARA

Perde hêdî-hêdî bilind dibe.

Mala Bedir tê kivşê. **Bedir**, **Beso** û du pîrejinêñ nûranîe dîwanêda rûniştîne, hevdura diaxivin. Vê demê ji devra dengekî nerm ban dike: "Xwedanê malê!" Derî hêdî tû kutanê. **Bedir** zû dêrî vedike. Hinekî paşda vedikişê. Kek Ezîz, Bekir, Melle Rzgo, Almast û çend mirovêñ gund ilkevine hundur.

Bedir – (*Vedibişire, dengekî hêdî*). Keremkin, keremkin. (Bekir çavê wî dînihêre, hinekî piê xwe xweî dike. Bekir destê wî dîgire berbi xwe kaş dike). Kuro, malik avao, tu xwe usan dûr iligri, dîtîê bêjin tu qey cara yekêye hafî vira. (Dikene).

(Mêr ser stûla, krêsloa, jin dîwanêda rûdinêñ. Beso zû ji (î) xwe radibe, berbi kulînê diçe, wekî tividarekê mîvana bike).

Bekir – (*Dengekî hêdî*). Xûça min, hela zûye, lez mekeve. Berya gotîe: “Berê kirik, paşê xurik”. (*Beso paşda vedigere. Bedir, Bekir çavê hevdu dinihêrin, vedibişirin. Bekir çavê Kek Ezîz dinihêre*). Kek Ezîz, tu çawa rûsipîê gund gişkî, usan jî rûsipîê minî. Çawa wekîlê min, tu Xwedî extîyarî. Keremke. Derheqa hatina armancameye vir giliê xwe bêje, her tiştî zelalke. Bila hemû bizanbin, em boynet ci hatine.

Kek Ezîz – (*Dengekî nermî maqûl*). Bekir, ez gelekî te û xûşka xweye Almast razîme, wekî we çawa rûsipî ez dame pêşya xwe, anîme mala Bedirê bira. Xwedê we merivaê kêm meke. Bi zana aqilê min, armanca hatina me Bedirra eyane. (*Navbiri*). Bedir can, berê ewil, ser hezkirina Rebbê Jorîn, paşê bi xwestina malbeta Bekir, me piê xwe iro boynet armanceke şîrîne here delal danye vê şêmîka te. Ez aminim, wekî emê hevdu fem bikin, bêne ser mexsedekê. Înşanllah, tuê me posîde paşda venegerînî. Emê eşq, şâ ji şenîê te herin, wekî Xwedê li hevdu bîne. Em dixwazin wekî keça teye bedew, şagirta mine hezkirî, Nara teye delal Şemoê kurê Bekirê dostî tera bixwazin. Kal-bava berê-berda gotye: “Qîzek ya kurekiye”. Extîarî ya teye. Welleh, dîtiê heweseke mezînva bêjin, “Xaliq Alem ev herdua hema boynet hevdu xuluqandine”. (*Vedibişire*). De, gelî hazira, min deynê xwe qedand. Ez giliê dinê dispêrime we. Şuxulê mayîn ewê jî idî hûn dizanin. Pirsa kutasiê dikeve allê Bedirê bira. Eme hîvya bersîva wîne. Ew ci bêje, ci qaydeylêxe, emê ber defa wî usan bireqisin. Berya gotîe: “Em penê, ew kêr”. Çawa dixwaze, bila usan bibire. (*Dikene*).

Bedir – (*Serê xwe bilind dike. Dîna xwe dide hemî hatya. Dengekî nizmî zelal*). Gelî biraên mine pir qedir! Hûn ewil ser serê min, ser çavê min hatine. Kek Ezîz çawa rûspîê Bekire, usan jî rûspîê mine. Em herd jî şagirtê wî bûne. ||

pewîst bû, wî hemû got. Xebera rûspîa kirî, poşman nabe. Ez û Bekir hevalê hevduya zarotîne. Hinekî pismamtya me heye. Timê cînarêne hevdu bûne. Şuxula xêrê xêrê tîne. Bila Xwedê şuxula zyanê nede. Wekî we tewa rewa dîtye, boynet vê meselê derê min vekirye, Xwedê jî zane, hûn gişke bal min ezîzin. Xwedê bimbarek, pîrozek bike! Ez jî boynet xatir û hurmeta we ezim qîzeke, wê jî qurbana we dikim. Dubar dibêjim – bila Xwedê bimbarek, pîrozek bike!

Kom bi hevra – Xwedê rûte sipîke! Bila Rebbê Jorîn hezar carî bimbarek, pîrozek bike! Xwedê te merivtaê, qewmtîê kêm neke!

Bedir – Hûn vê gavê jî dikarin nîşanîa xwe daynin. Malbeta mine jî bi dil û can qayile.

Bekir – (*Dengekî şâ, berbi Almastê dibe*). Xanima mine şâşe, pere, şereze. Idî hîvya keyî? Kêra çav dikî? Vê rojê şirîntir rojê din hene? Rabe, deyl-hiçikên xwe hilde, derê meydanê. Şuxulê xwe biqedîne!

(*Almast ji berîka xwe gustîl û bexdaikê derdixe, teví Beso şâ-şa diçe oda Narê. Dema nêzîkî Narê dibe, Narê paşda vedikişe, hêşirên xwe paqij dike, dengekî bilind digirî. Nahêle Almast nêzîkî wê bibe. Almast gustîlê û bexdaê bi hêrs davêje ser kraveta Narê. Dêmekî xeyîdî, posîde paşda vedigere. Dengê girîê Narê lap bilind dibe. Hemû çavêne hevdu dinihêrin, guhêne hevduda dikine piste-pist. Bedir zû ji ciê xwe radibe*).

Bedir – (*Dengekî pir xwe amin berbirî wan dibe*). Gelî mîvan, dost û pismamê mine hêja! Fikra xwe medine wan. Tîştîn vik-valaye, bê hîm. Dilê xwe lap germ xweykin. Ew şîn-şepûlê mînanî tavîa barana baharêne. Ewe bê wedene, bê dawîne. Nişkêva gur têne, derbekêva jî zû xilaz dibin. Pişti wêra taveke zêrîne bîna misk enperê jê hatî dertê. Dîsa erd û

ezman rûê merya dikenin. Keskesor dertê. Gul gazî gulê dike, bilbil gazî bilbilê dike. Ez mîrim. Min ci gilî daye, ewê jî bê qedandinê. Hûn dikarin sed seleffi arxayîn herine malên xwe. Fîkrêne dine başqe serê xwe derxêrin. Qet nerihet nebin. Extîyar îdî ya weye. Hûn dikarin lap sibê jî, dusibe jî, yanê jî kêfa we kengê xwest, bêñ deweta xwe bikin, bûka xwe bivin. ïzna tu kesî tune wera bêje ser çavêñ we buru hene. Yanê jî kêm-zêde xeber bidin. Kî jî gaveke usan bavêje, ewê hêla minda bersîveke usane sert bistîne, wekî heta hetayê ji bîra wî wê derneê - mîr be yanê jî kulfet be. "Xwedê yeke, gilî yeke". Hetanî nika tu kesî culet nekirye, wekî tiruşî ser qeleça min bike, we bihîst?! Aminim, nika jî kesê nikarbe tiruşke.

Melle Ehmed – (*Dengekî durû*). Bedirê birazî! Mala te sed cara ava be. Eme vir mala Xwedê ji te razîne. Ev qedir, qîmetê, ku te îro mera kir, serê me, serê hevtê hevt bavê me zêdetire. Bila Xwedê tu cara kerema xwe ser te kêm meke. Berya rast gotye: "Gîha ser koka xwe şîn dibe". Welleh! Hema rehme lê bûyê bavê te jî nolî te bû, ci digot, wekî dinê xerab bibûya, serê wî jî biçûya, ew bê tirs, bê xof diqedand. Mineta xwe, Xwedê pêştir tu kesî nedikişand. Xwedanê gilîne xwe bû. Eferim! Kurê baş bavê baş diçin. Bi zana aqilê min, îdî her tişt çawa pêwîst bû, usan jî xilaz bû. Lê, bîr mekin: tiştekî eseyî ferz hela maye. Gelî birazyâ, em musulmanin. Nikarin ji qanûna dînê xwe deren. Wekî hûn ïzna min bidin, ezê bêjim, him jî hema vira wê biqedînim.

Bedir – (*Vedibişire*). Mellê meyî delal, keremke. Fikra xwe lap arxayîn bêje. Bê ev tiştê ferz çîye, wekî me hel nekirle, sergirtî maye? Bi ïzna Xwedê, wekî qeweta me bigihijê, emê elbêra wî jî hel bikin. Wê derheqêda tu tu şayîşa mekişme (*Dubar dikene*). Tu gula ber bîna meyî. Bê te em kêra lazimin?

Loma jî em ser sivra xwe berê ewil cîê herî jorîn te dine rûnişstandinê.

Melle Ehmed – Bedir, Bekir, ez delîlê weme. Şikir Xwedê, bi gotina şerîta dînê İslâmê, îdî herd gulêd me frôda bûne helalêd hevdu. Lê qanûneke dînê meyî herî ferz jî heye. Em gerekê wê qet bîr mekin. Ew jî eve, wekî îro şûnva bê mar bimînin, çavêñ hevdu jî binihêrin, wera gunekî gelekî mezinî ne baxişandî tê. Hûn, wekî extîyarî bidin, rewa bibînin, ezê hema îro jî, vî erdî, yek car mara wan jî bibirim. "Serî birî, guh seqirî". Berya gotîe: "Av çiqasî golada dimîne, ewqasî genî dibe". Bila her tişt carekêva kuta bibe. Hatina wan herd gulêdmeye vira lazim nîne. Hûn wekîlê ewledên xwene. Şikir Xwedê hela hûn herd jî saxe, silamete, huzûrê hazirin. Extarya wane destê wedaye. Hûn çawa dixwazin, extîyarîa we heye usan jî bikin.

Hemû mirovîn hazir, gişk dengekî bi hevra – Rehma Xwedê gora dê, bavê te be. Tu rast dibêjî! (*Dikenin*). "Hesin germî, germî dha rind tê kutanê".

Bedir – (*Dikene*). Mellê meyî delalî, bê qusur. Ne min hinekî berê tera got. Tu him pêş Xwedê, him pêş Resûlê Ekrem, him jî pêş vê cimaetê cavdarîke mezin dikeve stuê te. Me hêla dînda hemû extîyarîe xwe dane te. Çawa rê dibînî, usan jî bike. ïzna tu tarî bendeyî tunene tevî şuxulê te bibe, bêje tuî şasî yanê jî pirseke ne layîq tera bêje. (*Dîsa dikene. Radibe, milê wî ilgire*). De rabe. Îdî meydan ya teye. Hunerê xwe nîşan bide. Bila tew bibînin.

Melle Ehmed – (*Dengekî hêdî*). Bû, bû, biraziê minî delal. Lap arxayîn be. Apê teyî çawa lazime, wê usan jî bike. *(Hanî Bedir û Bekir dike. Pêş hevdu dide rûnişstandinê. Herd peçîlen wane destaye mezin dikute hevdu, bin lêvava ayeta mar (Kebîn) birînê hêdî-hêdî dixwîne. Xilaz dike. Vedigere rûê*

cimaeta rûniştî dinihêre. Dengekî xwe bawer). Gelî cimaeta hazır. Şikir, min îdî şuxulê xwe qedand. Hûn gişk bibin şede. Min mar ser du zérên deha birî. Gune stuê Bekirda dimîne. Xwedê bimbarek, pîrozek bike. Gelî birazîa, îdî hûn dizanin. Çawa dixwazin, usan bikin. Bila Xwedê şaya wa têxe ber derê we hemûya.

(Beso dilekî kulî, birîn, sinikêda çend fincan ça şirîn tîne. Her mirovek fincanekê weduxe. Xatirê xwe dixwazin, diçin. Bedir, Beso, Melle Ehmed û herd pîrejin dimînin. Lê dengê girîê Narê çiqas diçe, lap bilind, zelal û şewat té bihîstinê).

Bedir – (*Ser Besoda hêrs dibe*). Qîza nemeriva, ne min tera got: “Here, aqilekî baş têxe serê wê cewrika xwe”. Bila îdî min teberê dernexe! Çiqasî zûye, bila dengê xwe bibire! Yanê na, ezî hetanî we wextê heyfî pakim, wekî teberê derneketime, haa..! Derketinê, ewê jî tu dizanî! Ezê ecêbeke usan bikim, wekî hetanî nika kesî ne kirîe, ne jî bihîstîe. (*Milê Beso digre, berbi oda Narê didefine. Beso diçe oda Narê*).

Pîrejina ewil (Meta Bedir) – Bedir, Bedir, metê qurbana te be, usan gelekî hêrs nebe. Em hemû vê rojêda nolî wê giryane. Wextê rehme lebüê kalkê te ez dame Keleşê rehmetî, ez teze ketibûme sala panzda. Min destê xweyî rast, çepê hevdû naznedikir. Çavê meta te birêje, Keleş emirda hevalê apê minî Esed bû. Timê tevî hevdu şivantî dikirin. Pîrgerê hevdu bûn. Bê hevdu parî ne dikirine devê xwe. Timê dihate mala me. Min jêra “apo” digot. Nişkêva kulfeta wî çû rehma Xwedê. Du zarên wîye min mestir hebûn. Rojêkî Keleş dîsa tevî biraê xweyî mezin hate mala me. Tevî bavê min, apê minî Esed xêleke xur xeberdan. Hîştin çûn. Sibetirê dayka min hine perçê gul-gul teze anî. Gazî min kir. Ser min pîva, birî. Min qet tiştek fem nekir. Tenê şâ bûm ezê kincê teze li xwekim. Çendek derbaz bû,

Keleş dîsa tevî birê xwe hate mala me. Dîya min ew kinc zûzû li min kirin, ez xemilandim. Tarî kete erdê. Bavê min destê min girt, kire destê Keleş. Wan ez hildam birin. Çend şev, roja giryam. Paşê xwexwa aşt bûm. Bextra Keleş jî zû çû rehma Xwedê. Pênc sêwîe bin bêjîng hîvya minva hîştin. Wexta çû rehma Xwedê, emrê wî hevtê derbaz bûbû, lê eze hela tere, can bûm. Nika meta xwe rind bibihê. Qet tu fikra meke. Girîê wê nenihêre. Ewê jî xwexwa aşt be. Cahilî, lao. Fikir merya zû kal dikan.

Pîrejina duda (hevala dayka Bedire qîztiê. Bedir wêra xatî dibêje) – Bedir, Bedir, xatî qurbana serê te be. Welleh meta te rast dibêje. Xwe gelekî meêşîne. Hêrs nebe. Ewê xwexwa bigirî, xwexwa jî aşt bibe. Lao, me kîjanê bi dilê xwe mîr kirye? Kurxûşk, min bibaxşîne. Rind tê bîra min: eze çarde yanê jî panzde salî bûm. Rojekê du mîr jineke navsereyê min nasnekirî hatine mala me. Wê şevê mala me man: Min dît, wekî ew bavê min hevdura şirîn-şirîn xeber didin. Carma jî hêla min dinihîrin, dikenin. Femê min nedigihiş, wekî ez guhê xwe bidime ser xeberdana wan. Lê gilîk min bihîst. Bavê min bîst pez got, wan panzde gotin. Sibêtirê dayka min wê jinê ez xemilandim. Min kincê teze ku dîtin, gelekî şâ bûm. Nîvro min hespekê syar kirin. Wan ez birim. Em evarê gîhîştine oveke ne mezin. Ez kirme konekî çûcikî, kevin. Pêş min perdeke qirêj kişandin. Jinek tenê bal min ma. Xêlek derbaz bû, ew jinik jî çû. Nîvê şevê nişkêva mîrekî rûî rehman perê perda min vekir, kete hundur. Ez jê xof girtî bûm, rabûme ser pya. Berê xwe jê guhast. Ew kenya, got: “Dûkê can, berê xwe min meguhere. Ez – helalê teme. Tu boy min anîne”. Ez çend-çend roja, şeva giryam. Min dît, feydê girî funene (*dikene*), paşê xwexwa aşt bûm. Zef xwe meêşîne, ewê jî bigri, paşê xwexwa aşt be. Bimbarek-pîroz be. Bazareke rinde.

Melle Ehmed – (*Dengekî nerazî, berê xwe berbi wana dike*). Canim, ev ci pit-pitkin hûn dibêjin? Ez nizanim, “em giryane, em zêryane, ber hêwan bûne daykên sêwya. Nîv cî, nîvê rê mane...” Xwe kafir mekin! Ev edeta rehme lê bûyê pêxemberê meda maye. Resûlê Xwedê jî çil salî Ayışê xanimê mestir bû. Besin, besin, rehme dê-bavê webe! Terka wan pit-pitke xweye vike-vala berdin! Bav-kala gotye: “Barê qîzayî girane, kê pişta xwe da ber. Mesekine, zû bide piştê, bila bibe”. Xilaz bû, çû. Xwedê bimbarek, pîrozek bike! Welleh Ezîm, bile Kerîm, vê bazarê rindtir tu bazar tunene. Bazareke usane başe, lap bîna gula, sosina jê tê. Kuta bû çû! Îdî ev çîrokên we kêra lazimin?

(*Herd pîrejin çavê hevdu diniherin, hêdî-hêdî dikine piste-pist. Lê dengê wana tê bihîstinê*).

Pîrejina ewil – (*Berxweda*). Heylê quzulqutê çûyî. Binê bê çawa tûje-tûj me dinihêre. Xeberdana me nevqa wî digire. Ewa jî feqîra Kewa rehmetî bîst sala zêdetir mestir bû. Belengazê heta roja mirinê jî wey dil, wey Hesen got. Merez girtî bû, ber hêwan çû ax berê sar. Kezav, zora pera ew sendi bû. Dinihêrî, melûm, roj bi roj cahal dibe, wê bibe zevzevî ber devê cehnemê.

Pîrejina duda – (*Dengekî kasil*). Xûşka Senem, te lap ji kûraya dilê min xeberda. Tu zanî ev melûma çîye?! Wî bê murvetî ew êdik nemane, ne kirye. Wî zulm dihanî serê Kewa belengaz. Wê serî li wî dane danî. Wî jî ew şev, roj cîê sekinî davîte bin pehîna. Kutaî, kutaî emrê wê xar. Heyfa xwe jê derxist. Şande qebra sar. Tu bûyî şedê gunê wîyî îro! Kezav boy xêra xwe ev şuxula bê îsafe, bê ayîk, çawa hev simand. Av bê

şêlû kirî xwera mesî girtin. Wî gelek cahilê wa bedbext kirine. Hezar-hezar neleta Xwedê li wî bê. Ewê boy gunê wan cahila agirê cehnemêda bibe rijî. Cîê wî tenê cehnemeye.

(*Narê çavê hêsir ji oda xwe dertê. Dixwaze here. Beso nerm, hêdî milê wê digire*).

Beso – (*Dengekî nizmî, milahîm*). Lao, dayîk qurban, idî girîê xwe xilaz bike. Bavê xwe bibihê. Gilîê wî erdê mexêre. Nav êlêda xelqî navekîye, bavê teyî du navane. Bêhurmet meke. (*Berxweda*). Lê, ez belengaza, ez qertala xwelya kîjan welatî ser xweda elekkim. Mecbûrim wa bêjim, ber dilê wêda bêm. Belkî hinekî aşt be. Dilê wê vepesire. Yanî baxirê wê biteq! Yeke, ew dilkevir çawa bixwaze, wê usan jî bike. Xwe pêştir gilîê kesî nake, nabihê. Xwe gişka zanetir hesab dike. Qîza min, te bihîst? (*Hêsirê xwe paqîş dike*).

Narê – (*Kelogiri*). Êêêê, dayka mine belengaze, feqîre, çavgirtîye, ji emrê xwe tu tişt femnekirî... (*Kesereke kûr dikişîne*). Dinya boynet bavê min şevereşe, ew pêş çavêن xwe pêştir tiştekî navîne. Kesî ha ji derdê kesî tunene. (*Dengekî bilind digirî. Destê xwe ji destê dayîka xwe derdixe. Wê hemêz dike, diçê*).

**Perde hêdî-hêdî berjêr dibe.
Dik nav tarîstanda minê dibe.**

PERDA SISYA BEŞA PÊNCÂ

Perde vedibe.

Dik nav ronayêda zelal tê xanê. Xalîçeke mezine raxistîye. Stol, stûl, dîvan û du krêşloye danîne. Narê û Xezal dîvanêda rûniştine. Narê dengekî biliñd digirî, zû-zû hêşirên xwe paqij dike.

Narê – (Dike îske-îsk). Qîzê, ez nizanim, te nama min gîhandîe Nado yanê na? Ev xêle wedeye ji wî tu deng-his tunene. Nizanim, ew bê îsaf çîma usan dike? Diqewime ew Welleh, hindik dimîne dilê min lap biteqe. Qet carekê jî xwe nîşan nade. Xûçê can, qurbana teme, dîsa xwe bicerbîne. Belki tu wî bibînî? Lê tu ezyetê min nekişînî, kî bikişîne? Qîzê, ez nav agirê cehenemêda dişewitîm! Qet vêca te nîne? Em bûne xûşkên hevdu. Me bavê xwe kuştie, wekî gorê sond buxun?! Agir çiqasî dişuxule, helepêtia wî ewqasî bilind dibê. Îlac tenê tuyî. Xwe çalî-balya xe, belki tiştekî bikî! Tenê bila bê! Destê min bigire, kuda dixwaze, wêda jî bibe. Ew jî, ku bê îtbar derket!.. Îlaca min sar minra diha başe, ne ku bibime jîna wî evseneyê, herediyî ser goveka gerîyaî. Mirine guh seqirîye. Qet nebe meriv wêda rihet radizê. Kesek ne te dileqîne, ne jî diêşîn. (Kesereke kûr dikişîne). Ax! Ax! Bavo! Bavo! Ev ci zulme tu tînî serê min?! Min ji te qet ev yeka bawer nedikir! (Digirî).

Xezal – (Wê hemêz dike, maç dike). Qîzê, dîn nebe. Ew ci xeberdane tu dikî? Na, na. Bila xuşûşîn usan qet nekevine dilê te. Nado ne xordekî ewqasî bê îsafe, wekî te usan zû bîr bike. (Dikene). Ew te pêştir keseke din hiz nake. Gula ber bîna wî tenê tuyî. Welleh, min qet bawer nedikir, wekî tu ewqasî wî hiz bikî. Qîzê, havîne, mekteb hatine dadanê. Dersdarê dûr hatî tew çûne malê xwe. Nado ne gundê me, ne jî nehîya meda dijî. Ez ci bikim?! Min wê rojê nema te da Kerem. Wî got: “Nado çûye Lênîngradê. Akadêmîa dewletêda para kurdî heye. Wir intamê aspirantûra dûreke dide. Wê zûtirekê bê”. Delala min (dikene), qet ewqasî fikra meke. Ew çiqasî jî dereng bikeve, çawa bê, wê elbêra meselê hel bike. Ew ne kurekî ewqasî bê destî, bê pîyî feqîre. (Vedibişire). Hûnê herine Lênîngradê, ezê qet nekevime bîra we jî. Kêfê bibe kêfa we. Tuê xwera hevalên daha baş bibînî.

Narê – (Dengekî gazin). Èêê, xûşka mine delal. Ez ci difikirim, tu ci dibêjî? Berya gotye: “Bizin ketye heya ruhê xwe, quesav bez digere!” Qîzê, min qet bawer nedikir, wekî tuye ewqasî bê îsafi! Wekî ez herime serê wê dinê jî, Xwedê kim, qet te rokê jî bîra xwe dernaxim. Ew çiqasî dereng bê, şuxulê me ewqasî xirab dibe. Ber çavê min, xêngi te, wî pêştir idî tu kes naê kivşê. Ez tenê zû hatina wî dixwazim. Tenê bila çavê min çavê wî kebin, idî tiştek minra lazim nîne. Ya Nado, ya! Wekî ew jî... Ezê xwexwa bextê xwe hel bikim. Gora sare hîvya min sekinîye. (Digirî). Wî wedeyî bavê mine bizanbe, wekî ci gune û şaşîkî mezin kirye. Lê idî wê dereng be. Ax! Ax! Bavo! Bavo! Ev ci zulme tu tînî serê min! Çima nahêlî ez mirazê xwe şâ bibim?!

(Vê demê Beso tê cem wan. Nav mitalada Narê maç dike û qirikê evraz dibêje).

Beso – Lao, ez qurbana bejin-bala teme, lê tuê hetanî kengê wan hêşirên şewat bibarînî, xwe birêncînî? Hinekî jî navbirî bide! Qîza min, şuxulê Xwedê kes nizane. Bende ya xwe dike, Xwedê jî ya xwe. Xwedê xwe qet bîr meke. Rebbê Jorîn qismetê te kî nivisye, ewê jî bibe para te. Rabe! Îdî bese! (*Berê xwe difetlîne*). Dayîka te bimire. Xwezil min tu qet neanyayî, ev zulma te nedîta. Tuê xortekî wî baştır bikî? Bavê te timê dibêje, kurê mîrik mîrekî serê sed mîrane. Hevalêن teê timê xwezilya xwe te bînin. Tuê gişka rindtir bijîy.

(*Nişkêva derî vedibe, Têmîr halekî pir perîşanda dikeve hundur*).

Têmîr – (*Destê wî, dev-lêvîn wî diricifin, zû-zû diaxve*). Daê! Daê! Tu dizanî... (*Navbiri*). Îro qezyake çawa mezin li me dest daye! (*Dîsa navbiri*). Nehîyêda dizîke gelekî mezin bûye. Diza mirovek jî giran birîndar kirine. Diqewime bimre jî. Wana çawa hevalêن xwe navê Şemo jî dane. Îro mîlisîa nav gund nişkeva Şemo girtin, destê wî qeyd kirin, birine nehîyê. Min elbêra caw da apo Bekir, ew ricifi. Lezo-bezo dû wî çû nehîyê. Welleh, gunê min usan wî hat. Elbêra dev, lêvîn wî zingirîn, gewirya wî kire qurte-qurt, xeberdan pê ne bû.

Beso – (*Şa-şa ciê xwe radibe*). Kuro, lao! Bavê xwe bibîne. Vê cawa çav ronikaê zû bidêda. Şerme. Bila zû dû Bekir here nehîyê. Heta nika başqe, nika başqe. (*Lêvîn xwe hildike*). Ew dil-hinavê bavê tene. Wê me bixeyde. Ez ci bikim. Ew jî wera hindike. We sîngê xwe vekiri bû, pesin ser pesna didanê. Kevirê wî diavîte hewaê, serê xwe dida ber. De nika cawê bidin! (*Narê, Xezal çavê hevdu dinihêrin, dikenin. Beso jî dikene. Lê ser vanda giva ku hêrs dibe*). Hey porkurno, lê hûn çîma ewqasî şâ dibin? Rûnê helandî ser dilê xwe dixînin? Şerme! Der-cînarê we bibînin! (*Xwe jî dikene*).

Narê – (*Bilind dikene. Wê hemêz dike, herdu rûen wê maç dike*). Daê can, minra vê cawê şirîntir tu cav tune. Ezê Xwedê gelekî razîme, dengê min bihîstye. Sed car şikir, wekî wa bûye. Ew bavora, Têmîrra gelekî hindike. Ew gele cara boy Şemoê xweyî “mêrxasî, aqilbend” wê ber derê mîlisîa stuê xwe xar bikin, pirsên ne layîq bibihêن. Lap wê herne ber derê kela jî. Çîma wan ew beredîê, dizî, berdiz nas nedikirin?! Çavê xwe girtin, ez destê zorê avîtine agirê cehenemê.

Têmîr – (*Ser Narêda diqîre*). Dengê xwe bibire! Pintîya mine neşûştiye, herame! Ezê rabim herdu çavêن te rast qulekêra derxim. Hela tu min vê orgijika gemare, qulorekî binihêre! Lê, ew jî xwe meriv hesab dike! Îdî Şemo jî begem nake! Gunehkar bavê mine, wekî wedêda zimanê te jêkira, teê nika wa ne kira pile-pil. (*Hêrs radibe, pîen xwe dêrî dixîne ji dikê diçe. Narê û Xezal jî pey wî kene-ken dikê dertên. Bedir halekî gelekî posîdeda tê dikê*).

Bedir – (*Tûje-tûj çavê Beso dinihêre*). Qîza nemeriva, tu dibînî yeke ne bûye çawa giran hate serê Bedirê belengaz? Bila îdî dilê te, cewrika te lap rihet, hêsa be! Tê kivşê, Xwedê ew şîn-çepûlêن we, nifirêن we bihîstin, loma... Qet nizanim, dawîê çawa bibe? Welleh, malê minî hinekî qalim hebûya, minê xwe bida pêşîê. Nedîhîş ew xortê baş tu ezyetî bikişîne, têkeve kela. Xwedê rûê tunebûnê reşke! Wezna aqilê min, tevgirêdana Şemo gelekara hebûye. Kurê mîrik lap hetemekî teyra bû. Bila Xwedê alîkarîê bidêda. (*Dixwaze here. Beso destê wî digire*).

Beso – (*Kesereke kûr dikişîne, zelûl-zelûl çavê Bedir dinihêre*). Mîro, lê wedê min tera digot “Evdê Xwedê, hela ciê xweda hinekî rihet rûnê, her tişti hilde, dayne, sed carî bipîve, hê bibire”, tu ser minda hêrs dibûyî. Ew dima, wekî min bikuji, ser nigekî dilêistî. “Ez bavim, min çawa gotye, gerek usan bibe”. De

nika keremke, "were vî terşî vî buhurîra derbazke"! Bê tuê çawa derbaz bikî?

(*Vê demê Bekir û Têmîr nişkêva derî vedikin, geleki posîde dikevine hundur. Mér û jin elbêra dengê xwe dibirin, çavên Bekir dinihêrin. Derbara Şemoda jê dipirsin.*)

Bekir – (*Halekî kasılı, westîai*). Bedirê bira, welleh min lap serê xwe unda kirye. Qet nizanim çi bikim. Hal çiqasî diçe, ewqasî giran dibe. (*Navbirî*). Nizanim, kuda herim? Ku bigerim? Kê bipirsim? Derê kîjan îdarê, kîjan mirovî nas, nenas elbêra vedikim, devê minda lêdidin, nahêlin xeber bidim. Tenê Şemo, Şemo dibên, cîê xwe radibin, min holî devra dikan. Gelek mirovîn nehîyê ku min dibînin, destê xwe berbi min dirêj dikan, "bavê Şemo ewe" dibên, dûr diçin. Bixwazin, nexwazin rya xwe ser min diguherin. Tenê hîvya min maye Rebbê Jorîn.

Bedir – (*Dengekî heîri*). Bira, lê axirîê çawa bibe? Lê qet îmkanek tunene? Disa valî-walî here. Qet nebe mirovekî nas bibîne, tiştekî bavêje dêv, belkî ew hinekî arîkarîê te bike. Ser şuxulra bisekine. Yanî malda rûniştinê şuxul pêşda naçe. Ezê jî sibê herime nehîyê. Çend dostê mine rûmete kevin hebûn. Belkî yekî, duda bibînim, jê hîvî bikim. Ax, ax rojê çûyî! Dost hebûn, heval hebûn, hurmet hebû...

Bekir – (*Kesereke kûr dikişîne*). Eh, Bedirê bira, te çi unda kirîe, tu çi digerî?! Min devê xwe li kê vekir, kes li min nebû xweyi. Rastî jî, ev dinya – dinyake gelekî bê îtbare. Mirovîn ku min tevî wana tonnavâ nan, av xwarîe, ev nika min dibînin, selame nadine min. Rya xwe ser min diguherin. Îêê, vê şûnva îdî ez çi dikarim bikim? Dîsa hîvî, homit maye Xwedaê mezin. Belkî ew dergekî xêrê li rûê Şemoê min veke. (*Bekir ji dikê diçe. Bav û kur dimînin*).

Bedir – (*Dengekî nizim*). Kuro, lao, lê tu qet hinekî haj ji şuxulê Şemo heyî yanî na? Belengazê Bekir lap serê xwe unda kirye. Binihêre, bê cimaeta gund dereqa wîda çi xeber dide. Te ku dît kîderê du-sê merî kom bûne, dikine piste-pist, dizîkava zû here nêzîkî wan bisekine, guhê xwe bide ser axavtina wana. Belkî qet nebe, tiştekî ji wan hîn bibî. Zû cawê bide min. Kal û bavêne gotye: "Giliê êlê zû, dereng rast dertê". Ew qewmandina êl ku pê dizane, Xwedê pêştir kesek pê nizane. Lawo, ew hetanî nika gundiê me bûn, lê nika xinamîe mene. Gerekê em serya ser Bekir nebirin. Cimaetê me bikene, binelîne.

Têmîr – (*Hêdî netika xwe mîz dide, kesereke kûr dikişîne*). Şemo... Şemo... Bavo can... (*Navbirî*). Çend roja berî vî çaxî dewletê xwe sûda Şemo û hevalen wî kir. Eyan bû, wekî Şemo wanara zûda hevaltî kirye. Vê dizîê pêştir tevî wan gelek şuxulên xirab kirye. Dewletê her yekî heyşt, neh, deh sal guna danê, şandine Sîbîra sar. Şemo jî deh şal dane, ew jî şandine Sîbîrê. Boynet dilikê te, daê ne dihîst ez vê cawê bidime te. Bekir jî ji te vedisêre. Çima tu nabînî, mîrik lap nîvî bûye?!

Bedir – (*Serê xwe berjêr dike, xêleke xurt dikeve nav mitala*). Lao, xwezil te vê sibê zû qet ew cawa neda min. Wekî min nizanbûya, wê dha baş bûya. (*Cîê xwe radibe, nav malêda valî-walî diçe, tê, evraz, berjêr dinihêre. Xwîya netika xwe paqîj dike. Kesera ser kesera dikişîne*). Heyf, sed heyfa wî xortê çapikî, çelestanî, comerdî, mîrxas. Welleh Ezîm, bile Kerîm, kurê mîrik serê sed mîrî bû. Lap xalê xweyî Hesen çûbû. (*Dîsa netika xwe mîz dide*). Lao, lê dû wî kî weê mezintaya cahalê gund bike? Kî weê derê pêşia cahilê gundên din? Lao, tu xwe bide pêş. Navê min unda meke. Qencî, xiravîe timê cotin. Wî nedihîst tu kesek tiruşî ser gund bike. Qedrê wîyî bal min gelek pir bû. Boynet wan senetên wîye qenc min wî pir hiz dikir. Kurê

mêrik nav weda nolî beranekî kelî şışme dihate xanê. Çavê merya jê têr dixwar. Boynet wê mérxaşa wî min Narê da wî. Welleh, nolî qîzekê dilê min ketibûê. Xwedê mérê mérxase nolî wî kêm-kêm dixulqîne. (*Dengekî nizim*). De were, bê tuê nika ber tel-niçen wê qîza nemeriva, wê cewrika çawa teyax bikî? Ci cawê bidî?

Perde berjêr dibe.

PERDÊ SISYA BEŞA ŞEŞA

Perde vedibe.

Dik nav ronayêda rizma xweye berêda, bê guhestin zelal tê xanê. Nado û Kerem dîvanêda rûniştîne, şâ-şa hevdu dînihêrin. Geh dikenin, geh jî hevdu hemêz dîkin, şirîn-şirîn diaxivin.

Kerem – (*Dengekî nizim*). Bira, welleh ezî bê hesav şame, wekî şikir tu idî qebûlî aspîrantûraê bûyî. Ev boynet min bextewarî û kubarîke pir mezine. Te idî rêça min jî vekir. Îzna Xwedê, ezê jî saleke din hermêda. Lê, bê însaf, tu kengê hatî, li kuyî, ku digerî? Me digot, yeqîn tuê idî wir bimînî. Tê kivşe, te idî bîr kiribû, wekî xêنجî min, Xezalê, vir dîsa çavnihêrîke teye din jî heye? Ew jî ci çavnihêrî, keweke çav nexşîne, nukul sore,

şaşe-per. (*Dikene*). Welleh qîza mêrik hindik dima deyil-pêşen me biqetîne. Seva te ne roja wê roj bû, ne jî seva wê şev bû. Rojê bawer bike sed carî gelektir ew te ji min, Xezalê dipirsya. Kuro, pake wekî tu wededa hatî, derketî, yanê... Yanê na, Narê wê dinê xirav bikira. Ez nikarim kirinên ku wê dikirin, nolî şikilkêsekî bînime ber çavên te. Çetinaê dikişînim. Xwedê nîşan mede. (*Dikene*).

(*Vê demê Narê û Xezal kene-ken têne dikê. Her çar hevdu hiz kirî, dilekî pir kamçû, hevdu maç dîkin, hemêz dîkin. Dengê kenê wan bilind dibe. Narê cem Nado dîvanêda rûdinê. Xezal û Kerem krêsloada rûdinê. Ew jî hevdura kene-ken diaxivin*).

Xezal – (*Çavê Narê dînihêre, nerm dikenê*). Xûşka mine bê sebire, bê tawet. (*Navbirî*). Ne te boynet demeke waye şirîne, arxanî hindik dima dinê xirav bikî. Te roj, şev “Nado”, “Nado” digot. Kanê, kuye, kuda çûye, çima qet kivş nabe?! Dinê, alem beravî ser serê me dikir. De idî keremke, destpêkê hetanî nika ci qewimîye, ci bûye, ci xwestekên te hene, tewî jêra şirîn-şirîn qual bike. Demên waye arxanî zû-zû nakevine destê we. Tiştekî idî bin berêda mehêle.

(*Kerem tevî axavtina Xezalê dibe*).

Kerem – (*Vedibişire*). Narê can, xûşka mine bê bawere, bê sebir. Serê bavokim, Xezal rast dibêje. Bextê teme. Dilê xwe heta kutasîe veke, şûrê xwe rast, çep bide xebatê. Tu tiştekî paşda nehêvşîne. Ji aliyê minda arxayîn be. Min nema te idî daye Nado. Ew haj hemûyî heye: ci qewimîye, ci bûye. “Dem, dema teye, xirebend jî xatya teye”. De, bi xatirê we. Çawa dixwazin, usan bikin. (*Dikene, destê Xezalê digre*). Bimînin silamet. Em cûn.

(*Xezal û Kerem ji dikê diçin. Nado û Narê tenê dimînin*).

Nado – (*Dengekî heyîriyî, birçî, Narê hemêz dike, hevdu maç dikan*). Delala min, dilê teda çi heye, gişkî arxanî bêje. Ez tuye îdî tenêne. Hêrsa xwe hevsâ xweda xweyke. Bêje, wekî dilê te rihet bibe. Giliê xweyî dawîjî veneşêre. Ezî av-danê xweva bi dil û canî hîvya teme. Te dibihêm. Çawa dibêjî, ezî hazirim. Xwedê pêştir, ne tu kesî fedî dikim, ne jî ditirsim. Ev serîye, ev oxire. Emirke, ez biqedînim! (*Dîsa hevdu hemêz dikan*). Bêjî rabe, ezê rabim, bêjî rûnê, ezê rûnêm. Lê, bêjî here, welleh, ez naçim! (*Dikene*). Em gerekê xwexwa bextê xwe safî bikin. Hîvya tu kesî jî mesezin. Kesekê usanî Xwedê hezê jî peyda nebe, wekî destê me têke destê hevdu, “wera oxirbe” bêje. Em gerekê serê xwe hildin, yek car ji wî welatî dûrkevin. Rya here heqe rast eve. Hîvya qirarê teme.

Narê – (*Çavê Nado dinihêre, dengekî kasil*). Nado can, min qirarê xweyî kutasiê nemêda nivisîe. Qirarê duda îdî nikare biqewime. Dilê te çawan dixwaze, usan jî bike. Min îzna xwe sparte te. Bêjî em herin, ezê berî te hazir bim. Bêjî sebir bike, ezê sebir bikim. Ezê tevî te herime wî serê dinê jî. Bila her tişt bi dilê te be. Ez kîderê jî tevî te bimînim, ezê xwe bextewara dinêye here hetev hesav bikim. Îdî ne ji kuştinê, ne jî tiştên din natirsim. Şikir Xwedê! Kes nikare bêje ew hevseneê kengê bê? Hatinê jî wê çawa bê? Kor bê, topal bê? Ewê jî Xwedê dizane. Min gotye: “Ya ezê bibime qismetê te, yanê jî bivime qismetê ax-berê sar”. (*Dixwaze rabe. Nado destê wê digire, berbi xwe kaş dike. Hevdu hemêz dikan*).

Nado – (*Dikene*). Qîzê, min ev culet qet ji te bawer nedikir. Tu ji min qoçaxtirî. Berya gotye: “Ya dest dike, dê-bav nakin”. “Yan mirin, yan kirin!” De, wekî tuye usane hazirî, arxayîn be, îzna Xwedê, ez tuê şeveqa sibêye zêrîn li mala me safî bikin. Qet tu şayışa mekişîne. Xwedê yek, gotin yek! “Ev

serîye, ev oxire”. De here îdî rind-rind karê xweyî rêuîtî bike. (*Dikene*). Sîlahêkê jî hilde. Kal-bava gotye: “Rewî gerekê rêda be, destê wî kirinêda be”. (*Herd hevdu dîsa hemêz dikan, dikê diçin*).

(*Bedir, Beso têne dikê, dîvanêda rûdinê. Bedir valî-walî dinihêre*).

Bedir – (*Hêdi*). Keçê, keçê, hela here teselîa Narê bike. Ez nizanim, ew çima îro berî me ranebûye? Her sibê, ew berî me radibe, hewşê paqîş dike, derî bacîa dinihêre, çayê datîne, mera çav dike. Lêника çima kivş nabe? Zû here, teselya wê bike. Bê çi qewimye? Cawê zû bide min. Belkî tiştek lazim bû.

(*Beso lez dikeve oda Narê. Lê Narê ne nav cîda, ne jî odêda nabîne. Halekî xirabda zû paşda vedigere. Diricife. Zimanê wê tê girtinê. Tirse-tirs destê xweva banî Bedir dike. Diyawqîne*).

Beso – Êêê, mala bavê te ava be! Narê odeda tunene! Kincên wêye ku herro xwedike, ew jî tunenin! Hela zû were, zû were! Bê ev çi emele?!

(*Bedir direve. Derê oda Narê vedike. Hêrse-hêrs nîvînê wê valî-walî weldigerîne. Bin belgîê wêda kaxetekî piçûkî hev pêçayî dibîne. Kaxet lez herif-herif hêdî-hêdî dixwîne: “Bavo can. Te nexwest bextê min bi xwestina dilê min safî bikî. Zef te razîme. Îdî arxayîn be. Min bextê xwe bi destê xwe tewî Nadoê dersdar hel kir. De bi xatirê te. Bimînin silamet. Min negere!”*).

Bedir – (*Dengekî bilind ser Besoda diqîre*). Heyvana, qîza heyvana! Îdî dilê te rihet bû?! Çavê te ronik be! Te digot (*devê xwe xar dike*): “Qîze, guneye, sore, zere, ewleda teye! Lez mekeve. Bila xwendina xwe kutake. Paşê çawa dixwazî usan bike...” De were, cawê bide! Te zû-zû navê wî qurumsaxê, nizanim seyê kîjan kulînêye dikişand! (*Navbirî*). “Dersdare,

xortekî hêjaye. Mirovên gund tew hurmeta wî digirin! Nanê wîyî hazırî destê wîdaye". Bisekine, bê ezê nika serê te, serê wê nolî heyvana çawa qut bikim! Gormendîkim, wî çaxî cimaetê bê temaşa min, te!

Beso – (*Hêdî, tirse-tirs*). Mêro, Xwedê te qet qebûl meke, îja min çima dikujî?! Serê min çima qut dikî?! Virda gunê min çîye?! Çima gunê xwe davêjî stuê min?! Ne gune gunê teye! Sebebê vê qewmandinê tenê tuyî! Bi min bûya, qet wa nedibû. Min wextêda tera got, te ez nebihîstîm. Te çima Şemo nas nedikir? Kevirê wî serê xwe dixist. Digot: "Cînare, em kal-bavê hevdu nas dikan. Kurê mîrik serekê sîyarane", nizanim çîye, çîye?! Te kirye, tu jî cawê bide! Çima min dikişînî meydanê? Roja ku ez dame te, wê rojêda serê min hate jêkirine. Gunê min stuê bavê min be. Hema ew jî yekî aqilê teda bû. Ez dame te – dînê, qulote! Rast gotine: "Wekî heval heval nebîne, roja wîya reş dimîne".

(*Têmîr lez tê dikê. Çavê bavê xwe dinihêre, serê xwe berjêr dike, dikeve nav mitala*).

Bedir – (*Hêrse-hêrs*). Kuro, lao, te dît? Çepela xûşka te, zimanê min jî nagre xûşka te bêjim, nava êla giranda ci tiştekî nebûyî anî serê min, te?! Wê em kirne pînekî enîşka... De were vî derdî bikişîne?! Bê tuê çawa bikişînî? Vê bênamûsiê şûnva emê nava êlêda çawa serê xwe bilindkin?! Çavê xasa, nexasa binihîrin?! Na, na!!! (*Navbirî*). Ezê nikaribim vê bênamûsiê bikişînim! Ax, ax! Ewleda xirav! Te ci anî serê min! Welleh, dilê minê biteqe!

Têmîr – (*Dengekî nizim*). Bavo can, qet usan gelekî fikra meke. Bê wê jî dilê teyî nexweşe. Boynet xwîna bilind tu temam salê nexaşxana, ber derê doxtira digerî. Çûye, bila cehmêda here, hevt kevir jî dû wê bin! Îdî wê çawa ewlêda xwe yek car

ji dilê xwe derxe. Tûyî ser wê bike. (*Berxweda*). Xwedê min wêra Kerîme. Usan bizani be, idî wî navî da ewleda te qet tune bûye. Ne tu timê Xwedê Kerîme, Xwedê Kerîme dibêjî. Nika jî Xwedê Kerîme bêje. (*Navbirî*). (*Dîsa berxweda*). Xwedê min wêra jî Kerîme. Min kengê kir, ewê wê demê bizanbe ez kîme. Wê min rind-rind nas bike.

Cend roj dibuhurin. Rojekê Têmîr nav gundda xortekî devbelara pev diçe. Evarê Eliyê nemam kurê xwe hildide, tê ber derê Bedir.

Eliyê neman – (*Têmîr dinihêre, dengekî hucet*). Kuro, lao, wekî tuyî ewqasî qoçaxî, gurxenêqî, mesîgirî, kê destê te girtî? Maşella, tuyî ducara weke minî. Here boy namûsa xûşka xwe mîrantî bike. Ne ku serê kurê minî bê guneyî, pênc sala xwe çûktir bişkêni! Qeweta xwe ser me diceribînî?! Welleh Ezîm, bille Kerîm, ezî dewsa we bûma, minê bin şevêda, dizî cimaeta gund, serê xwe hilda ji vî gundî birevyama. Biçûyama cîkî usan, ne kesî ez naskirama, ne jî min xwe nîşanî kesekî nas kirî dida! Here heyfa xûşka xwe bistîne! Bila êl tera "eferim, eferim"- bêje!

(*Têmîr tivingê tûşî wî dike, dixwaze bikuje. Bedir tivingê destê wî digire*).

Bedir – (*Halekî xirabda*). Lao, ci rast raste. Çima dixwazî mîrik bukuji? Naka jî min têkî xwedan neyar. Derdeki li min têkî duda, erê?! Dû van ten-niça wê xeberdanê idî jîna me kêra lazime?! Eger mîrantya te heye, dixwazî tim serbilind bigerî, here heyfa xwe ji wî seê kurê sa bistîne. Bila tew pêş te serê xwe xwar bikin, pate bidin, sed carî "eferim, eferim" bêjin.

Ew nebe, ji gund derketina me îdî ferze. Em nikarin vî gundîda bijîn.

Têmir çend roja şûnda sibekê zû radibe, berbi nehîya Nado têda dijî, diçe. Nîvro digihîje oxura xwe. Mala bavê Nado dibîne. Wê demê hewşa mala bavê Nadoda deweta Nado û Narê lêdikeve. Stranbêj kilama Evdalê Zeynikê “Gulê merûmê” distirê. Ev oda Narê dibîne, nişkeva dêrî vedike, dikeve hundur. Narê kincê bûktanîye sipîda dîvanêda rûniştye. Ew ku Têmir dibîne, dike wîrqînî, berbi wî direve, xwe davêje hemêza wî.

Narê – (*Dengekî eşqî, zelal*). Xûşka te qurbana tebe, tu hatî?! Ev çend rojin çavê min rya teye! Min dizanibû tuê bêy, xûşka xwe nav vê êla xerîbda tenê nahêli. (*Dîsa wî hemêz dike, maç dike. Têmir hemêza xweda nişkêva xençerûkê dilê wêda çik dike*).

Narê – (*Çavê wî dinihêre, dengekî zelûlî, şewat*). Of, bê însaf! Te çima nehîst, ez mirazê xwe şâ bibim?! (*Dibêje, hêdî-hêdî dinya xwe diguheze. Xemla bûktanîye çîl-sipî elbêra nav xwînêda gevez dibe*).

Berbû – (*Şa-şa dikeve oda Narê. Ku vê ecêbê dibîne, direve devra. Dengekî bilind diqîre*). Hewar! Hewar! Zû bikin! Zû bikin! Werin! Werin! Xortekî nenas Narê kuşt! Werin! Bigirin! Bigirin! Mehêlin, wê bireve!

Xêla mirovên dewetê tijî oda Narê dibin. Dengê defê û sazbenda elbêra tê birîne. Bin mûsîqa zelûlda perde

hêdî-hêdî berjêr dibe. Dik nav tarîstanêda naê xanê. Dengê mûsîqa şînê çiqas diçe bilind dibe. Pişt perdêda kulfetek dengekî zelûlî, şewat digerîne. Ew dayîka Nadoye.

Ezê gora xezala xwe çekim devra, cîkî dûze,
Ter kulîlka daynime ser bahar, havîn, him payîze.
Bila xelqê têlî delal lê bisekin, fathê bide,
Bêjin: hezar rehme tebe, rozgar reşa, bê miraze.

DAWÎ (PROLOG)

Sibeye. Ro îdî bejnekê zêdetir bilind bûye. Tîrêjên wêye zêrîne nazik hêdî-hêdî şûna xwe digirin, belayî rûêerdê dibin.

Xêle wedeye îdî hemû karkir ji xewa şîrîn hişyar bûne. Her yek boyonet kara xwe lezo-bezo ber bi hêlekê dimeşe.

Dayîk tebyetê libasekî hezar-hezar rengî xemilî li xwe kirye. Kakîna kewa, qibe-qiba bilbila mînanî kakîna dengbêjekî sewdalî esmanê çîkî-zelal hilcinye. Dengê bilûra şivana, hêle-hêla berxvana, kalîna berxa û mîa, şîhîna menekê kihêle zîn-basûd kirye bê sebir, zinge-zinga dengê zengilî nêrîa hebûna valada dîdemêke nebîkirîye rewş veçêkirine. Nêzîkva goristanê gundi xêlekê mezin tê xanê. Kenarê goristan goreke nûye nav kulîlkênen reng-rengîda xemilî nolî koşkeke bedewe-cindî tê xanê. Xortekî nazikî, nazenînî, bejin bilindî, simêl reş, cilêş şîneye reşe lê, pêş serkelka gorekê sekinye. Pê desmala cêva xweye dor

poxike bi morî, mircanava neqîsandî zû-zû hêşirên xwe paqij dike, çarhewardorê xwe dinihêre. Geh rûdinê, geh radibe, carcarana jî xar dibe, wenê nav kêvirda cîbûyî dilekî kasılı, şewat maç dike. Destê xwe ser kêvir digerîne. Derbazî pêş gorê dibe. Wê dubar mêze dike, vedigere cem kêvir.

Ew Nadoye. Hatye Nara xweye delal dubar bibîne, xatirê xwe jê bixwaze. Xêleke xurt wan kirinê xwe diweklîne. Derdora xwe dubar dinihêre. Ji berîka xwe kaxetekî hevpeçayî derdixe. Kaxet vedike, dengekî bilindî zelûlî şewat dixwîne. Dike îske-îsk: "Narê can, delala min, bedbexte bêmiraz. Min efû bike. (*Dîsa hêşirên xwe paqij dike*). Erf û edetê gelê meyî kevnîarı wede buhuriyî qirêj, mirovên beyanîe, ji dinya nû tu tişt femnekirî, nehîştin em mirazê xwe şâ bibin. Qismetê te wede zûtir bû ax-berê sar. Ez bûme teyrekî per-bask şikestiyî, sergerdanî, ji hêlinâ xweyî germ dûrketî. Ez bi mirazê meyî şîn giriyî, telî, şewatî nîvcî pêş gora te sond duxum, wekî hetanî dawya emrê xwe nan, av û hewa vî welatî idî tem nekim. Gişk li min heram be. Îroda ezê serê xwe hildim, terka vî welañ bikim. Berê min têkeve kîjan hêlê, wê hêlêda jî herim. Pîê xwe idî tucar daneynime ser vê axê. Naême nav mirovên vî welatî. Yekîra ne dostaê bikim, ne jî biaxivim. (*Dubar-dubar xar dibe. Wenê nav kêvirda hesreteke mezinva maç dike, kêvir hemêz dike, kûlîlken ser gorê valî-walî hildide, datîne. Hêşirên xwe paqij dike. Hêdî-hêdî ji gorê dûr dikeve*).

Wê rojêda heyâ nika mirovên wî gundî nizanîn Nado kuda çûye û li kîjan welañiye. Heye yanê tuneye.

Berya gotye: "Şuxula bê feme destê zorê ku têne kirinê, dawya wan timê dibe poşmanî û mirina bê wede".

Boynet wê jî ez li vir, vê demê dilekî pir pejmûrî êşyayî hewce dibînim, wekî vê gotina bavpîrên meye bahaqîmet dubar bînime ziman. Çawa şîret, xelat bidime xandevanê xwe, wekî ew vê gotina berîê meye lel-durva hilstrayî pir, pir cara bixwînin. Bê xof û bê tirs, wan bav û dayîkên dilkevire, ji emrê nû tu tişt fem nekirîra, culetekî mezinva gele cara biaxivin, qal bikin, wan bidine femkirinê, wekî ew nav emirda ewledê xwe bedbext û zelûl mekin. Gelek cara xastekê wanra qayîl bibin.

Bila dilî dil be,
Kiras cawê qul be.
Doşik erd be,
Lihêf ewir be.
Balgî kevir be,
Xarin nanê ceh be.
Rojekê hebe,
Hevtékî tune be,
Lê tenê bila dilî, dil be.

BILA DILÎ DILBE

Ez nav emrê xweyî ne ewqasî dirêjî, ne jî ewqasî kinda bûme şihed û tevgelên gelek bûyerên ne bîrkirîye, hime tel, hime şirîn, hime mezin, hime piç'ûk. Pir caran wan ez kirime pejmûrekî tawet ne hatî. Nav mitalên dil, hinav sotîda mîna avjenekî xwe şâşkirî, nav behra mitalada valî-walî şûşilîme. Dawîê poşman, poşman, westyayî şûna xweda nolî mirovê bêkêr rûniştîme. Tenê neleta Xwedê baîsê sedemkarêن bûyerê xirav anye. Kîn, kudereta xwe ser wanda barandye. Pir caran jî boynêt bûyerên qence, şirîn şabûme, pîrozbaya xwe sedemkarêن wan bûyer kiryara şandye. Usan jî bûye, wekî ez şabûna çûme cem wan, destêن kal-pîrêن wir maç kirye.

Bûyerên baş Xwedê jî jê hizdike. Bende jê qinyat hildidin. Ew bûyerên, ku temelên wan ser qetlê, xwînê têne avakirinê, dawya wan poşmanîke pir mezinva xilaz dibe. Sedemkarêن bûyerên qenc rast orta quesreke cinnetêda rûdinêن. Her kesê aqil rehmeta Xwedê li dê-bavêن wan tîne.

Emir nîşan dide, wekî sedemkarêن bûyerên xirav ji bêfemya xwe dikevne bin wî barê giranî nekişandî. Ew dawya wan bûyera nabînin, kirinêن xwe ewil-ewil naînine ber ç'evêن xwe. Hilnadin, danayînin, napîvin. Gendî gele diqedînin, xwe û ewledêن xwe bi ç'evêن korva davêjne nav agirê cehenemeyî şewatî, netemirî. Ew têda dişewitin, dibine rijî, nezanî, bêfemî, merezeke usane, wekî tu loxman, tebîb nikarin wê qenc bikin.

Dermanê wê tu cî peyda nabe. Mirovêن zane kirinê xwe ewil-ewil tînine ber ç'evêن xwe. Xêr, şera xwe dipîvin, dibînin, paşê diqedînin. Bûyerên qenc lel-dur bahatirin.

Xwendevanê mine delal! Min hûn hinekî westandin, ji armanca esas dûrketim. Ew jî behra agir, alava nav dilê mindaye. Loma usane kele-bîne, vanapsire. Nika ez dixwazim armanca, ku min nerehet dike, hûrgili wera qal bikim.

Nav emirda her mirovekî qenc, xirab, pir-hindik çend-çend dost û hogirên wî dîbin merîê bê dost, hogir, teyrê per-bask şikestîye. Çend hogir û dostên min jî hebûn û hene. Cem min her yekî şûn û sira wî hebû, heye ji wan gişka evzeltir. Dostekî min hebû. Sed heyf, dinya xwe guhastye. Me qedrê hevdu gelekî digirt. Çawa kal-bava gotye, "Nivîna meye şevêye hevdu cuda bû". Nolî min çend ewledêن wî hebûn. Rojekê qasidek şandye cem min, ez banî şaya keç'a xwe kirim. Ez çûm. Piştî xoş-bêşê şûnva em derketine hewşa wî. Navê dostê min Reşîd bû. Min çawa destmikerim tenê pirsek daê:

- Bira, lê xinamîte kîye?

Wî kene-ken ç'evê min nihêrî, got:

- Xinamîte min dûr menihêre, nêzîk binihêre. Xidirê biraî mine.

- Lê te keç'a xwera xeberdaye, ewê vê meselêye razîye yanê na?

Wî xêleke xurt ç'evê min nihêrî, qulapek cixara xwe da. Dengekî nerm kenya, got:

- Barîê bira, rehmeta Xwedê bav, dya tebe! Ça ku te lap hişê xwe unda kirye, - kenya. - Ew ci tiştê tezene tu ji xwe derdixî? Berya gotye: "Qîz sebeta gemarêye. Kê piştâ

xwe da ber, “na” nebêje, zû bide piştê. Para holke, bidefîne, bira here”. Kurin, keç’in, mezin bûne. Şikir Xwedê, gelekin. Gişka wedê wanî zewacêye. Wekî ez ber wan bixelim, bicelim, ber nazên wan bilîzim, ewê heta dawya emrê xwe bê jin, bê mîr bimînin. Ezê deynê xweyî bavtîê biqedînim. Paşwextîê ew çawa dixwazin, bira usan bikin. Tu ezê herim, lavaya wana bikim, bêjim: “Lawê min, aqil bin, hevdu hizbikin, hevdura rê herin”? Heta wî çaxî gorêda hestuê minê bibine xwelî. Kur, bavê wan çawa dixwazin, bila usan jî bikin. Çawa dixwazin, bila usan bijîn. Çima bavê te, bavê min em bi xwestina dilê me zewicandin, erê? Wekî ez jî wan bi xwestina dilê wan bizewicînim, ya me, kurda, kete bere. Kî hat, em gerekê erfedetên kal-bavêن xweyî lel-durî, zêrîn qet bîr mekin. Ne jî miqabilî wan derên. Wan çawa kirye, eme jî mecbûrin usan bikin. Ev keç’ a mine xase, merî malê xweyî xas nade xelqê.

Piştî vê xeberdana Reşîd dawya vê zewaca bê dile, bê bingeye nolî bendikê fistoqê minva nolî neynikê zelal hate xanê. Çumku pêlên wê zewaca bêdile zexm hine pismamên min jî ketibû.

Me dewet bi ken, henek, eşq, şâ, hêle-hêleke pir bilindva derbaz kir. Bûk verêkire mala xezûrê wê. Ez jî nolî tew tevgelên dewetê vegeryame mala xwe. Lê dilê min tijî mitale û xuşûş bibû. Ezî gelekî ji vê bazara hevalê xweyî neqayîl bûm, nerazi bûm. Lê min nikaribû dilê xwe hetanî dawîê jêra vekira. Çumku îdî bûyî bibû. Çûyî jî çûbû. Diqewimî gotinê min qet xaşa wî nehatana. Min nexwest, wekî dilê wî jî min bimîne.

Wedeke ewqasî jî dirêj derbaz nebû, ez dîsa çûme mala Reşîd. Berê çiqasî diçûme mala Reşîd, Xidir elbêra dihate

cem min. Min jî gelekî qedrê Xidir digirt. Ew ber ç’evê min, Reşîd mezin bibû. Wê jî bêjim: Reşîd û Xidir birane pir hevdu hizkirî bûn, bê hevdu parî nan nedikirine devê xwe. Îjar min Xidir nedît. Nehat. Sivre hate danînê. Xidir nehate xanê. Dema nanxwarinê min ber xwe neda, got:

- Kuro, Reşîd, Xidir kuda çûye? Çima qet kivş nabe? Yeqînî ney male? Yanê jî nexweş? Welleh, sibêda ç’evê min li rya wîda qerimîne, dîsa jî kivş nabe.

Reşîd nav mitalada ç’evê min nihêri. Kesereke kûr kişand, got:

- Bira, nanê xwe rehet buxwe. Ezê tera her tişti bêjim.

Sivre hate beravkirinê. Wî milê min girt, em derketne hewşê. Wî posîde-posîde ç’evê min nihêri, dengekî merhemetî nizimva got:

- Barîê bira, min bi destî xwe mala xirav kirye. Te got, min tu nebihîstî. Ev xêle wedeye Xidir ji min xeyîdye, minra xebernade. Naê mala min, naçe. Keç’ik, gede hevdu nabine xweyî. Ev çend carin keç’ik serê xwe hildide tê mal. Ez her car wê kutayî-kutayî didime pêşya xwe, dibim mala Xidir, dihêlim, têm. Ew berî min vedigere tê mal. Rast bêjî, ez îdî westyame. Lap bêzorîme, qet nizanim axirîê çawa bibe. Wê dya xwera gotye: “Em nikarin rûnê hevdu, ç’evên hevdu binihêrin. Heta duh, pêr em çawa xûşk, biraê hevdu nav cîkida radizan. Em xwe dîsa xûşk û bira nasdikin”. Ez metel mame, qet nizanim, çawa bikim. Dilê xwe kêra vekim, wekî qet nebe hinekî xema sivik bibim. Min wê rojê banî wê kir, gotê: “Qîza min, aqilê xwe beravî serê xweke, here mala apê xweda rehet

rûnê. Qulixa xezûr, xasya xweda bisekine. Kurê apê xwe hiz bike. Bila ew jî te hiz bike". Wê vekirî got: "Bavo, rûê min bin piê tebe, ez û ew heta îro çawa xûşk, bira hesav dikan. Em şerma rûê hevdu nanihêrin. Car-caranê ew dîsa nolî berê minra "xûşka min" dibêje, ez jî "birako" dibêjim. Ez idî bimrim jî, venagerime wira. Hizdikî vê deqîqê rabe, min bikuje". Got, giryâ, hîşt çû. Ez hêrs bûm, gotê: "Tu bimrî, ya erdîyî! Bimînî, şûna te mala apê teye!" Ew çûnê şûnva welleh ez jî kelogirî bûm. Lê neç'arim! Ev çend rojin min ew dîsa birye mala Xidir. Hela ku tu deng-his tunenin. Xwedê dawîê xérke. Min serê xwe kirye cuherekî valayî usanî teng. Dikim, nakim nikarim jê derxim. Berya rast gotye: "Aqilê sivik barê girane".

Piştî vê xeberdanê min tûşe-tûş Reşîd nihêrî. Dît, ew mîrê nolanî ç'yakî nava wedekî kinda usan mehekîe, lap bûye pûnkekî. Nedihate naskirinê. Cixare ser cixara vêdixistin, netika xwe mîzdida, giran-giran bîna xwe dikişand.

Ev halê wî ser min hukmekî giran hîşt. Min dilekî êşyayî gotê:

- Bira, idî çi bûye bûye. Ez naxwazim ka kevin bidime bê. Hûn biraên hevdune. Dîsa rûnên, hevdu bişêwirin. Hevdu xeydandinê tu xêr dernaê. Werne ser qirarekî. Rya edlayê bijbêrin. Bila dawî nebe poşmanîke ne bûyî.

Ez halekî dilêşyayî ji Reşîd qetyam. Lê ew halê wî qet ber ç'evênen min wêda nedîçû.

Çend roj derbaz bûbûn. Kewkewa sivekêda derê mo hatye kutanê. Min zû derî vekir. Kurê Reşîdî mezin Rizalî ber dêrî sekinî bû. Min ç'evê xwe bawer nekir. Wî çawa ez dîtim,

bilind kire kûranî, xwe avîte hemêza min. Kire kûre-kûr, giryâ. Hindik ma dilê min bisekine. Wê deqîqê Reşîd hate ber ç'evênen min. Nav tirsêda zû-zû jê pirsî:

- Kuro, çi qewimye? Çi bûye? Bavê teyî saxe?

Wî hêsrênen xwe paqij kirin, got:

- Apo, Xezala xûşka min duh xwe gomêda dardakirye. Mirovên dewletê tijî him mala me, him mala apê Xidir bûne. Bavo got: here, zû cawê bide apê xweyî Barî. Bila mesekine, zû bê.

Dîsa kire kûre-kûr, giryâ.

Ez çûm...

Lê min ber ç'evênen xwe ecêbeke ser ecêba dît. Malêwan cînarênen hev bûn. Cimaet usan tijî ber derê herd mala bûbû, te xwelî bavîta hewaê, erdê nediket. Ji dengê girî, wêlewêla cimaetê tu tişt nedihate bihîstinê. Porê merya şûjîn-sûjînî dibû. Min halekî pir giranda xwe Reşîdra gîhand. Ew destê jorê posîde-posîde pêş cinyazê Xezalê rûniştibû. Cixare ser cixara dikişandin. Zû-zû netika xwe mîzdida. Keserên kûr dikişandin. Du mirovên organê ew didane xeberdanê.

Wî ku ez dîtim, bilind kire îskînî. Dengekî eşî, keder got:

- Biraê minî delal, tu hatî?! Wekî min vê rojêda bibînî, erê?!

Nêzîkî wî bûm. Me hevdu hemêz kir. Me herda jî hêsrênen xwe paqij kirin. Mirovên organê (mîlisîa) hevpeywandina xwe tevî Reşîd kutakirin, çûn. Min idî tu tişt Reşîd nepirsî. Her tişt eyan bû!

Nişkêva Xidir berbi min hate xanê. Hêsrênen xwe paqij kirin. Xwest min hemêzke. Min fikra xwe nedâê. Wî dîsa zû-zû hêsrênen xwe paqij kirin. Dengekî zelûlî, pir poşman got:

- Bira, tu dibînî, ci yeke nebûyî hatye serê me?!

Min qet dengê xwe nekir. Tenê bi awirên tûjva ew mêze dikir.

Me bêmiraz bin ax kir.

Dîwanê şuxulê xwe qedand. Lê...

Du biraên hevhizkirî hevdura bûne neyar.

Du ciwan bûne bedbext.

Yek wede zûtir çû ax-berê sar.

Yek jî bû girtîê girtîgehayî çendik-çend sala.

Loma jî ev weyseta kal û bava qet gerekê neê bîr kirinê.

Wan zaravaî zelal gotye: "Tu ku dixwazî şuxulekî bikî, lez mekeve, sed carî hilde, dayne, bipîve, bikişîne, bişêwire, xêr û şera xwe bîne ber ç'evêن xwe, weke hevdu bike û kîjan tera xêre, wê xwera hilde. Wekî paşwestîeda tu poşmanîê mekişînî".

Ez çawa rewşenbîrekî kurdî her cûre rûê dinê dîtî, rûspî, dersdar û helbestvan, îzna min heye dilekî pir keserî, êşî, jan berbirî hemû bav û dayîkên gelê xweyî xwedî ewledêن bermiraz bibim, ji wan hîvî, minnet, rica û îltimas bikim, wekî idî deme dengê min û dengê dilê ewledêن xwe baş bibihêن. Gelek pirsada ewledêن xwera qayîl bibin, îlahî mesela zewacêda. Nebine dîlê erf û edetê wedê derbazbûyîye, qirêje, kevnîar, kîjan ku timê bêhna xwînê, şîn-girî jê tê.

Dema zewaca ewledêن xweda hinekî kûr, dûr bifikirin. Ji şêmîka mala xwe hevekî dûr herin. Vê meselêda gelê qazax û çêçen rêke kardare herebaş bijartine. Qazax hevt bava dijbêrin, paşê dizewicin. Çêçen pêş navê xwe dûr dizewicin. Wan ev edeta zûda dûrî xwe xistine. Ne ew jî musulmanin! Ulmê doxtîrî zûda îzbat kirye, wekî keç' û xort çiqasî hevdu dûr bizewicin, ewqasî ewledêن wan aqil, saxlem, bedew û berbiç'ev dibin. Çumku xwîn tê guhastinê.

Bi zanebûn û dîtina min, çiqas zarokên kestek (annormal) hene, selefa herebilind behra wê zewaca bê feme, bê mitalekirîye. Kesî ew rusqeta nedaye min, wekî ez bê serî xwe, miqabilî erf û edetê gelê xweyî lel-durî û cewahir yekser derêm. Lê hine edet hene gerekê ew idî ji mejûê gel bêne derxistinê. Ew bersiva emrê nû nadin. Erf û edet, dîrok û çanda gele zérîne. Gel pê wê tê naskirinê. Ez bi culetekî mîranîyî bê xofî, bê tirs miqabilî wî edetî dertêm, kîjan ku keç'mam û kurmam hevdura dizewicînin yanê jî pismamên here nêzîk. Vi cûreyî belengaz û bedbext dikan.

Dilekî keserî, êş dibêm: "Gelî dayîk û bava! Bese, bese nisla meye dûhatî bi destî hine mirovên nezane, bê fem bê seqetkirinê!"

Bawerim, wekî gelê minê vê rica minra qayîl bibe, yekdengî bibe piştovanê min. Wê halê Reşîd û Xidir bîmine ber ç'evêن xwe. Û wê rezîlîê dubar nakin.

EZ Û KEVOKÊ TENÊ

Dema ku şerê Qerebaxa ç'ya navbera azêrya û ermenyada destpê bû, girêdayî gelek bûyerên ç'ük û mezine neeyanva ez mecbûr bûm, wekî ji Rêspûblîka Ermenîstanê derêm û cîguhastî wenatekî cuda bibim. Piştî xêle çetinayêngirane, nebîrkirî hatime Rêspûblîka Azîrbêcanê. Bajarê Bekû avayîkî duqatêyî kevirîda mala xwe cîwar kir. Pêş avayî perç'ek erdê vala hebû. Binelîn wê taxê her cûre qirêj û gemarênen malê xwe davîtnê wir. Rojê dest bîn-boxê, vizîna mês û moza, şev jî dengê ewte-ewta kelbêñ kolanaye havî... Jîyan çiqas diçû, ewqasî giran dibû.

Rojekê, çawa dibêjin, min dil-dînê xwe tev anî. Çûme cem cînarêñ xweye hela ku minra nenas bûn. Wan hîvî kir, wekî ew idî qirêj û gemara navêjne wir. Wan hîvîkirina min gelekî hurmeteke başva qebûl kirin. Nav wedekî kinda min û malxweya xwe Dilbera Bala ew perç'a ji gemar û qirêjê paqij kir. Dora wî toreke (sêtka) hesinî kişand. Derwazekî ewqasî jî ne mezin danî. Rex avayîra lûla avêye mezin derbaz dibû. Ji wê hinek av kişande ber mala xwe. Me erd kola, hazırlî çandinya baharê kir.

Rojen baharê hatin.

Hema destpêbûna wan rojada me cûre-cûre (her çandinekî hinek) kultûren xwarinê û yêd mayîn reşandin. Xêle kolêñ kulîlkêñ reng-reng û çend darikêñ mewecat jî nikandin. Eyane, wekî bahara bajarê Bekû gelekî zû tê. Pir xweş derbaz dibe. Nîvbaharêda çandinî şîn bûn. Hêdî-hêdî perê xwe ser erdê

raxistin. Kulîlka nolanî xalîceke (malxweya min kulîlka pir hîzdir) destê çêkirçîke merîfete, pirzane derketî ew pirtî erdê nav qirêj, gemarêda unda bûn. Çendik-çend rengê tebyetêva xemilandin. Dara rehê xwe adilandin. Berê ç'iqlî wan bişkok dan. Paşê kulîlk dan. Me çend kolêñ sorgula jî nikandibûn. Wan jî wedê xweda dêmê xweyî bedew dane kivşê.

Rojekê ez û malxweya xwe ser dîwana hewşêda rûniştibûn. Me dît bin berç'ikên sorgulêda du kevok melisîne. Nolanî du maşoqên zûda hevdu nedîtî ber hevdu dilîzyan. Nukulêñ xweva hevdu mehez dikirin. Geh dûhev dimeşyan, geh jî qirikên xwe evraz dikirin. Dikirne qinge-qing. Carana jî ser stuê xwe para vedigeryan, tirse-tirs me dînihêrin. Çawa bêjî, dixwestin ji me hîvî bikin, wekî em destê xwe nedne wan, hevdu meqetînin, îznê bidin bila mirazê xwe şâ bibin.

Wê dîdema wan ser dilê min hukmekî pir giranî nebîrkirî hîst. Elbêra rojêd mine xortîe nolanî lênta kînoê ber ç'evêñ minra hêdî-hêdî derbaz bûn. Bixwazî-mexwazî min destpê kirin wan hîzbikim, wê dîdema wan herro temaşekim.

Min rehmetî hîvî kir, wekî kulme qût û feraqêke piç'ûkda fire av nêzîkî wan dayne. Wê xwesteka min elbêra qedand.

Wê rojêda destpê bû hîmê dost û hevaltya me û kevoka hate danînê. Wê her sibe zû berî hatina kevoka qût û av dadanî bin kola sorgulê. Kevok dihatin, qût û av dixwarin, vedixwarin. Hetanî êvarê nolî her roj hevdura henek dikirin. Dilîstin. Dû hevdu diketin. Evarê dilekî eşqî, şâ berbi êwira xwe difiryen.

Du sala me û wan bahar, havîn û payîz bi vî cûrê dostaê tevî hevdu derbaz kir. Demşala baharêye sala sisya hat. Xwezila qet mehata.

Kevok dîsa bûne mîvanê me. Wê însana destemele, paqije, dilovan dîsa destbi xizmeta xwe salên buhurî kir. Çend rojêñ baharêye şirîne, eşq, bêqezya buhurîn.

Êvarekê em û zarokêñ me dora sifra şîvê rûniştibûn, eşq û ken şîva xwe dikir. Nişkêva qezyake şewate nebîrkirî hate serê min. Cîê sekînî xwîna malxweya min bilind bû. Gihişte halê mirinê. Gazî çend heqîm û loxmanêñ pir zane kir. Ew pir çerçirîn, lê yazix nikaribûn wê ji wî halê mirinê derxin. Melekê Mewtê bê îsafî, bannekirî ew ji destê me derxist. Wê çilhevt salya xweda berhêwan dinya xwe guhast. Ez û herdu lawêñ xwe – Elî û Anarê hela ku hewceyî mehezê destêñ dayîkê bûn, sêwî hîştin.

Çend rojêñ şîn û şepûlêye tele, giran buhurîn. Îdî kevok bîra min derketibûn. Sibekê ez dîsa ser dîwana hewşêda rûniştibûn. Nişkêva kola sorgulê kete ber ç'evêñ min. Dît – bin kolêda kevokekî tenê melisye, stuê xwe hêla minda xar kirye, feqîr-feqîr min dinihêre.

Elbêra dinya min hate guhastinê. Xêleke xurt ketime nav mitalêñ tele, şewate bê serobine ruhkuj. Min dîsa qût û av danî ber wî. Lê wî qût û avê qet neniherî. Min nîherî – stuê xwe xar kir, ç'evêñ xwe girtin. Mîna mirovekî pir kul û merez, nav behra mitala bû. Çawa bêjî, ji min rica dikir, wekî ez hinekî wî bibihêm, têkevme nav dilê wî, halê wî bipirsim. Bibime hemdemê wî.

Her sibe, berî ro derketinê dihat. Min qût û av nêzîkî wî dadanî. Ew gelek cara qet ji min nedirevî. Qût û avê qet nediniherî. Hetanî êvarê bin belç'ikêñ kola sorgulêda dimelişî. Car-carana ç'evêñ xwe vedikir, der-dorê xwe û min diniherî û dîsa ç'evêñ xwe digirt, dikete nav behra mitala. Ez û ew idî bibûne hemderdêñ hevduya here nêzîk.

Min tê derxist, wekî wî jî mîna min hevala xweye emir unda kirye. Loma usan hundurê xweda dişewite, dikewgire, dihele. Dixwaze dilê xwe minra veke seva agirê dilê wî vêse. Kul û desrê xwe qal bike. Lê sed yazix – ne min zimanê wî, ne jî wî zimanê min zanibû. Me ax û keserên xweye tele, şewat tenê hevdû nîherandinêva hevra qal dikir.

Êvarê ew berbi menzîla xwe diçû. Ez jî diketime menzîla xweye bê Dîlberêye vike-valaye sar.

* * *

Hal usan hate guhastinê, wekî ez mecbûr bûm dîsa têkevme rya koçberî. Min avayê xwe firote mirovekî dem gesî, pir merîfet. Dema barkirinê min kevokê bin kolêda melisî nîşanî wî da. Jê hîvî kir, wekî ew xizmeta me wîra kirye ew jî bikin. Me nomêrê têlêfonê xwe dane hevdû. Ez bê çetinayî Rêspûblîka Qazaxstanê, bajarê Alma-Ataêda cîwar bûm.

Çend rojêñ xerîbîye ewqasî jî ne giran buhurîn. Min rojekê wî mirovîra têlêfon vekir. Jêra derbara xêlek kemasî û zêdeyêñ, ku derketibûn holê, qal kir. Halê kevokê tenê dostê xwe jî pirsî. Wî got:

- Bira, pişti çend rojêñ çûyîna te şûnva idî kevok nehate kivşê. Me çawa pêwîst bû jêra xizmet dikir. Çawa bêjî, wî jî nexwest bê te idî mera hevaltiê bike.

Bê hewce, wê bersiva wî camêrê merîfet ez xêleke xurt poside kirim, xistime nav mitalêñ kûr. Min xwexwa xwe rexne kir. Got: “Welleh, min şaşîke pir mezine, nebaxşandî kirye. Dema barkirinê min gerekê ew jî xwera bianya. Boynet xatirê wê itbar û hevalhizya wîye baha qîmet vir jêra şûneke bedew çêkira. Heta hebû xizmeta wîda bisekinyama”.

Dawîê hatime ser wî qinyatî, wekî Xwedaê mezin dostaî, îtbar û hizkirina bê ç'ilke paqij tenê nekirye qismetê bendê xweye bi hişe, bi zar û ziman. Ew usan jî kirye qismetê hemû bînberên xweye bê hişe, bê zar û ziman jî. Her yek wan jî anegorî femkirina xwe dikare hiz bike û hevaltya şîrîn bidomînin. Nislê bidin, emrê xwe cîkî derbazkin, hûrikên xwe mezin bikin, firêxin. Deynê xweyî dê û bavtiê biqedînin.

* * *

Ez jî mîna wî kûraya dilê xweda dişewitîm, dihelyam. Nav behra mitalê xilaznebûyîda evraz, berjêr diçûm, dihatim. Dibûme xozneber, avjenê pirzane. Valî-walî dînihêrî, lê delavek nedidît, wekî têra derêm. Ji ax û keserên cansoz sivik bibim. Loma min ev helbesta "Ez û kevokê tenê" rewayî halê xwe û wîyî zelûl kir.

Car-carana ez nêzîkî wî disekinîm û min ev helbest bi dengekî pejmûr hêdî-hêdî dixwend:

*Hey, kevokê şerpezeyî, birîndar,
Yeqîn te jî unda kirye delal yar.
Were, em tev biaxivin hûre-hûr,
Ax, keserên min û te têr dilê kûr.*

Wî nolî mirovekî birîndar çawa bêjî dengê min dibihîst, ez femdikirim. Ç'evêñ min dînihêrî. Cîê xwe nedilipî. Dawîê dîsa ç'evêñ xwe digirtin, stuê xwe xar dikir, bin kolêda dimelisyâ.

Me hemû rojêñ xwe wa derbaz dikirin. Evarê ew diçû menzîla xwe, ez jî menzîla xweye valaye sar.

EZ Û KEVOKÊ TENÊ


Hey, kevokê şerpezeyî, birîndar,
Yeqîn te jî unda kirye delal yar.
Were, em tev biaxivin hûre-hûr,
Ax, keserên min û te têr dilê kûr.

Pir mehele, mekewgire, bese, bes,
Çûn îdî paşda naêñ meke hes.
Ev telayî min û tera Rebb şandîye,
Ez bi zarim, tu bê zarî, firqî çîye.

Fermana wî me qebûle, deyax bike,
Feyde tune, şîn-şepûlê ewqas meke.
Dîtina me îdî çûye dinya heqe,
Em bengîne, jan û êşen min, te yeke.

Xwezil, xwezil bizanbûya min zarê te,
Veêsanda ew agirê nav dilê te.
Tu hildayî, bibirayî ser axa dê,
Em xilazbûna ji ezabê bê yarîê.

DERHEQA SPONSORÊ VÊ PIRTÛKÊ BAYREM-ELÎÊ DURSUNÊ MELEK DA



Sala 1937-a gundê Vêr-texanê nehya Aspînsiyê Rêspûblîka Gurcistanê hatye dinê. Dema ew tê dinê, bavê wî 103 salî, dayka wî Nena Xidire 57 salî bûye. Kalikê wî nav kurdên Gurcistanêye musulmanda mirovekî navûdengî, pir syanet bûye. Gûbêrnatorê Gurcistanê hatye mala bavê wî mêvan. Wî hespekî kihêl û çend xelatên baha qîmet baxișandine gûbêrnator.

Dema Gurcistanêda pro-sêsa kolêktêvîzasîaê pêşda tê, dewlet gundê wanda kolxozen

ser milkê bavê wî teşkîl dike. Biraê wî mezin Elîşan dikine sedrê kolxozen. Nîvê avayê wan dikine mekteba gund. Dema şerê cihaneyî duda ku destpê dibe, Elîşan bi hîvîkirina xwe diçe Ordya Sor. Çawa qumandarekî mérخas pêşenîeda miqabilî faşistên devxwîn şer dike, bi egîtî şehîd dikeve.

Sê xûşkên Bayrem-Elî hebûne: Çînar, Menemşa û Rosqet. Sala 1944-a mala wan jî bi emrê "Bavê milet" Stalînê devxwîn tevî malbetên kurdên musulmane din ji Rêspûblîka Gurcistanê nefî dikan. Ew ewil têne oblasta Oşê. Çend sala

şûnva têne bajarê Alma-Ataê. Sala 1954-a dibistana gunde hevtsale xilaz dike. Hevde salya xweda tevî Murbeta Silêman dizewice. Dibe bavê çar ewleda: Çinare, Mînare, Begalî, Mîralî.

Sala 1957-a bajarê Alma-Ataêda têxnîkûma hesabdariê xilaz dike. Çend salên dirêj idarêن cûre-cûreda çawa hesabdarê sereke dişuxule. Ew usan jî sala 1971-ê Ûnîvîrsîtêta marksîzmê-lênîzmê xilaz dike. Wê salêda destpêkirî hetanî dema derketina rihetîê (pênsiaê) serkarê Agêntstva bajarê Alma-Ataê dişuxule.

Ew kalikekî pir bexteware. Danzdeh nevî û bîst nevîç'irkên wî hene. Ew wan hemûya pir hiz dike. Nika jî bajarê Alma-Ataêda dijî. Nava êlêda xwedîê hurmet û sîyaneteke pir bilinde. Dema nav êlêda problêmeke ne layîq ku pêşda tê, ew zû wir amade dibe, bûyerê bi rya edilayê hel dike. Rûspîen usane nolî wî gelê meda pir pêwîstin.

Em wîra sehet-qewet, saxlemya bê qezya dixwazin.

BIRAÊ MINÎ HÊJA

Berya mera hîştye milkek,
Xezna tijî, gir-hûr gelek.
Gîha reha xwe şîn dibe,
Esilda xas unda nabe.

Xulam wekî bibe axa,
Wê nemeşe wek maqûla.
Eslê wîda ew reh tune,
Xêr dest naêñ xêñî gune.

Axa tucar nabe milûk,
Cîda gire, nabe piç'ûk.
Kêr-kirnêñ wî başin, rindin,
Tew kêlmên wî hingiv, qendin.

Çiqasî bêñ ba û tofan,
Teyroka sar, berf û baran,
Ç'ya şûnê naguhêze,
Dara bîê nade reze.

Bira, eslê te eyane,
Tu firq dibî ji tewane.
Çendik-çend sal bêñ û herin,
Mêr navê xwe naguherin.
Lawê Dursun, tornê Melek,
Sed sal boy te nebe gelek.

Bariê Bala.

NAVEROK

Çend gilî derheqa xudan û efrandinê wîda (Nûrê Serdaryan).....	3
--	---

POÊZIA

WETENHIZÎ

Ya Rebbê Jor	10
Helbestvan kîye.....	11
Ax, ax, bê welatî.....	12
Welatê dê.....	13
Merivê dinê, rica dikim, hemû werin!.....	14
Xwezil, xwezil.....	16
Welatê dê. Dihoka rengîn	17
Mirovên dinê	19
Dayîk	22
Dayîk, tu welatî	23

LÎRÎKA

Bedewa pir xwerazî.....	24
Ha Gulê	26
Bedewa, bedewa.....	27
Barana dev bahar.....	28
Tu ji gulê bedewtirî	30

Were cem min.....	32
Xilaz nabim ji mitala.....	34
Nazika bedew	35
Bedew, milahîmî, lel û dure	36
Berfa bê dem hatî	37

REWAKIRIN

Ezîzê Zîo	39
Eylazê Mehemedê Ûsivê Biro	41
Slêmanê Rostemê Hetemaî	42
Elî, kurêm	43
Nûrê xanim	44
Loxmana hêja	45
Kek Nadir, zane, eyan	46
Dayka hêja – Helîma Emo	48
Ahmedê Hepo	50
Elîê Mehemedê Îbo	52
Tahirê Slêman	53
Ber gora serokê nemir	55
Qadirê kalko	57
Norhanê kalko	59
Medîna kalko	60
Celîlê piç'ûk	61
Farîz Fortûna	62
Mêvanên delal	65

ÇARXET.....66

POÊMA “ZERDEŞTÊ KAL”.....70

FOLKLOR (7 BÛYER)

Bûyera I 79

Bûyera II 84

Bûyera III 92

Bûyera IV 97

Bûyera V 100

Bûyera VI 103

Bûyera VII 105

ŞİRETNAME.....107

BOYNET ZAROKA

Hirç’ika min 114

Kurik û qeşav 115

Gul û Gulçîn 117

NIVÎSARA VEKIRÎ

✓ Nado û Narê 120

✓ Bila dilî dilbe 166

Ez û kevokê tenê 174

Derheqa sponsorda 181

Ez vê pirtûka xwe rewayî

ruhê biraê xwe EHMED

û herdu kurmamên xwe

EVDILÊ RZGO û TÎTALÊ TEÎFÛR dikim.

BARIÊ BALA

ZERDEŞTÊ KAL

(POËZIA Û NIVÎSARA VEKIRÎ)

ԲԱՐԻԵ ԲԱԼԱ

ԾԵՐ ԶՐԱԴԱՇՏԸ

(ԶԱՓԱԾՈ ԵՎ ԱՐՁԱԿ)


БАРИЕ БАЛА

СТАРЕЦ ЗАРДАШТ

(ПОЭЗИЯ И ПРОЗА)

Размер: 60x84, 1/16; Объем 11.75 п. л:

Отпечатано в типографии ООО "ВМВ-ПРИНТ"
Адрес: Ереван, пр. Азатутян 24/11, тел.: (+374 10) 28 54 28
E-mail: vmv_print@yahoo.com
www.vmv-print.am



PDF:

Enstituya Kurdi ya Qefqasyayê

Web:

<https://www.ensiklopediyakurdi.com/>

Tel.:

+7 918 073 48 79

